

**Lologena Wo Kiena Ne  
Yesu Kristo Naña  
MATIU  
Siriyuia  
Visayuena Na Tusi Nene**

*Komþasnen suniena plas na tusi nini*

Tusi nini, “*Lologena Wo Kiena Ne Yesu Kristo Naña Matiu Siriyuia*”, naga pisawal lologena wo sape Yesu, naga yaru naña Ntewa pisaar pa kiena yeririna la nanua sumo rui sape yoko naga imi vena tamalia la. A e Yesu, navisaarena la naña Ntewa pisaar pa kiena yeririna lala e Tusi Pesa ana pimi m̃alivi narui. Yesu paeme e yo kiena lus nae Israel lala, a kiena lologena wo nene, naga pe kiela re ga poli, naga pe kiena yeririna punuga na yomarava nini.

Matiu mligan ruru komþasnen tusi la nene suñaga sanene. Naga pisayu þesania, naña Yesu paeme, a naga pisayu m̃enaga naña Yoane kea, a naña Yermare kilalia. A siraunia, naga pisayu naña Yesu siari kiena yuñæena e yo naña Kalele suñæa pisawal ke lologena wo pa yaru lala, pian la, a kila ruru kiela inanena lala. Siraun nene, naga pisayu m̃ena naña Yesu pa ma Yerusalem, amio suri la naña Yesu kila maron e kiena legiena na olua maro. A naga pisayu maron naña Yesu mare, a yoko mal sina.

Matiu pisayu naña Yesu naga pe navianiena tai naña po taulu navianiena taþena lala a

namãreraena na visawalen kinasnen navisalu-  
aena kiena Ntewa sike e naga, a pisayu ðelaga  
naþa Ntewa pimi pe Ðarin Suþe kiena ne kiena  
yeririna lala.

Suri la moki naþa Yesu pian la ea, Matiu  
miliþere kompas lima, sanene:

Yesu pian kiena yeririna lala metava e kunusa.

E kiena vianiena nena, naga pisawal ðelaga  
naþa yaru la monar akila, vena aimi naþa  
Ntewa ve kiela Ðarin Suþe. A naga pisawal  
kiela yuþaena lala, ana taman pan la vena  
ayumãenia, a pisayu sur la naþa yoko atolia  
e luwasnen kiela maliena e yomarava viu  
naþa Ntewa imi ve Ðarin Suþenia. Kiena  
vianena la nene sike e marana na keviu lima  
vito tol marana na keviu olua.

Yesu pian kiena yeririna lualima taaga pa  
lua. A mila mãreraena pan la vena ava  
avisawal kiena lologena wo va yaru taþena  
lala. Navianena la nene sike e marana na  
keviu lualima.

Ðakaiwa la naþa Yesu pisa vena visayuen  
yaru la naþa Ntewa pe kiela Ðarin Suþe,  
e yomarava viu naþa yoko ava asike ea.  
Ðakaiwa la nene sike e marana na keviu  
lualima taaga pa telu.

Yesu pian kiena yeririna lala e ðelaga naþa  
yaru monar kila vena tavevea. Navianena  
la nene sike e marana nakeviu lualima taaga  
pa orelu.

Yesu pian kiena yeririna lala, pisayu suri la  
naþa yoko imi mãalivi e legiena maro, a e  
yomarava viu naþa Ntewa ve Ðarin Suþenia.

Navianena la nene sike e marana na keviu lualima lua pa vari a lualima lua pa lima.

*Komþasnen tus la nini*

Repinane Yesu lala a Yesu paeme 1:1—2:23

Yumãena kiena Yoane Nakeena 3:1-12

Yoane kee Yesu, a Yermare taþalia 3:13—4:11

Yesu kila kiena yumãena e lepas naþa Kalele 4:12—18:35

Yesu moluwe Kalele pa ma Yerusalem 19:1—20:34

Legiena na maro kiena Yesu naþa kila kiena yumãena garu Yerusalem a yo la naþa lavisin ga Yerusalem 21:1—27:66

Yesu mal sina a kiena nalogena lala apisu naga 28:1-20

*Repina ne Yesu lala*

*Luk 3:23-38*

<sup>1</sup> Yesu Kristo naga molue kome lus na yermarua keviu lalua kiena ne repina ne le Yu lala, nane Epraam naga sumo, amio Tepet naþa naga sirau. Repina ne Yesu la punu ga, la kiela kia sanini:

<sup>2</sup> Epraam naga narina naþa Aisak.

Aisak naga narina naþa Sekop.

Sekop naga narina naþa Suta, amio wenla taþena lala.

<sup>3</sup> Suta naga narina lua, Peres amio wenla Saera, naþa lalua na ape kaora, naþa lalua na anela naþa Tamã.

Peres naga narina naþa Ebron.

Ebron naga narina naþa Ram.

<sup>4</sup> Ram naga narina naþa Aminatap.

Aminatap naga narina naña Nason.

Nason naga narina naña Salom.

<sup>5</sup> Salom naga narina naña Poas, a Poas nene naña naga anena Reap.

Poas naga narina naña Opet, a Opet nene naña naga anena Rut.

Opet naga narina naña Sese.

<sup>6</sup> Sese naga narina naña Tepet, a Tepet nene naña naga pe ãarin suþe kiena ne le Israel lala. Tepet naga narina naña Solomon, a Solomon nene naña anena, naga wona ne Uraea na sumo.

<sup>7</sup> Solomon naga narina naña Reopoam.

Reopoam naga narina naña Apia.

Apia naga narina naña Asa.

<sup>8</sup> Asa naga narina naña Seosepat.

Seosepat naga narina naña Soram.

Soram naga narina naña Usaea.

<sup>9</sup> Usaea naga narina naña Sotam.

Sotam naga narina naña Eas.

Eas naga narina naña Isakaea.

<sup>10</sup> Isakaea naga narina naña Manasa.

Manasa naga narina naña Amon.

Amon naga narina naña Sosaea.

<sup>11</sup> Sosaea naga narina naña Sekonaea, amio wenla lala. Ana e pogos kiena ne la nene narui, yaru lala na purvanua taþena naña Papilon apanon aþure plan le Israel lala ava ayumãe korena garu Papilon.

<sup>12</sup> Sekonaea naga narina naña Seltiel, nane pogos naña le Israel lala amiyumãe korena ke garu Papilon wa.

Seltiel naga narina naña Seruþapel.

<sup>13</sup> Seruṣṣapel naga narina naṣṣa Apiut.

Apiut naga narina naṣṣa Eliakim.

Eliakim naga narina naṣṣa Aso.

<sup>14</sup> Aso naga narina naṣṣa Satok.

Satok naga narina naṣṣa Akim.

Akim naga narina naṣṣa Eliut.

<sup>15</sup> Eliut naga narina naṣṣa Eliesa.

Eliesa naga narina naṣṣa Matan.

Matan naga narina naṣṣa Sekop.

<sup>16</sup> Sekop naga narina naṣṣa Yosop, naṣṣa wona ne Maria. Maria nene, naga anenane Yesu, naṣṣa apisape naga pe Navisaarena.

<sup>17</sup> Siar e Epraam, teras lelei lala pimi tol Tepet, teras la nene tol lualima taaga pa vari. A siar e Tepet pimi tol pogos naṣṣa le Pāpilon lala aṣṣure plan le Israel lala avanon ayumāe korena garu Pāpilon, teras lelei lala tol mēna ga lualima taaga pa vari, a siar e pogos naṣṣa la asike garu Pāpilon, pimi tol Kristo, teras lelei lala tol ke sina ga lualima taaga pa vari.

### *Yesu paeme*

#### *Luk 2:1-7*

<sup>18</sup> Suniena nini kiena ne Yesu Kristo, naṣṣa naga paeme sanape, naga sanini: naga anena, sira naṣṣa Maria, naṣṣa la apisaaria sumo asape yokorena talopa amio yaru tai, kiena kia Yosop. Ana pogos naṣṣa lalua pe atalopa re poli wa, Maria naga mlogekilale naṣṣa naga mēṣena, na pimi kome Ninuna Wa. <sup>19</sup> A Yosop naṣṣa la apisaaria apisape yokorena naga talopa amio Maria nene, naga pe yaru wo tai, a naga pe

pisa re pisape Maria naga kila suri tai piowa poli. Ana naga pisu sane ĩisi na lalua na monar akilaro kiela navisaarena nene, ana naga sitom ke pisape kila ga e ĩelaga tai naĵa malumu ga, vanon naĵa naga yepen mavin kilaen Maria memawa manenea vanon suri nene. <sup>20</sup> A pogos naĵa naga sitom ke sape kila sanene, naga mĕnia, pisu navisi tai kiena ne Ntewa mĕlavin naga, ana navisi nene pisa pania, pisape “Yosop, ko lus kiena ne Tepet, ko na ve ologe re viowagan naĵa oure Maria ve womĕa, vanon sisi naĵa teke e naga, naga pimi ga kome Ninuna Wa. <sup>21</sup> Yokorena Maria war narina yermĕne, a monar osikia kiena kia Yesu Natamaliaena, vanon yokorena naga warplan mlamulena viowa lala vetan kiena yeririna lala.”

<sup>22</sup> Ana suri la nene pimi kakate sanene, vena kila visena kiena ne Ntewa tai vim ve lelaga, sa naĵa Navisawalena Aisea naga pisawal sumo, <sup>23</sup> naĵa naga pisape

*“Yokorena sira mĕe tai naĵa yermĕne pe pisu re poli wa, naga mĕĵena, ĩisi na war narina tai ve yermĕne, ana ĩisi na asikia kiena kia ve ‘Emanuel.’ ” Ais 7:14*

Kia naĵa “Emanuel” naga kana kinas sane “Ntewa sike amio ita.”

<sup>24</sup> Pogos naĵa Yosop tavilo sina, kila sa naĵa navisi kiena ne Ntewa pisa pania, ana naga talopa amio Maria, ĩere pe wona. <sup>25</sup> Ana pe pa pisu re Maria tol pogos naĵa Maria ĩarlua narina

nene. A pogos naþa Maria þarlua sisi nene, ana Yosop sikia kiena kia “Yesu.”

## 2

*Yaru la naþa akilia ruru þelaga kiena ne verue lala apimin asape avisu Yesu*

<sup>1</sup> Yesu naga paeme e pulkumali tai, kiena kia Petleem, lepas nae Yutea. E pogos naþa Yesu paeme, Erot naga pe þarin suþe kiena ne le Yu ke lala. A siraunia, pe piavi re nena poli, ana yaru la þasia naþa la akilia ruru þelaga kiena ne verue la po paþisi, apimi atol garu Yerusalem. Susumo la nene amolue e kiela purvanua, e lepas naþa mrae molue ke komea, ana apimi. <sup>2</sup> Ana la apiun tan yaru lala, asape “?Sisi naþa paeme mare ga na wa, naþa asape þisi na naga vim ve þarin suþe kiena ne le Yu lala, naga mþeke pe? Imimi moþal kiena verue rui, molue ke e yo naþa mrae molue ea, ana imimi mepimin ke mesape meieluar naga.”

<sup>3</sup> Ana pogos naþa Þarin Suþe Erot tol visena la nene, amio yaru taþena laþasia nae Yerusalem, amloge, ana la pe akekaran re nena ga. <sup>4</sup> Ana Erot pio yerkawa kiena ne yaru wa lala amio navianena navisaluaena lala apimi apisuia, ana naga piun tan la, pisape “?Navisaarena naþa apisape þisi na naga imi, la apisa ke asape þisi na naga vaeme pe?”

<sup>5</sup> La naþani apisataþnea, asape “Yokorena Navisaarena naga vaeme garu lepas nae Yutea, e pulkumali naþa Petleem. <sup>6</sup> Nanene vanon naþa sumo na, navisawalena tai siriyuia, pisape

*‘Ntewa naga pisa sanini, pisape  
 “Amiu nae kumali naña Petleem, amiu  
 tařatete avisavenua,  
 yerkawa tařena nae Yutea lala, la atola  
 metavan amiu, ana amiu na ato ga tano,  
 peraga,  
 vanon yokorena nasumonena keviu tai molue  
 nenaga kom pun amiu,  
 ana naga visuar ruru kiau yeririna lala nae  
 Israel.” ’ ’*

*Maika 5:2*

<sup>7</sup> Pisi na Āarin Suře Erot naga pio vinaun ga yaru na kilia ruruen řelaga kiena ne verue la nene, vena aimi avis ga amio naga taaga, vena naga loge ruru tan la, pisape la apisu verue nařani kate na pogwai. <sup>8</sup> Ana naga pisa pan la, pisape “Amiu na monar ava akale sisi nene vano-o alualia, ana awasuře si aimi avisawal van inu, vena inu mřena ga nevano neieluar naga,” ana naga mřigan la apa garu Petleem. Ana kiena visena nene naña naga pisa ana pisokan ga, naga sinenan pisape visae lual sisi tomtom nene, ana weřaria.

<sup>9-10</sup> Ana yaru la nene la amloge visena kiena ne řarin suře nene řisi, ana apa sina ga e kiela mřaplepa, ana apisu sina verue nene naña tego řesia e lepas naña mřae molue ke komea. Pogos naña la apisu si verue nene, akekara pařisi, ana verue naña naga sumon la mřa ga pano-o atol e naña sisi nene mřeke ea. <sup>11</sup> Ana la apa loyumřa e yumřa nene, apisu sisi nene, amio anena naña Maria. Ana la akinai, amieluar naga. A la apikeřa kiela karo lala, ařar plan kiena nalaena la pania, suri tai naña kol, amio suri lalua naña



ponos taninu po pañisi sa naña mñañes, naña kiela kia prakensis, amio mer, naña mer nene naga kana kilavaru keviu pañisi.

<sup>12</sup> Ana kolemalu, Ntewa pisi pan la e mñeniena tai, pisaluñar la pisape “Ve ava akom re si lepas naña puna ne Erot.” Ana la amligan yo nene, añasuñela ke sina ga, akome mrapa tañena apa kiela.

### *Añurelua Yesu, añure apa Isip*

<sup>13</sup> Pogos naña yaru la nene amial rui, ana Yosop mñenia mña navisi kiena ne Ntewa tai pimi puna, pisa pania pisape “Yosop, osuñalu, owar ninis nene amio anena, amiu aure ava garu Isip, vanon lavisi ke Parin Suñe Erot kale ninis tomtom nene vena weñar narui. Ava asuñña garu Isip vano-o tol pogos naña nevisa van ko, ana awasuñe amiu si aimi.” <sup>14</sup> Ana Yosop mlogear visena kiena navisi nañani, ana suñalu ãarlua ninis tomtom nene amio anena, ana amligan plan ke e yemalo nene, ana amialin ke ava garu Isip. <sup>15</sup> Ana la apa asuñña garu Isip yam piavi li mña ga, pano-o tol pogos naña Parin Suñe Erot mare.

Suri la nene pimi kakate sanene, vena kila visena kiena ne Ntewa tai naña Navisawalena Osea naga pisawal nanua sumo vena vim ve lelaga, naña naga sapenua

*“Naruu na yermene sike garu Isip,  
ana nevio naga wasuñe imi.”*

*Ose 11:1*

### *Yaru nakilaen mara lala aña moñar ninis lala*

<sup>16</sup> Pogos naña Parin Suñe Erot naga kilia sape yaru nakilia ruruen ãelaga kiena ne verue lala

pe akila re sa naŕa naga pisa poli, pe apimi akom re si puna poli, ana naga sinena mimi paŕisi, ana naga pisa pan kiena yaru na mara lala, pisape “Ava akale ninis la punu ga naŕa ape yermene asike Petleem, a la mēna ga naŕa asike lavisinia, la naŕa pe kiela kas lua re poli wa, ana awe momar la make ga amarmare.” Āarin Suŕe nene naga polo pogos nene sanini, vanon mloge visena tan yaru la nene, naŕa apisawal mesmesun pania nanua e pogos naŕa verue nene kateŕesia.

<sup>17</sup> Suri la nene kila visena naŕa Navisawalena Seremāea naga pisa sumo pimi pe lelaga, naŕa naga pisape

<sup>18</sup> *“Le Ramā lala amloge sira nae pula tai tagi na tagi,*

*naga mloge piowa paŕisi,*

*sira nene naga Resel, naŕa naga tagin ke mapina lala.*

*Ana naga yepena mavin yaru tai kila luŕeluŕeena vena loge wo sina,*

*vanon mapina la akokovio make ŕisi rui.”*

*Ser 31:15*

*Yosop ŕar Yesu nene molue Isip, ŕasuŕe si pa Nasaret*

<sup>19</sup> Ana pogos naŕa Yosop lala asike garu Isip wa, ana Āarin Suŕe Erot naga mare. Ana Yosop mēnia, pisu sina navisi kiena ne Ntewa tai pimi puna, <sup>20</sup> ana navisi nene pisa pania, pisape “Yosop, osuŕalu, oure ninis nene amio anena, awasuŕe amiu si, ava garu kiamiu purvanua naŕa Israel, vanon Āarin Suŕe Erot nene naŕa

naga sape weñar ninis nene, naga mare rui.”

<sup>21</sup> Ana Yosop naga mlogear visena nene, naga suñalu, ðar ninis nene amio anena, aþasuþela ke sina ga apa e kiela purvanua naþa Israel.

<sup>22</sup> Pogos naþa la amialin ke asape ava tol garu Yutea, ana Yosop mloge asape Akaleas kus ke lлена ne arimana naþa Erot, pe þarin suþe ke garu Yutea. Ana Yosop maraun si vaen garu Yutea, ana naga mñeni si tai, mñal Ntewa naga pisi pania, pisaluþar pisape “Ve ova re si garu Yutea,” ana Yosop lala apalein e yo taþena tai, kiena kia Kalele. <sup>23</sup> Ana la apa asike e kumali tai e lepas nene, kiena kia Nasaret.

Suri nene pimi kate sanene vena kila visena kiena ne navisawalena lala vim ve lelaga, naþa la apisayu Navisaarena nanua sumo rui, naþa la apisa apisapenua

“Yokorena, lala avisave naga ve yaru nae Nasaret tai.”

### 3

*Yoane Nakeena sike ga e yokorena, mlologon ke navilopuena*

*Mak 1:1-8; Luk 3:1-8; Yoane 1:1-28*

<sup>1</sup> Yesu naga kapuru pimi keviu, gar ga Nasaret, ana e pogos ke nene narui, Yoane Nakeena naga pimi þarþoyo e yokorena e lepas nae Yutea, ana naga sumã mlologon ke, pisapenua <sup>2</sup> “Amiu na monar avilopu amiu, vanon Nasuþenena kiena ne Ntewa pimi ke narui.” <sup>3</sup> Yoane Nakeena nene

naga pe yaru naña Navisawalena Aisea pisawal nanua sumo rui, naña naga pisa, pisapenua  
*“Pulgon yaru tai suña pio ke e yokorena, pisape ‘Amiu akila ruru make mrapa kiena ne Ntewa, vena naga kilia imi m̃alivi e kiamiu malena lala.’ ”* *Ais 40:3*

<sup>4</sup> Yoane Nakeena nene naga sane Navisawalena Elaisa nene nanua sumo, sa naña naga pe miyen re kulsota naña po poli, m̃ana kulsota na ape ga e vilulus nen kamel, a kiena kilika na kararen m̃eḗpena na amiyum̃aen ga e kulus nen puluk. A kana kinanena e yokorena, kan ga narin suri la naña asape kurpo ne, amio suri kiki naña sukapak tetan la amiyum̃aenia. <sup>5</sup> Naga suña e yokorena nene pano pano-o, ana yeririna nae Yerusalem lala amio m̃ena ga pulkumali taḗena lala nae lepas naña Yutea, a pulkumali m̃ena ga la naña lavisin wii nae Yortan, la apanon apisu naga. <sup>6</sup> La amiyagogon kiena lologena lala, a la apisa plan kiela mlamulena viowa lala pania, ana Yoane kela e wii nae Yortan.

<sup>7</sup> Ana e pogos tai, Yoane pisu naña yeririna la moki na p̃egas nalotena lua nene kiena ne le Yu lala, naña Varasi lala amio Satusi lala, la apimin ke naña naga ke la, ana naga pisi m̃arera pan la, pisape “?Amiu na sane lom̃ara lala, naña la amaraun kapi tai ana la aḗure, ana amiu na asitom asape akilia aurmatan kapi naña Ntewa naga p̃isi na ligan imi, naña pe amiu apilon amiu re poli wa? <sup>8</sup> Ana visae ve lelaga kemua naña amiu amaraun nakoena nene, ana

kiamiu malena naga monar war mras la naña powo, naña torokin kiamiu navilopuena nene. <sup>9</sup> Ana avisuar amiu, popon amiu na ve awarwar amiu re sina, sa naña asuña akila ke rui, naña apisa ke asape ‘A, ita na poga ga rui, okilakan ita na tepe lus ruru kemua kiena ne yermarua Epraam.’ Ana nanene na pe suri re tai nene poli, vanon visae Ntewa naga sinenania, naga kilia la ga kilavaru la nene, kila la aimi ave lus kiena ne Epraam la ve moki, vena akus lelemiu. <sup>10</sup> Nevisa van amiu, nesape m̄ekiavi mon ruru rui pisape teroro purlaki la naña pe ãar re mras wo poli, ana yokorena ateroro la ana akoven la ava e kapi. <sup>11</sup> In na nepimi sumo, ana nekee amiu ke ga e wii, vena kila merarava sa naña amiu apilopu amiu rui, ana yaru tañena tai naga pimi ke siraun inu wa. Yaru nene, naga to laa metavan inu, a in na nepiowa ga, netorokin re nowar plan kiena kulus nen lana poli, pona nekilia nekila kiena yuñena tañena lala. Ana naga ke narui, naga kilia kee amiu e Ninuna Wa, amio kana kapi nena, vena kekan plan kororaki lala e kiamiu malena lala. <sup>12</sup> Naga na sane mlarar ke koruak nayuraren wit e limana, ana sisilin plan mrasa la akekapil vito lele tañena, a vinus vito lele tañena, ana war plan mrasa va uña m̄ana, a yokorena naga kilia kuan vinusa va e kapi naña tañatete mare pogos tai.”

*Yoane ke Yesu*  
*Mak 1:9-11; Luk 3:21-22*

<sup>13</sup> Ana Yesu mligan lepas naña garo Kalele, pam e wii nae Yortan vena Yoane ke naga. <sup>14</sup> Ana Yoane pisape visaluñaria, pisapenua “?Sanape na ko opamin osape nekee ko? Suri nene na pe mesmesu re poli. Popon ga ko na okee inu.”

<sup>15</sup> Ana Yesu pisatamea, pisape “Peraga, ñisi na ve ve sa re nene, popon ita na tetañan ga tetaveve suri wo la naña Ntewa naga sinenania sape tekila.”

Ana Yoane tañan Yesu pimi puna, ana kea.

<sup>16</sup> Ana pogos naña naga ke ñisi, Yesu naga molue e wii pa metava, ana veraga ma e peni pietava pania, ana naga mñal Ninuna ne Ntewa pitomi ke tano sa naña lomñe, pitomi tol Yesu.

<sup>17</sup> Ana la amloge Ntewa nae ma e peni pisi pitomi tano, pisape “Nene na naruu ne, naña nesitom naga pañisi. Kiau sitomena teke ga e naga, a nekekaran naga pañisi.”

## 4

### *Parin suñe kiena ne yermare lala tañali Yesu Mak 1:12-13; Luk 4:1-13*

<sup>1</sup> Suraun naña Yoane Nakeena kee Yesu ñisi, ana Ninuna Wa naga sumon Yesu pa e yokorena tai, vena Yermare tañali naga. <sup>2</sup> Ana e pogos nene, Yesu monsilun leniena tol legiena lualima vari a lemalo mñena ga lualima vari, a siraunia naga viso kari pañisi. <sup>3</sup> Ana Yermare, yaru na tañalien yeririna lala, pimi pisa pania, pisape “Visae ko na ope narina ne Ntewa kemua lelaga,

ko ovisali van kilavaru la nene aimi ave kilapar-  
avi, vena okan tai.”

<sup>4</sup> Ana Yesu pisa pania, pisape “Peraga, vanon  
Visena Wa pisa sanini pisape

*‘Kinanena ga tařatete kila yaru mali, ana visena  
punu ga nařa Ntewa pisa, naga ga nene  
kilia kila yaru mali.’ ”* **Naw 8:3**

<sup>5</sup> Ana Yermare pisape wereli sina ga sitomena  
kiena Yesu va garu e Yuřa Wa nařa garu  
Yerusalem, ana mligan naga sike e yo tai nařa  
pa manene metava pařisi e wosoyuřa Mana  
Ntewa. <sup>6</sup> Ana naga pisa pania, pisape “Visae ko  
ope narina ne Ntewa kemua lelaga, ko oula, oto  
tano e nene. Ana yoko ko okila woga ga ne,  
vanon Visena Wa pisayu Ntewa, pisape

*‘Naga yoko ligan kiena navisi lala aimi avisuar ko  
řaga,*

*ana la ayukop yaun ko ga ořeke metava e limala,  
vena ve owan re lařa e kilavaru tai.’ ”*  
**Yauena 91:11,12**

<sup>7</sup> Ana Yesu pisataře ke sina ga Yermare, pisa  
pisape “Peraga, vanon Visena Wa pisa řena ga  
sanini, pisape

*‘Ko na tařatete otařali kiořa Suře Ntewa, nařa  
otařali ořareran osape naga kila kiořa  
suri tai.’ ”* **Naw 6:16**

<sup>8</sup> Naga na, Yermare řere ke sina ga sitomena  
kiena Yesu pa metava e pupia kunus tai, pisape  
“Visae ova ose kunus nene, okira vito tano ovisu  
purvanua kerkeviu la ne sike e yomarava nini,  
amio kala suri wo la nařa asike ea.” <sup>9</sup> Ana tařali  
ke sina ga Yesu yam telu narui, pisa pania, pisape

“Suri punu la nene na yokorena netamñan van ko, visae okinai olotun inu.”

<sup>10</sup> Ana Yesu pisatamñea, pisa pisape “Ko oure, Yermare. Visena Wa pisa sanini, pisape ‘Pisi na monar olotun ga Ntewa naga taaga, naña pe kioña Suñe, a okila ga kiena yumñaena naga taaga.’ ”

<sup>11</sup> Ana Yermare purmatan Yesu, ana navisi la apitomi, apisuar ke naga.

*Yesu siar kiena yumñaena garu lepas nae Kalele  
Mak 1:14-15; Luk 4:14-15*

<sup>12</sup> Ana e pogos nene, li na mara lala kiena Ĥarin Suñe Erot la atarar Yoane Nakeena, amligan naga pa e yumña nakoena. Ana pogos naña Yesu mloge nalogeena nene, naga sitom sape wasuñe si vito garo Kalele. <sup>13</sup> A pogos naña naga ãasuñe si pito garo Kalele, ana naga pe pa re si garo Nasaret poli, naga pito la garo Kapeneam rui, pulkumali naña mñeke lavisin lapa nae Kalele. Yo la naña siar Kalele pito tol yo losi, yo la nene porotano kiena ne lus lalua kiena yermarua lalua na nanua sumo, Sepulan amio Naptali. <sup>14</sup> Suri nene pimi mñalivi vena kila visena kiena ne Ntewa nene vim ve lelaga, sa naña Navisawalena Aisea naga pisawal sumo rui, naña pisape

<sup>15</sup> *“Amiu yaru lala nae yo kiena ne Sepulan amio yaru lala nae yo kiena ne Naptali, naña asike likan wii nae Yortan amio pupia sive, amiu yaru la nae garo Kalele, e lelen yaru*



*la moki naña pe ape le Yu re poli asike ea, amiu aloge visena nini:*

**16** *Yeririna la naña asike e yemalolo, ñisi na alual pupia yomerarava tai.*

*La nene asuke ga e yemalolo silaga, naña la na ape namarena ga, ana pupia yomerarava tai tego pañisi pimi tegoli la.” Ais 9:1,2*

**17** Ana siar e pogos nene, Yesu sumã ga mlologon ke, pisapenua “Amiu na monar avilopu kiamiu sitomena vetan kiamiu mlamulena viowa lala, vanon naña nasuñenena nae ma e peni pimi ke lavisi narui.”

*Yesu pio yaru na wereen ika la vari  
Mak 1:16-24; Luk 5:1-11*

**18** Ana Yesu sumã ga miyaloro ke e isinen pupia lapa nae Kalele, ana ñal yaru la lua, Saemon Pita amio wenla naña Antru. Lalua asumã ga akuan ke lilivi, vanon lalua na ape yaru na wereen ika. **19** Ana naga pisa pan lalua, pisape “Amiu lua ataveve inu, ave kiau yaru lala, vena nevian amiu ana ave yaru na wereen yaru lala.” **20** Ana lalua nene amligan kiela lilivi nañani veraga ga, lalua ataveve Yesu.

**21** Ana Yesu mial li ga pa laa sane, ñal si yaru la lua Semes amio wenla naña Yoane, la lua na la narina ne Sepeti. Lalua asike e kiela los nen wa tai amio arimala, lala asumã ga akila ruru ke kiela lilivi. Ana Yesu pio lalua pisape lalua atavevea, **22** ana la lua asumãlu veraga, amligan arimala ñeke e wa, ana ataveve Yesu apano.

*Yesu mlologo, pian ke yaru lala, a kila ruru ke namaiena lala*

*Luk 6:17-19*

<sup>23</sup> Ana Yesu miyaloro ke pa e yo punu ga garu Kalele, pian ke le Yu lala e loyuma e kiela yuma na lotuena lala. Ana naga pisawal ke nalologena wo nene nasupenena kiena ne Ntewa, a kila ruru ke yaru la naŋa maiena sike e yepela, a kila yaru la naŋa yepela laŋas malmalumu, apimi amloge po sina. <sup>24</sup> Ana la asunyu kia kiena Yesu pa kalo mēna yo punu ga e lepas naŋa Kalele na vito tano, naŋa apio asape Seria. Ana la aŋure yaru la naŋa amai e yo punu ga nene apimi puna Yesu. La nene, laŋasia naŋa amai, laŋasia naŋa magka kar kare la amloge piowa paŋisi, laŋas naŋa yermare la asike e la, laŋas naŋa amarmarelu ke lala, a laŋasia naŋa yepela laŋasia marmare, ana Yesu kila ruru punu ga namaiena la nene amloge po sina. <sup>25</sup> A yaru la moki paŋisi naŋa ataveve Yesu e pogos nene. La nene apimi garu Kalele, a e mēna e lepas naŋa pulkumali lualima sike ea, a garu Yerusalem, a garu lepas taŋena lala nae Yutea, a ma mēna e lepas nen ŋalu nae Yortan lepas ŋasia na vano. Ana la nae yo la nene apimi ataveve Yesu e pogos nene.

## 5

*Yesu pian yeririna lala*

*Luk 6:20-23*

<sup>1</sup> Ana e pogos tai, Yesu pisu yeririna la moki, ana naga pa metava e kunus tai. Sane kiela

navianena tai, naga totano ana kiena yeririna lala apimi atovivia, <sup>2</sup> ana naga pian la.

<sup>3</sup> Navianena kerkeviu laṗasia kiena ne Yesu sanini: naga pisape

“La naṗa apisu kilale naṗa pe aṅal re Ntewa e kiela malena poli wa, ana ṗisi na navisa ruruena vim van la, vanon Ntewa naga pe Parin Suṗe kiena ne yeririna la ne sanene.

<sup>4</sup> La naṗa suri viowa lala akila kare la ke paṗisi, a amloge piowa, atagi ke na, ana navisa ruruena vim van la, e nakila luṗeluṗeena lala.

<sup>5</sup> La naṗa ape yaru malumu ga, navisa ruruena vim van la, vanon naṗa Ntewa pisaar pan la rui pisape la suri wo la naṗa sike e yomarava nini van la.

<sup>6</sup> La naṗa sinelan manene ṗelaga mesmesu lala sa naṗa Ntewa naga sinenania, ana navisa ruruena vim van la, naṗa ṗisi na avisu kiela malena ulen namesmesuena la nene.

<sup>7</sup> La naṗa asuṃa sinela miye ke yaru taṗena lala, navisa ruruena vim van la, naṗa yokorena Ntewa naga sinena ye manene la vaṗisi.

<sup>8</sup> La naṗa sinela mekiki po, navisa ruruena vim van la, naṗa yokorena la avisu Ntewa.

<sup>9</sup> La naṗa ape yaru na kilaen suṃare, ana navisa ruruena vim van la, naṗa Ntewa naga vio yaru la nene ave narina lala.

<sup>10</sup> La naṗa amlelaga e Ntewa, ana yaru taṗena lala akila kare la vanon kiela nalelagaena nene, navisa ruruena vim van la, naṗa

yokorena Ntewa ure la ava loyumuña e kiena nasuñenena.

<sup>11</sup> “Amiu la naña yaru la akila kare ke kiamiu kia, a la añene amiu ke na, a la apisa kare amiu, a apisa kotalia amiu, vanon naña amiu na ape kiau yeririna lala, ana ñisi na navisa ruruena vim mña ga van amiu. <sup>12</sup> Ana ve sinemiu viowa re, akilia akekara ga, vanon kiamiu pupia suri wo tanea lala sike ma e peni. Pisi na yaru la akila kare amiu vañisi, ana visae ve sanene, la akila ve sa ke naña yaru na sumo lala akila kare navisawalena lala.”

*Kururu sive amio kapi viaga*

*Mak 9:50; Luk 14:34-35*

<sup>13</sup> Ana Yesu pisa mña ga, pisapenua “Amiu na sane sive na e yaru na yomarava lala. Ana visae sive ve melkalka re sina, ana pe suri re si tai naña kilia kila melkalka si poli. Ana sive nene na pe popon re si suri tai poli, popon ga akuan va narui.

<sup>14</sup> “Amiu na sane kapi viaga na yomarava. Pogos naña yaru la akila kiela pulkumali metava e kunus tai, kolemallo yaru la naña asike perina akilia avisu kapi nena, ana tañatete akilawan kiela pulkumali nene. <sup>15</sup> Ana pe yaru re tai poli naña silan kiena kapi, ana kalo si kapi nene e piaki tai. Pogos na yaru silan kapi, ana monar ligan to metava e lelana, ana yaru punu ga naña asike loyumuña ana kapi vivaga nene tegoli la.

16 Ana e ðelaga ne na nene, amiu na monar atañan kapi na kiamiu malena tegoli yaru la punu ga vena akilia avisu kiamiu yuññaena wo la naña amiu akila ke na. Ana pogos naña la avisu kiamiu yuññaena wo la nene, ana la akilia ayeluar kia kiena Arimamiu naña sike ma e peni.”

*Yesu pisayu navisaluaena kiena Mosis*

17 Ana Yesu pisa mñaena ga, pisapenua “Pe sineun re nenaga, naña amiu asitom ke asape inu nepimin nesape nekuan plan navisaluaena kiena Mosis, amio visena kiena ne yaru navisawalena la poli. Peraga, pe sa re nene poli. In na nepimin nesape nevian ruru amiu e kinas nen visena punu ga la nene van amiu. 18 Suri na ne nepisa ke pan amiu ne, ana lelaga pañisi monar asitomñalia, ðisi na tañatete navisaluaena nene kovio, vanon sinapane amio yomarava nini lalua akovio. Ana tañatete narin mras nen visena tai, pona ya sina naña teke e navisaluaena nene, kilia kovio, tañatete ga, vano-o tol pogos naña suri na navisaluaena la nene vim kakate make ga. 19 Vanon suri ne na nene, visae yaru tai kila pal narin suri tai e navisaluaena nene, pona vian yaru tañena tai kila sanene, yaru nene na ve to re e yo wo tai e nasuñenena kiena ne Ntewa. Ana yaru naña taveve ruru visena na navisaluaena la nene, a pian ke yaru tañena lala akila sanene, ana naga yoko kiena kia wo e nasuñenena kiena ne Ntewa. 20 Inu nevisa van amiu, visae sinemiun asape ava e nasuñenena

kiena ne Ntewa, ana monar kiamiu ðelaga la wo a mesmesu, taulu navianena navisaluaena lala, amio Varasi lala, visae peraga, taþatete ava ea.”

*Yesu pisayu nasinekarena*

*Luk 12:57-59*

<sup>21</sup> Ana Yesu pisa mñene ga, pisapenua “Amiu amloge mña naþña navianena la apian ke kieta yer-marua la nanua sumo rui, apisape ‘Ve awenñar re yaru, a visae yaru na wemñar yaru mare, mesmesun ga naþña aure naga va kumali ana avis vania.’ <sup>22</sup> Ana nevisa van amiu sanini: Yaru naþña sinena kari wenla, yaru nene mesmesun aure va kumali avis vania. A yaru naþña visi viowa van wenla, visavenua ‘Ko na yaru viowa tai nene wa,’ yaru nene mesmesun aure va e kieta viorena keviu ana aliþere naga. A yaru naþña þisi na la sinemimiena van wenla, pisape ‘Ko na þarumña pe wowe,’ naga mesmesun va e kapi naþña e lele na loge viowaena. <sup>23</sup> Vanon suri ne na nene, visae oimi e wonta kiena ne Ntewa vena ola nalaena vania, ana ositomñal si naþña okila suri tai pa womla piowa teke na, <sup>24</sup> ana oligan nalaena nene toñña e lepas nen wonta nene sumo wa, ana monar omolue sina, ova okila ke ne marawo wa, ana siraunia okilia oimi ola si kionña nalaena naþani va Ntewa.

<sup>25</sup> “Visae okila suri piowa pa yaru tai, ana naga sinenan pisape were ko ova kumali avis van ko, ana popon okoskosin ovisi ruru omio yaru nene, e pogos naþña pe aþure ko re opa kumali poli wa. Visae peraga, pona ligan ko e limana yaru na liþereena la yo, ana la nene aligan ko e limana

yaru na taren yaru lala, ana la akilia aligan ko e yuñña nakoena. <sup>26</sup> Suri na nepisa ke pan ko ne naga lelaga, ana visae sanene, tařatete si omolue e yuñña na koaena, vano-o tol pogos nařa oul make kioñña nakoena.”

*Yesu pisayu kolau*

<sup>27</sup> Ana Yesu pisa mñena ga, pisapenua “Amiu amloge mña nařa navianena lala apisalua sumo rui, asape ‘Ve okila re kolau.’ <sup>28</sup> Ana inu, nevisa van amiu sanini: Yaru nařa yepen kawe ke sira tařena tai, nařa naga sinenania sape werea, ana naga sane kila kolau amio sira nene řisi rui e kiena sitomena.

<sup>29-30</sup> “Visae kilamarañña na řamarua kila ko ke omloru e mlamulena viowa sanene, popon osilua kilamarañña nene vano. A visae lumoñña na řamarua kila ko ke oloru e mlamulena viowa, popon otelua, okuan vano. Ana popon narin lepasneñña ga tai kovio, a visae peraga, akoven punu ga tasneñña va e lele na loge viowaena.”

*Yesu pisayu nakuwanluaen sira*

*Matiu 19:9; Mak 10:11-12; Luk 16:18*

<sup>31</sup> Ana Yesu pisa mñena ga, pisapenua “Nanua sumo na apisa sanini, apisape ‘Yaru nařa koanlua wona, ana naga monar kila mñaki tai vania, nařa pisa meraravan pania pisape koanlua rui, pe pe wona re si poli.’ <sup>32</sup> A in ne nanini, nevisa van amiu, sanini: Pe mesmesun re nena ga nařa yaru tai mñenlua wona poli, visae nařa wona nene naga pe kila re kolau sumo poli. Visae yaru

---

**5:29-30** Mat 18:8; Mak 9:43    **5:31** Mat 19:7; Mak 10:4    **5:32**  
Mat 19:9; Mak 10:11,12; Luk 16:18; 1Kor 7:10,11

tai m̃enelua wona, naga kila kare wona nowo nene sa ga naṣa wona nene naga pe sira na taṣaen ga kolau rui. A yaru taṣena naṣa naga were sira tai naṣa wona nasumo naga m̃enelua naga rui, yaru taṣena nene, naga suṃa kila ke kolau narui.”

*Yesu pisayu sanape naṣa akila navisaarena*

<sup>33</sup> Ana Yesu pisa m̃ena ga, pisapenua “Amiu na amloge m̃a naṣa navianena lala apisa pan kieta yermarua la sumo rui, apisape ‘Visae ovisa kia kiena ne Ntewa vena kila kioṃa visena m̃arera, siraunia ko taṣatete okilaro sina visena nene. Visae ovisa kia kiena ne Ntewa, monar okila mesmesu sa naṣa ko opisa.’ <sup>34</sup> Ana nanagane, inu nevisa van amiu, sanini ‘Taṣatete ovisa kia kiena ne suri taṣena vena kila kioṃa visena m̃arera.’ Taṣatete ovisavenua ‘Lelaga metava,’ vanon naṣa ma e peni na lelana ne Ntewa naṣa totano ke ea, na pe yo wa paṣisi. <sup>35</sup> A taṣatete m̃ena ga ovisa kia kiena yomarava nini, vanon yomarava nini lelen lana ne Ntewa naṣa naga piawa ke ea. Taṣatete ovisa Yerusalem, vanon Yerusalem na lelana ne kieta Paṛin Suṣe Wa. <sup>36</sup> A taṣatete m̃ena ga ovisa ṣarum̃a, vanon taṣatete ovilon vilum̃a tai imi yuwowo pona imi malolo. <sup>37</sup> Visae avisa suri na lelaga, monar avisa ga ‘Lelaga,’ a visae avisa suri naṣa peraga, monar avisa ga ‘Peraga.’ A visena taṣena la naṣa akilia avisa, naga molue ga kome Yermare.”



*Yesu pisayu yaru naña kila maran si piowa pan yaru naña kila piowa pania*

*Luk 6:29-30*

<sup>38</sup> Ana Yesu pisa mēna ga, pisapenua “Amiu amloge m̃a naña navianena lala apisa nanua sumo, apisape ‘Visae yaru tai kito kilamaram̃a tai, ana ko okilia okito m̃ena ga kilamarana. A visae yaru tai sulua maluem̃a tai, ko m̃ena ga okilia osulua maluena tai.’ <sup>39</sup> Ana nanagane, inu nevisa van amiu sanini: Amiu ve akilamaran re si suri van yaru naña kila viowa van amiu. Visae yaru tai lipa pipim̃a e lepas na p̃amarua, ana monar otam̃an m̃ena ga lipa pipim̃a lepas na p̃am̃eli. <sup>40</sup> Ana visae yaru tai visave were ko ova avis van ko kumali, ana naga m̃areran visave owar mom̃a kulsota vania, ana ko owar m̃ena ga mom̃a kulsaket vania. <sup>41</sup> A visae yerkawa tai m̃areran visave owar kiena karo amio ayal va tol mrae ve taaga, ana monar okekaran owar va tol si maran mrae ve taaga. <sup>42</sup> Visae yaru tai viun suri tan ko, monar ola vania, a visae yaru sinenan visave la kiom̃a suri tai yum̃aenia, monar otam̃an vania vena lavia, ve ovisaluṗar re vania.”

*Yesu pisayu nisape monar akekaran nasinekar lala*

*Luk 6:27-28,32-36*

<sup>43</sup> Ana Yesu pisa m̃ena ga, pisapenua “Amiu amloge m̃a naña navianena pisa sumo rui pisape ‘Monar ositom nalavis pum̃a, a monar okila viowa va kiom̃a nasinekar lala.’ <sup>44</sup> A nanagane, inu nevisa van amiu sanini: Monar asitom kiamiu nasinekar lala, a monar alen wo m̃ena

yaru la naþa akila ke piowa pan amiu, <sup>45</sup> vena amiu ataveve ruru þelaga kiena ne Arimamiu naþa sike ma e peni, vanon naþa naga kekaran yaru punu ga maran taaga. Vanon suri ne nanene, naga kila kiena mrae tego, a kila kiena yua powo pitomi pun yaru punu ga, la naþa apo a la naþa apiowa. <sup>46</sup> ?Visae akekaran ke ga yaru la naþa asitom amiu ke na, amiu na asitom ke asape yokorena atol kiamiu nalaena tai? A yaru na takis lala, naþa yaru taþena la asape la ape yaru viowa ga, la akilia akila sanene. <sup>47</sup> Visae otalopan ga kiomã yeririna lala, nanene na pe otaulu re þelaga kiena ne yaru viowa la poli. A yaru la naþa pe amlelaga re e Ntewa poli, la m̃ena ga akekaran kiela namratava lala. <sup>48</sup> A kiamiu malena monar mesmesu ruru wo, sa naþa þelaga kiena ne Arimamiu naþa sike ma e peni naga mesmesu ruru paþisi, a naga po pan yaru la punu ga.”

## 6

### *Yesu pisayu nalaena lala*

<sup>1</sup> Ana Yesu suãa pisi pan la, pisa pisape “Suri la naþa kieta nalotena pisa pisape popon teyumãenia, amiu na ve akila re sa naþa amiu akila na vena yaru ve moki akilia avisu kilale naþa amiu akila ke suri wo. Visae amiu asuãa akila m̃a sanene, þisi na Arimamiu naþa sike ma e peni, naga taþatete la nalaena van amiu vanon kiamiu yuãaena la nene.

<sup>2</sup> “Visae ve sanene, pogos naŭa ko ola nalaena va yeririna la naŭa pe kiela suri re poli, vena oiila la, ana pe pon re owarwar ko vanon poli, sane li navilavenen viskorenena. Yaru la nene apisawal ke kiela yuŭaena wo lala e loyumuŭa na leniena, a e yepesinas la vanua, vena yaru la ayeluar la. Ana nevisa suri na lelaga van amiu, yaru la ne sanene amla kiela nalaena ŭisi rui e nayeluarena naŭa yaru taŭena la amla pan la, a taŭatete si ala suri tai. <sup>3</sup> A pogos naŭa ko ola nalaena va yaru la naŭa pe kiela suri re poli, vena oiila la, monar okila ga e ŭelaga na tapolouena, yaru ve visu re, a ve kioŭa sitomena yeluar ko re e nalaena nene. <sup>4</sup> A visae okila tapoloun ga kioŭa yuŭaena wo la ne sanene, ana Arimoŭa naŭa pisu ke suri la naŭa yaru la pe apisu re poli, naga kilia la nalaena van ko vanon kioŭa yuŭaena wo la nene.”

*Yesu pisayu leniena*

*Luk 11:2-4*

<sup>5</sup> A Yesu pisa ŭena ga, pisapenua “Ana pogos naŭa amiu alen, pe pon re ataveve ŭelaga kiena ne li navilavenen viskorenena la poli. La nene na sinelan manene asape asuŭalu vena alen loyumuŭa e yuŭa na leniena, a vanua e yometava lala, ana yaru la akilia avisu la. Ana inu nevisa suri na lelaga van amiu, yaru la ne sanene amla kiela nalaena ŭisi rui e nayeluarena naŭa yaru taŭena la amla pan la, a taŭatete si ala suri tai. <sup>6</sup> Ana pogos naŭa visae okila leniena, ana ova loyumuŭa e moŭa yuŭa ko ga taaga, okotava ana

okila leniena va Arimomña naþa sike na, ana pe yaru pisu re naga poli. Ana Arimomña naþa kilia visu suri la naþa pe yaru pisu re poli, naga kilia la kionña nalaena van ko, vanon kionña suri wo naþa okila.

<sup>7</sup> “A pogos naþa alenia, ana pe pon re avisa visena ve moki poli, ve sa yaru la naþa pe amlelaga re e Arimata lelaga poli. Yaru la nene amape yokorena na alual suri naþa la amlen ke vanonia, komin la apisa ke visena la moki manenea, ana peraga. <sup>8</sup> Ana amiu na ve ataveve re kiela þelaga lala, vanon Arimamiu, naga kilia ke suri la naþa limamiu plasan rui, pogos naþa amiu pe apiun re suri la nene tan naga poli wa.

<sup>9</sup> “Vanon suri ne nanene, mesmesun naþa amiu alen sane leniena nini, naþa pisa pisape ‘Arimamimi naþa ko osike ma e peni, mesmesun ga naþa yaru la asu vatanon kionña kia wa.

<sup>10</sup> Memlen mesape kionña nasuþenena imi sumalu m̃arera se yomarava nini, vena yeririna la akila sa naþa ko sinom̃ania, sa naþa la ne ma e peni akila m̃aga.

<sup>11</sup> Awis, ola kinanena van imimi þane, a e legiena punu ga.

<sup>12</sup> A oviewo imimi e kiamimi mlamulena viowa lala, sa naþa imimi m̃ena mepiewo ke yaru taþena la naþa akila ke piowa pan imimi.

<sup>13</sup> Ko ve oligan manene re suri viowa lala aimi ataþali imimi, okila wo Yermare ve imi kila kare imimi re.’

14 “Vanon naŕa visae amiu aviewo ke yaru la naŕa akila ke piowa pan amiu, ana Arimamiu naŕa sike ma e peni viewo amiu mēna ga. 15 A visae ve aviewo re yaru taŕena la naŕa akila ke suri piowa pan amiu, ana Arimamiu taŕatete viewo kiamiu mlamulena viowa lala.”

*Yesu pisayu monsilena*

16 A Yesu pisa mēna ga, pisapenua “A visae pogos naŕa amiu amonsilu ke sina ga, ve akinan re vena amiu asitoŕali Ntewa a alen vania, amiu ve akila re sa naŕa pe ake re maramiu poli, pona amiu akila maramiu la viowa, a kulugomiu la miyopiop sa naŕa viso kar amiu paŕisi, vena yaru lala avisu kilia ya naŕa akila ke na. Nanene na yuŕaena kiena ne li navilavenen viskore-nena. Ana visae akila sanene, ana yeririna laŕasia sinela ye la, naga ga nene kiela naulena naŕa la akilia alavia vanon kiela monsilena, ŕisi na taŕatete si Ntewa naga la sina ga suri tai van la. 17 Ana ko, pogos naŕa amonsilu ga sanene, popon okee maramā, okila ruru viluŕa, oyowau ruru wo sa naŕa ko okila ke silaga, 18 vena yaru la aninue ya naŕa ko okila ke ne. Arimoŕa ga naŕa naga sike na, pe yaru la aŕa re naga poli, ana naga ga ŕisi na kilia pisu ke suri la naŕa pe yaru la apisu re poli, ŕisi na naga la nalaena van ko vanonia.”

*Yesu pisayu kilavaru*

*Luk 12:33-34*

19 Ana Yesu pisa mēna ga, pisapenua “Pe pon re amiu akilapolo kiamiu suri wo na yomarava

la nini poli, vena avim ave yaru keviu na suri moki manenea. E yomarava nini na kirara lala akilia akar suri la nene, a suri la nene akilia avililua a amenunu mēna ga, a amio mēna ga yaru na vinauena naḡa kilia kilapo yuḡa, vena vinaun suri la naḡa amiu aḡionia. <sup>20</sup> Ana amiu na monar awarpolo kiamiu suri wo lala ma e peni, vanon naḡa e nene na yo tai naḡa pe kirara re e poli, a suri tai taḡatete vililua a menunu, a yaru na vinauena lala taḡatete akila kare kiamiu suri nowo la naḡa amiu amligan ruru sike ea. <sup>21</sup> Popon vena amiu na kiamiu suri wo la ve moki sike ma e peni, vanon e naḡa kioḡa suri wo la sike ea, ana kioḡa sitomena mēna ga sike e nene silaga.”

*Yesu suḡa pisayu naḡa yaru la ve ave puluvis re*

*Luk 11:34-36*

<sup>22</sup> A Yesu pisa mēna ga, pisapenua “Kilamarana yaru naga pe yo taaga ga naḡa kapi vivaga pimi loyuḡa e tasnena. Visae kilamaraḡa merarava ruruia, okilia ovisu kilale yaru taḡena, vena oiila naga. Visae okila sanene, losineḡa pulen ruru kapi pivaga paḡisi. <sup>23</sup> A visae kilamaraḡa ve merarava ruru re, yoko taḡatete ovisu kilale ruru yaru taḡena, yoko osuḡa ovisu ga kioḡa suri lala ove puluvisin ga. Visae okila sanene, losineḡa pulen manene la yemalolo, a visae yemalolo naga sike e naḡa mesmesun kapi vivaga naga se ea, nanene sane ko na osike e yemalolo naḡa pe pupumalo paḡisi.”

*Yaru tařatete yuńae kiena suře ve lua veraga  
Luk 16:13*

<sup>24</sup> A Yesu pisa mńena ga, pisapenua “Yaru tai tařatete kilia yuńae kiena suře ve lua veraga. Visae sanene ana naga kekaran tai, a yepena mavin tai, pona naga logear tai, aligan tai. Amiu na tařatete akila sane ave yaru kiena ne Ntewa, ana ave yaru kiena kilavaru mńena ga.”

*Sanapen yaru nařa sitom manene kiena  
malena  
Luk 12:22-31*

<sup>25</sup> Ana Yesu pisa mńena ga, pisapenua “Vanon suri ne na nene, inu nevisa van amiu sanini: Pe pon re kiamiu sitomena ulen manene ga kiamiu yuńaena na visuar amiuen la poli, nařa amiu asuńa apiuviun ke, asapenua “?Ańa e nape nařa yoko ita telual kata kinanena a mńata namunena?” pona “?Pisi na ita tetol mńata kulsota na yenwo e sanape ne?” Sitomena la ne sanene na pe po re nenaga, komin kiamiu malena naga po taulu kinanena, a tasnemiun naga po taulu kulsota. <sup>26</sup> Asitomli manu la ne akaka ke ne. Manu la nene pe amapla re kala lokove poli, a pe apa ařar re kinanena pitomin nařa aligan ruru sike loyuńa poli. Ana Arimamiun ga nařa sike ma e peni, naga ga mla ke kinanena pan la, ana e kiena navisuenaga, naga pisu amiu na sane ato metavan manu lala, řisi na naga kilia visuar amiu taulu la. <sup>27</sup> ?Amiu na asitom asape yaru kilia kila kiena malena nařa plas ga ne vim ve piavi li laa sane wo ga, vanon sitom manene la kiena malena? Peraga, pe sa re nene poli,

ana amiu na popon ve asitom manene re kiamiu malena.

<sup>28</sup> “?A komin ya ne asitom manene ke m̃amiu kulsota la vanonia? Amiu asitomli vinas nen purmeme la ne pitotovi ke e yo punu la ne. Vinas la nene na pe amiyum̃ae re poli, a pe asulu re m̃ala kulsota la poli. <sup>29</sup> Ana inu nevisa van amiu, Parin Suḗe Solomon nene nanua sumo, naga pe yaru na suri moki, ana naga m̃ana kulsota la naḗa naga miyenia na pe miyowau ruru re sane meme la nene poli. <sup>30</sup> A meme la nene na la ape na legiena taaga ga, peni narui asikapi la e kapi, ana Ntewa ga naga paia ruru la ke apo sanene. ?Ana amiu na asitom asape ḗisi na Ntewa naga taḗatete la kulsota van amiu? !Aulai, amiu na pe apiawa re nena m̃arera e Ntewa poli!

<sup>31</sup> “Komin suri ne la nene, pe pon re sinemiu la ulen sitomena la nene poli naḗa sape “?Yoko takan ya ne, a tomun ya ne, a telual m̃ata kulsota sanape ne?” <sup>32</sup> Lelaga, yaru la naḗa pe amlelaga re e Ntewa poli la asitom manene suri la ne sanene silaga, ana amiu, Arimamiu naḗa sike ma e peni, naga kilia m̃a ga naḗa pisape yokorena monar kiamiu suri la nene na wa. <sup>33</sup> Suri naḗa amiu monar asitom ḗesan ve keviu e kiamiu malena, nane nasuḗenena kiena ne Ntewa, amio kana namesmesuena nena lala. Visae ve sanene, ḗisi na naga la m̃ena ga suri taḗena la nene van amiu.”

<sup>34</sup> “Ve sanene, pe pon re sane ḗane na, asitom manene suri la na legiena na peni poli. Peni ga, akilia asitom suri la na peni, komin legiena na ḗane, ana suri viowa la moki pimi e rui.”



## 7

*Yesu pisayu naliṣere kareen yaru taṣena*

*Luk 6:37-38,41-42*

<sup>1</sup> Ana Yesu pisi ke pan la na wa, pisape “Amiu na monar ve aliṣere kare re yaru taṣena lala. Ve sanene, Ntewa m̃ena ga ve liṣere amiu manene re, <sup>2</sup> komin sitomena naṣa teke e amiu pogos naṣa amiu aliṣere yaru taṣena, ṣisi na sitomena na sanene teke m̃ena ga e Ntewa e pogos naṣa naga liṣere amiu. Pisi na Ntewa naga liṣere amiu, ve sa ke naṣa amiu amliṣere yaru taṣena lala. <sup>3</sup> Pe pon re naṣa ko osum̃a ovisasawal ke narin kororaki naṣa teke e kilamarana ne womla poli, ana ko pe opisu kilale re pupia mora laki na m̃eke e kilamaram̃a poli. <sup>4</sup> ?Sanape narui ko ositom ke osape okilia ovisi va womla nene, ovisave ‘Ṣisi na nelalua ke ne kororaki na teke e kilamaram̃a ne sumo wa?’ <sup>5</sup> !Visae sanene, na ko na pe opisu kilale re kioṃa mlamulena viowa poli, ana ko osum̃a omliṣere ke ga mlamulena kiena ne yaru taṣena lala! !Ko na ope yaru navilavenen viskorenena paṣisi wa! Okilalua ke ne pupia miasin laki naṣa m̃eke kilamaram̃a sumo wa, siraunia ana okilia ovisuveve narin kororaki naṣa teke e kilamaran yaru taṣena.

<sup>6</sup> “Pe pon re amiu akilali naṣa avisawal Visena Wa kiena ne Ntewa va yeririna la naṣa la pe akekan re ala poli. Nanene sa naṣa amiu asum̃a apagan ruru ke lokul tetan lala e kina-nena naṣa po, ana pogos naṣa akinana ṣisi, ṣisi na avilon ṣarila ana akar amiu ke sina ga. Sa

ke m̃ena ga naṗa visae awar nalaena wo lala va nompui lala, ṗisi na la avie neno ga vitove sike e pulkene.”

*Yesu pisayu naviunena suri tan Ntewa*

*Luk 11:9-13*

<sup>7-8</sup> A Yesu pisape “Yaru naṗa suṃa piun ke suria, silaga naga mlavia, a yaru naṗa suṃa kale suria, silaga naga m̃alia, a yaru naṗa suṃa sigariga ke mratava, silaga pulutava pietava pania. Visae sanene, ṗisi na amiu awar ya naṗa amiu asum̃a apiun ke tan Ntewa, a ṗisi na amiu alual ya naṗa amiu asum̃a akale ke tania, a mratava naṗa amiu asum̃a asigariga ke ne, ṗisi na Ntewa naga vietava van amiu. <sup>9</sup> Visae narum̃a tai viso karia, viun narin kilaparavi naṗa teke ne, ṗisi na taṗatete ola kilavaru tai vania, <sup>10</sup> pona visae naga viun ruru ika naṗa teke rui, ana taṗatete ola lom̃ara van kania. <sup>11</sup> A lelaga naṗa amiun na ape yaru viowa ga lala, ana taṗatete amiu yaru tai kilia kila sanene, amiu na akekaran ga silaga naṗa amla suri wo lala pan narimiu lala. Sanene, pogos naṗa amiu aviun suri tai va Arimamiu nae ma e peni, naga kekaran ga naṗa la suri wo la van amiu narina lala, va ve keviu la sane wa.

<sup>12</sup> “Amiu na monar akila wo va yaru taṗena la silaga e suri wo ga lala, sa naṗa amiu sinemiun asape yaru taṗena lala, la monar akila wo van amiu. Visena ke nene narui naga purṗes nen visena kiena ne navisaluaena la nene naṗa

Mosis naga siriyuia, amio m̃ena ga ya naṓa navisawalena na sumo lala la apisa.”

*Mrapa lua la*

*Luk 13:24*

<sup>13-14</sup> Ana Yesu pisa m̃ena ga, pisapenua “Pupia pulutava tai naṓa keviu mon m̃aga, ana mrapa naṓa pa ṓarpoyo komea ana lepalepasa a pe yotop ruru po paṓisi. Yeririna la mokliu naṓa ataveve ke mrapa nene, ana mrapa nene naga va e yo natolen koaena. A amiu na monar ava loyuma e pulutava taṓena tai, naṓa naga ve tokak la ga. Naga kana mrapa nena m̃arera paṓisi, a pe yeririna moki re naṓa akom ke e poli, ana mrapa nene naga mrapa na malena.”

*Purlaki amio kana mrasa*

*Luk 6:43-44*

<sup>15</sup> Ana Yesu pisa m̃ena ga, pisapenua “Amiu na monar avisuar ruru yaru la naṓa la apisape la ape yaru navisawalena lala, ana apian ke suri navisokanena lala. Pogos naṓa la sinelan asape avian amiu, la apimi sa naṓa ape erau wo amio amiu, naṓa la yepela mom̃au ruru nenaga, sa naṓa sipsip lala, ana e losinela lala la sa ga lokul tetan lala, naṓa la visokarlan suri punu ga.

<sup>16</sup> Ana ṓisi na amiu avisu kilale la e mras nen kiela malena lala. Vilum̃ini la naṓa pe nenosa, amio kilika la naṓa pe nenosa, la pe aṓar re kinanena wo poli pona mras naṓa kiki ruru poli.

<sup>17</sup> Purlaki naṓa kapuru ruru po, naga monar war mras naṓa po, a purlaki naṓa kapuru piowa ga, naga monar war mras naṓa piowa ga. <sup>18</sup> Ana purlaki naṓa kapuru po, ana taṓatete war mras

naña viowa, a purlaki naña kapuru piowa ga, ana tařatete war mras naña po. <sup>19</sup> Naga sa ga nene narui, visae purlaki viowa la nene naña la tařatete awar mras napo, řisi na monar ate plan la ga vena akuan la ava e kapi. <sup>20</sup> Visae ve sanene narui, mras naña naga molue e malena kiena ne yaru kila meraravan pisape yaru nene naga pe yaru na sanape, ana řisi na amiu akilia avisu kilale navisawalena viowa la nene e mras viowa la naña molue e kiela malena lala.”

*“Pe nekilia amiu re nenaga”*

*Luk 13:25-27*

<sup>21</sup> Ana Yesu pisa mēna ga, pisapenua “Yaru la mokliu asumā apio inu ke asape ‘!Kiau Suře, kiau Suře o!’ ana tařatete la punu ga nene naña řisi na akilia ava loyuma e nasupenena kiena ne Ntewa ma e peni. Yeririna naña kilia va loyuma, naga yeririna ga naña naga suma kila ke suri la naña Ata naga sinenania. <sup>22</sup> E pogos naña řisi na Ntewa naga liřere yeririna lala, yeririna la ve moki naña řisi na avio inu ve sanene, avisave in na nepe kiela Suře. Pisi na la avisa avisave ‘?Suře, sanapen imimi? Imimi na memiyumaen suri wo la mokliu e kioņa kia, a imimi meņene plan mēna ga yermare lala, a mekila ke mēna ga kile la mokliu. ?Pona ko pe ositoņal re kiamimi yumaena wo la nene poli, yo?”

<sup>23</sup> “Ana yokorena inu nevisawal mesmesun van la, nevisave: Inu na pe nekilia amiu re nenaga pogos tai, naña amiu na ape kiau. Amiu na

ape yaru na mlamulena viowa ga la ne. !Amiu aurmatan inu nagane!”

*Yumã lua*

*Luk 6:47-49*

<sup>24</sup> A Yesu pisa m̃ena ga, pisapenua “Visae ve sanene, la naña ataveve ruru sa naña nepian amiu rui, la sane yaru tai naña pe manmaruan naña kila m̃ana yumã, naña naga mapila kana kemraþe pito tano tol yo m̃arera tano. <sup>25</sup> Ana siraunia, yua pimi, a womie la mlau keviu, a lagi miyui, m̃e yumã nene, ana yumã nene pe mloru re poli, komin naña yaru nene pisirlua ruru m̃ana yumã nene e yo m̃arera naña.

<sup>26</sup> “Ana la naña pe ataveve ruru re sa naña nepian amiun rui, la sane yaru tai naña kiena sitomena piowa ga, ana pogos naña kila m̃ana yumã, kililinaria kana kemraþe lala su ga metava e none. <sup>27</sup> A siraunia, pupia yua kove, a womie la mlau keviu, a lagi miyui, m̃e yumã nene, ana yumã nene mloru. A pogos naña mloru, yumãena kiena ne yar nene pimi piowa make nenaga.”

*Amilan manene Yesu kiena visena nene þan wa*

<sup>28</sup> Siraun naña Yesu þisin kiena visena la nene, yeririna la amilan paþisi, <sup>29</sup> komin naña la apisuvevea sane kiena visena na pe sa re visena kiena ne kiela navianena navisaluaen la poli, ana kiena visena la urmi paþisi, a naga sumã miur ke kiela sitomena lala, a naga pisawal visena sane yaru tai naña nam̃areraena teke e naga.

## 8

*Yesu kila ruru yaru tai naña leperosi se yepena, miania*

*Mak 1:40-45; Luk 15:12-16*

<sup>1</sup> Yesu mligan kunus keviu naña naga pian ke yaru la ea, naga pitomi tano, ana yaru la mokliu naña atavevea. <sup>2</sup> Ana yaru tai naña leperosi sike e yepena pimi puna, ana kinai tano pania piunia, pisape “!Suře! In na nemlelaga e ko nesape ko na okilia okila ruru inu wo ga, ana visae ko okekara, sineun nesape neviun tan ko vena okila van inu ve sanene.”

<sup>3</sup> Ana Yesu pe maraun re yaru naña poli vanon kiena maiena nene, ana puarar naga e limana, pisape “Ee, inu sineunia. Poga ga, nesape yepema ikiki.” Ana veraga ga yepena miania, leperosi nene pisi ea. <sup>4</sup> Ana Yesu pisa pania, pisape “Omloge ke ne, ovano ve ovisawal re suri nene va yaru lala wa, ana nanagane ga ne ova okom puna yaru wa vena naga kilia visuveveli yepema. Pisi na, monar ova okila lotuena va Ntewa, a okila mēna kuřařaena nene naña Mosis pisa sape yaru monar kila vanon suri na sanene, ana siraun naga nene, yaru wa nene naga kilia visawal visave leperosi nene pisi rui.”

*Yesu kila yaru naña yepena komřasia mare pimi po*

*Luk 7:1-10*

<sup>5</sup> Ana pogos naña Yesu pa loyuma garu pulku-mali naña Kapeneam, yaru keviu tai kiena ne li na mara lala nae Rom pimi puna, tagi pania, <sup>6</sup> pisape “Suře, yaru na kilaen kiau yumaena tai

mloru m̃eke e m̃ana tog nanagane garu m̃au. Tasnena lepas kom̃pas mare, ana naga mloge ke piowa pãisi.”

<sup>7</sup> Ana Yesu pisa pania, pisape “Ita, tevano. Pisi na inu nekila ruru si naga loge wo.”

<sup>8</sup> Ana yer̃kawa na kilaen mara nãpa pisatãnea, pisape “Sũpe, in na pe nepe yaru wo re tai nãpa netorokin nãpa ko oimi m̃au loyumã poli, sane in na pe nepe yere Yu re poli, ana visae okilia ovisa ga visena tai, nekilia nesape p̃isi na kiau yaru nene kilia loge wo narui. <sup>9</sup> In na nekilia nãpa nesape p̃isi na monar ve sanene, vanon nekilia nesape kionã visena nam̃areraena keviu sike ea. Naga sane yaru na mara la nãpa asike vatanon inu, nãpa monar alogear kiau visena. Visae nevisavenua ‘Ovano,’ monar tai vano, pona nevisave ‘Oimi,’ monar naga imi, pona nevisave ‘Okila ve sa nene,’ ana naga monar kila. A inu m̃ena ga monar nekila ya nãpa kiau yaru keviu pisa pan inu. Ana nemlelaga nãpa visae ko ovisa ga suri tai, ana monar ve sa nene.”

<sup>10</sup> Ana pogos nãpa Yesu mloge kiena visena nene, kila naga milan pãisi a kekara m̃ena ga pãisi. Ana pisa pan p̃ina la nãpa ataveve ke ne, pisape “Nevisa suri na lelaga van amiu, in na pe nom̃al re nena ga yaru nae Israel tai nãpa naga piawa m̃arera e inu sane yaru nene poli.

<sup>11</sup> Inu nevisawal van amiu sanini, ve le Yu re ga la nãpa akilia aimi loyumã e p̃apãgena keviu na legiena maro nene. Peraga, ana yokorena yaru la ve moki ve sa yaru nene e yo tãpena lala

na yomarava nini, naña aimi atotano lele taaga vena akinana amio Epraam, Aisak, a Sekop. Pisi na la nene na asu ruru silaga ve sanene e nasuþenena kiena ne Ntewa ma e peni. <sup>12</sup> Ana le Yu la nene naña Ntewa pio la sumo vena ava loyuma, nanagane la pe amlelaga re e inu poli, ana pisi na Ntewa koven plan la ava e yemalolo vanua, e yo naña yaru la asuma atagi ke ea, akar ke maluela ea.”

<sup>13</sup> Ana Yesu pisa pa yerkawa na kilaen mara naþani, pisape “Ko, okilia ova uma. Pisi na vim van ko ve sa naña kioma nalelagaena piawa ke marera ea.” A e ke e pog nene narui, ana yepen yaru na yumaena nene pimi po sina.

*Yesu kila riru anenane wona Pita  
Mak 1:29-34; Luk 4:38-41*

<sup>14</sup> Ana pogos naña Yesu sike garu Kapeneam wa, ana naga pa loyuma mana Pita, naga pisu anenane wona Pita naga miava karia, meke e mana tog. <sup>15</sup> Ana Yesu mligan limana te limana ne sira nene, ana miava naña pisi, ana naga sunalu, mla kinanena pa Yesu.

<sup>16</sup> A yepekilavi e legiena nene, yaru la apure yaru la moki naña apimi puna Yesu, yaru la naña yermare lala asike e la. Ana naga mene plan yermare la nene e ga e kiena visena, a naga kila ruru mana ga namaiena lala apimi apo sina.

<sup>17</sup> Suri la nene pimi kakate vena kila visena kiena ne Navisawalena Aisea imi ve lelaga, naña naga pisape

*“Naga lalua kieta maiena lala,*



*a naga kuslua kieta yepe lalaea lala.” Ais  
53:4*

*Yaru la lua sinelan asape ataveve Yesu*

*Luk 9:57-62*

<sup>18</sup> E legiena tañena sina ga tai, Yesu sumã amio yaru la mokliu naña la amiervivi naga telivi piora, ana naga sinenan pisape yali vetan la, ana naga pisa pan kiena nalogena lala, pisape “! Aulai! Ita, teva e lepas nen lapa nene lepas ãasa.”

<sup>19</sup> Ana asun ke asape avano, ana navianena navisaluaena tai naga pimi, pisaar pa Yesu, pisape “Navianena, ãisi na netaveve ko, e nape naña ko okom ea ana inu netaveve ko teva ea.”

<sup>20</sup> Ana Yesu pisatamãea, pisape “Lokul tetan lala, la mñala pulus na monena la asumã ga, a manu mñena ga lala mñala ponovi la asumã ga. Ana inu, Narina ne Yeririna na, pe mñau yo re tai naña neva nomomalio e poli. Visae ko okekaran mñena ga malena na sanene, ko okilia oimi.”

<sup>21</sup> E ke e pogos nene, ana nalogena tañena kiena ne Yesu tai pisa pania, pisape “Awis Mara, otañan inu neva nevisuar ke ne ata sumo wa, a visae pogos naña mare pae, ãisi na neimi netaveve ko ga na wa.”

<sup>22</sup> Ana Yesu pisa pania, pisape “Ko oimi otaveve inu ga. Ko oligan yeririna la naña ninula mare rui, vena la asin kiela yaru la naña la amare.”

*Yesu pisi pa lagi amio sive*

*Mak 5:1-20; Luk 8:26-39*

<sup>23</sup> Ana Yesu amio kiena nalogena lala apitomi atol lapa nene narui, ana aãiyu apa e waa tai e yo nene. <sup>24</sup> Ana apa li ga metava pe piavi

re poli, pupia lagi tai molue, miyui kila pupia lapa nañani kululu keviu pañisi, ana kila waa nañani siar sape talilu. Ana Yesu ñeke e waa, naga momalio ruru ga ñeke na, <sup>25</sup> ana la apito akilañegea, apisape “!Suñe, opisu ke ne! Lavisi tetalilu narui, monar otamalia ita.”

<sup>26</sup> Ana Yesu pisa pan la, pisape “!Ei! ?Amaraun ke ya ne sanene? Aa, amiu na pe apiawa re nena ñarera e kiau ñareraena poli.” Ana naga suñalu, pisaluñar lagi, pisape ve yui re sina, a pisaluñar sive, pisape malumu. Ana pog pimi po, amalumu.

<sup>27</sup> Ana pogos naña nalogena la apisu yo pimi pa ruru make nenaga po sanene, ana amilan pañisi, apisape “!Suwala! Yaru nene na pisa ga sanene, ana lagi amio sive lalua amlogear naga. !Yaru nene na pe yaru re nene poli yo!”

*Yesu pile plan yermare lala petan yaru lua*

*Mak 5:1-20; Luk 8:26-39*

<sup>28</sup> Ana pogos naña Yesu pimi tol lapa nene lepas ñasa, naga pa gare yo kiena ne le Katara lala. E yo nene, yaru la lua amolue e puluve ñana ne yaru mare lala, ana la lua añal Yesu. Ana la lua nene na yermare lala asike e la, ana la lua ape wowe asirag pañisi, ana kila yaru la amaraun vaen e mrapa nene pañisi. <sup>29</sup> Ana pogos naña apisu Yesu, lalua apio manene pañisi, apisape “?Ko Narina ne Ntewa, kioma ya naña teke e imimi? ?Ko opimin osape ola nakoena van imimi naña pe kana pog re poli wa, ne?”

<sup>30</sup> Ana e yo nene, na ñegas nen nompui tai asumã akolkol ña porotano lavis ga, <sup>31</sup> ana

yermare la nene atagi, apisa pa Yesu, asape “Visae om̃ene plan imimi, awis oligan imimi mava e los nen nompui la ne asike ne.”

<sup>32</sup> Ana naga pisa pan la, pisape “Avano.” Ana la amolue petan lalua nene, apa e los nen nompui la nañani. Ana pogos ke nene, nompui la nañani akiriri apano, apitove e yeparpasa tai, amloloru apito tano e pupia lapa nene, atalilu apito akokovio ea.

<sup>33</sup> Ana yaru na visuaren nompui lala apureure apa e kiela pulkumali, apisawal suri la naña kakate, a ya naña tol lalua naña yermare la ase lalua sumo. <sup>34</sup> Ana pogos ke nene, yeririna la punu ga naña e kiela pulkumali nene apimi apisu Yesu. A pogos naña apisu naga, apisi m̃arera pania apisape naga ure vetan kiela yo.

## 9

*Yesu kilia viewo mlamulena viowa  
Mak 2:1-12; Luk 5:17-26*

<sup>1</sup> Ana Yesu p̃asupe sina amio kiena nalogena lala, amiyai ke ga e waa nañani, ana akusro si lapa keviu nañani, ana ãpasupe apimi e kiena pulkumali naña Kapeneam. <sup>2</sup> Ana yaru lañasia akus namaiena tai pimi puna naña naga tasnena kom̃pas mare, naga mloru ga m̃eke e m̃ana tog. Ana pogos naña Yesu pisu kiela nalelagaena m̃arera asape Ntewa naga p̃isi na iila namaiena nene, naga pisa pania pisape “Naruu, ve sinem̃a kona re. Kiom̃a mlamulena piowa lala, nepiewo p̃isi rui.”

<sup>3</sup> Ana e pogos nene navianena navisaluaen laṗasia asuṃa ga, ana amloge ke visena kiena ne Yesu nene. Ana verakorena la apismumunia, apisape “Yaru nene naga ṗarnena kare kia wa kiena ne Ntewa rui. Naga pisa ke sanene sa ga naga Ntewa rui.”

<sup>4</sup> Ana Yesu kilia ṃa kiela sitomena lala, ana pisape “?Vanon ya ne kiamiu sitomena la pulen sitomena viowa sanene? <sup>5</sup> Visae nevisa sanini va yaru nene, nevisavenua ‘Inu nepiewo kioṃa mlamulena viowa,’ pona nevisa nevisavenua ‘Osuṃalu oyali,’ e visena lua nene, tai ṃareran na visaena, a tai meme ga navisaena. Visena naṗa pisapenua ‘Osuṃalu oyali,’ naga ṃarera, vanon naṗa yaru la apisu kilale asape yaru nene suṃalu pona ve suṃalu re. <sup>6</sup> Ana ṗisi na nekila suri tai naṗa amiu asitom sane Ntewa naga ga taaga kilia kila, komin naṗa sineun nesape nekila merarava van amiu naṗa sane Narina ne Yeririna naga torokin naṗa viewo mlamulena viowa lala e yomarava nini.” Ana Yesu pisa pan namaiena nene, pisa pisape “Osuṃalu osilowar moṃa tog, oyali, ova moṃa.” <sup>7</sup> Ana yaru naṗani suṃalu, mial pa ṃana.

<sup>8</sup> Ana ṗina na yeririna la naṗa apisu suri nene amarau, a amieluar ṃena ga Ntewa vanon naṗa naga taṃan naṃareraena nene pisape yaru tai kilia kila ve sanene.

*Yesu pio Matiu pimi taveve naga  
Mak 2:13-17; Luk 5:27-32*

<sup>9</sup> Ana Yesu mligan yo nene, naga mial ga pa ṃa sane. Naga pa ṃaga, ana ṃal inu neteke tano

e lelen kiau yuũaena. Kiau yuũaena e pogos nene, nawarpoloen kilavaru na takis. Ana Yesu pio inu, pisape “Matiu, oimi otaveve inu.” Ana nesuũaalu veraga, netaveve Yesu.

<sup>10</sup> Siraunia, Yesu pimi kinana e mũau yuũa, ana e pogos nene nepure li nawarpoloen takis la moki, amio yaru viowa tařena lala, apimi atotano, vena akilia akinana veraga amio Yesu a kiena nalogena lala. <sup>11</sup> Ana le Varasi lařasa asike e pogos nene, ana apisu nařa Yesu teke veraga amio yaru la ne sanene, ana apiun tan kiena nalogena lala, asape “?Komin ya ne kiamiu navianena kinana ke veraga amio yaru viowa la ne sanene?”

<sup>12</sup> Ana Yesu mloge kiela visena nene, ana naga pisataře la, pisape “Yaru la nařa yepela poga ga, pe sinelan re yaru na kilaruruen maiena poli, ana la ga nařa ařar maiena, ana la sinelania. <sup>13</sup> Popon amiu asitomyuli kinas nen visena tai nařa teke e Visena Wa, nařa Ntewa pisa, pisape ‘In na pe sineun re kiamiu kuřařaena la poli, ana sineun ga nasineyeena se kiamiu malena lala.’

In na pe nepimin re nařa nevio yaru la nařa asitom asape la amesmesu řisi rui, peraga, inu na nepimin ga nesape nevio yaru viowa lala vena ataveve inu.”

*Naviunena tai e lepas na monsilena*

*Mak 2:18-22; Luk 5:33-39*

<sup>14</sup> Siraun suri nene, ana nalogena lařasia kiena ne Yoane Nakeena apimi pu Yesu, apiun tania,

asape “Sinemimin mesape ovisawal suri nene van imimi. ?Imimi na memonsilu ga silaga vena mekila leniena, a Varasi mēna ga lala akila ke sanene, ana vanon ya ne kionā nalogena lala pe akila re poli?”

<sup>15</sup> Ana Yesu pisatamē la, pisayu naga amio kiena nalogena lala, sane la akekara paṽisi pogos naṽa naga sike amio la, ana ṽisi na sinela monar viowa siraun pogos naṽa naga ure matan la, ana pisape “?Pogos naṽa yaru naṽa talopa naga sike e ṽaṽagena amio kiena erau lala wa, amiu asitom asape akilia ataginia? Peraga. Ana e pogos tai, visae nasinekar kiena ne yaru nene laṽasia aimi aurelua naga vetan kiena erau lala, e pogos nene narui ṽisi na kiena erau lala la akilia amonsilu ga vanon nasineyeena.”

*Sur viu amio sur marua*

<sup>16</sup> Pelaga na monsilena nene, naga ṽelaga marua na lotuena kiena ne le Yu lala, ana Yesu sinenan pisape kila meraravan van la sape ṽelaga marua la ne sanene, la taṽatete akilia asikolia amio suri viu la naṽa naga pian la ke ea, ana naga pisa ṽakaiwa tai e lepas nene pan la, pisape “Taṽatete ola kinakina kulmrae tai naṽa pe urviu ana osuluwo ruru pulus naṽa teke e kulsota marua. Vanon naṽa kinakina kulmrae viu nene kilia kilaroro kulsota marua nene komṽasa, ana kana pulus kilia vim ve keviu la sane.

<sup>17</sup> “Ana taṽatete okonkonkia kuruta na munena naṽa sirpup pava ke ea wa, vito e kulus nen nani naṽa pe urmarua, naṽa akonkonkia kuruta na munena pito ea yam moki rui. Ana visae

akila sanene, kuruta na munena nene lapa e kulus nen nani nene, ana yukuswinia na m̄apoa, ana kuruta namunena nañani lau, ana pias nene naga m̄ena viowa. Ana kuruta viu monar okonkononia va e pias viu, naña m̄arera ruru po, ana okilia oligan ruru mom̄a kuruta na munena nene mom̄a ga.”

*Yesu kila ruru sira kawa tai amio nin sira m̄ee tai*

*Mak 5:21-43; Luk 8:40-56*

<sup>18</sup> Ana pogos naña Yesu pisayu ke pa nalogena kiena ne Yoane la sanene, ana yaru keviu nalotena kiena ne le Yu lala pimi lavisi, kinai pito tanon Yesu, tagi pania, pisape “!Awee! Kiau lom̄earu mare ga na wa, ana sineun nesape oimi, oligan lumom̄a towar naga, vena naga kiena malena imi sina.” <sup>19</sup> Ana Yesu sum̄alu, taveve yaru nene, naga amio kiena nalogena lala apano.

<sup>20-21</sup> Ana pogos naña Yesu pa ke sanene, ana sira tai sum̄a ga naña maiena na kupario teke e naga legiena punu ga pano-o pimi tol kas lualima taaga pa lua rui. Ana naga pisu naña Yesu mial pimi, naga sitom sape “Visae netol ga m̄ana kulsaket, vena kiau maiena p̄isi.” Ana naga kom rana Yesu, pimi tol ga m̄ana isinen kulsaket.

<sup>22</sup> Ana Yesu pilon veraga, pisu sira nañani, pisa pania, pisape “Auia, ve sinem̄a kona re. Kiom̄a naviawaena e inu kila ko owo sina.” Ana e ke e pogos nene, maiena nañani p̄isi e sira nene.

<sup>23</sup> Ana pogos naña Yesu pa tol yum̄a m̄ana yerkawa nene, naga pisu yaru la sinela mie manene la sira m̄ee naña mare m̄eke ne, ana asum̄a atagi a amiyaun ke yauena na marena

lala. <sup>24</sup> Ana naga pisi pan la, pisape “Amiu amolue, ayal tetai sina. Sira m̃ee nene na pe mare re nene poli, naga momalio ga ne.” Ana la naṣani apitalia kare ga naga.

<sup>25</sup> Ana amligan plan yaru la nene apa vanua, ana Yesu pa loyuṃa. Naga pa tarar limana sira m̃ee nene, ana naga sumalu, mali sina. <sup>26</sup> Ana amlologon suri nene pa e yo make ga, kalo make yo punu ga e lepas nene.

*Yesu kila ruru kilamaraṣala lua*

<sup>27</sup> Ana Yesu molue petan yuṃa m̃ana yerkawa nene, a pogos naṣa naga mial ke pano, ana kilamara ṣala la lua atavevea, la asuṃa apio ke, asapenua “Ko lus kiena ne Tepet, ko Navisaarena, awis ko sinema ye imimi lua nini ka.”

<sup>28</sup> Ana Yesu mial pano, pa pa loyuṃa e yuṃa tai, ana kilamara ṣala la lua naṣani apimi puna. Ana Yesu piun tan la luoka, pisape “?Amiu luoka ga amlelaga e inu, asape nekilia nekila ruru amiu sanene?”

Lalua apisatamea, apisape “Ee Suṣe, imimi memlelaga.”

<sup>29</sup> Ana Yesu mligan limana te kilamarala, pisape “Pisi na ve sa naṣa nalelagaena kiamiu amlua.” <sup>30</sup> Ana lalua kilamarala pimi po ke e pogos nene. Ana Yesu pialuṣar marera pan la luoka, pisape “Pisi na amiu lua ve avisawal re suri nene va yaru lala.” <sup>31</sup> Ana lalua amolue petania, ana lalua amlologon suri naṣa Yesu kila pan la ne, pano-o kalo make yo la punu ga e lepas nene.

*Yesu pilelua yermare petan puru tai*



<sup>32</sup> Ana pogos naña lalua nene amligan Yesu apano, yaru tañena lala aņure yaru tai pimi puna. Yaru nene pe puru, vanon yermare sike e naga. <sup>33</sup> Ana Yesu pilelua yermare nene, ana puru naña pisi ruru narui, ana yeririna lala sinela kurkur paņisi, apisape “Suwala, pe tepisuli re suri tai e Israel sanene poli wa, ãane ga.”

<sup>34</sup> Ana Varasi lala apisayu Yesu, apismumunia, apisape “Yeririna nene pile plan ke ga yermare lala e naņareraena naña suņe kiena ne yermare lala naga mla pania.”

### *Yesu sinen mie yeririna lala*

<sup>35</sup> Ana Yesu suņa mialili ke pulkumali lala, a pian ke yeririna lala e kiela yuņa na lotuena lala. Naga pisawal ke nalologena wo nasuņenena kiena ne Ntewa, a naga suņa kila ruru ke namaiena lala a la naña tasnela la piowa. <sup>36</sup> Ana pogos naña suņa mialili ke yaru la sanene, naga suņa pisu ãina lala, naga pisu la sa naña kiela sitomena la pule paņisi, a suri la piowa pan la e kiela malena lala, ana naga sinena mie la paņisi, komin naña asuņa ga sa ga nene sane sipsip la naña pe yaru navisuar laen re poli, la aminue asape ãisi na la ave sanape narui. <sup>37</sup> Ana naga pisa pan kiena nalogena lala, pisape “Lelaga, kinanena moki paņisi naña marua sike lokove, ana yaru la lua la ga naña asuņa aņar ke pitomi uņa. <sup>38</sup> Ana amiu na, monar aviun manene tan suņe na lokove nene, vena naga ligan plan re si

yaru laṗasia la avano vena awar kana kinanena la nene vim.”

## 10

*Li nalogena kiena ne Yesu lala*

*Mak 3:13-19; Luk 6:12-16*

<sup>1</sup> Ana Yesu pio kiena nalogena la lualima taaga pa lua pisape aimi puna. Ana la apimi, ana naga pisi ruru pan la ṗisi, a naga mligan plan la apano vena akilia aṗene plan ninuna viowa e yeririna lala, a vena akilia akila ruru namaiena lala a nainanena viowa taṗena lala.<sup>2</sup> Ana kia kiena ne li nalologena ne la nanini narui:

nasumo, Saemon, naṗa apio asape Pita, naṗa naga pe kiela yerkawa, amio wenla, naṗa Antru,

Semes, naṗa narina ne Sepeti, amio wenla naṗa Yoane,

<sup>3</sup> Pilip,

Patalomiu,

Tomñas,

inu Matiu, in na nepe yaru na waren takis,

Semes, naṗa naga narina ne Alpeas,

Tateas,

<sup>4</sup> Saemon, naṗa naga kila manene politik sape kuan plan le Rom lala,

a Sutas nae Kariot, naṗa siraunia, naga pielua Yesu.

*Yesu mligan plan kiena li nalologena lala*

*Mak 6:7-13; Luk 9:1-6*

<sup>5</sup> Ana Yesu pisi ruru pa la lualima taaga pa lua nene, a siraunia naga mligan plan la apano.

Visena wo la nene naña naga pisa pan la nanini, naña naga pisape “Amiu na ve ava re puna ne la naña pe ape le Yu re la poli, a amiu ve ava re e pulkumali nae Samaria lala wa. <sup>6</sup> Amiu na avanon ga sipsip nae Israel la naña akilalu mrapa. <sup>7</sup> Ana pogos naña avanon la nene, ana monar alogon, avisave ‘!Nasuñenena kiena ne Ntewa pimi ke pun ita narui!’ <sup>8</sup> Ana amiu monar akila ruru namaiena lala, a monar akila namarena lala aimi amal sina. A la naña leperosi sike e yepela, monar akila yepela la imi ikiki sina, a amiu monar añaene plan yermare e yaru lala. Ana yuñaena la nene, ñisi na ayuñaen e namareraena tai naña amla korenan ga, ana amiu monar ala korenan lein ga va yaru lala. <sup>9</sup> A amiu na ve awar re kiamiu kilavaru lañasia e kiamiu pultaga lala, <sup>10</sup> a ve awar re ñena kiamiu karo tai, naña akon ñamiu kulsota tañena lala, a kiamiu kulus nen lamiu tañena lala se ea, a ve awar re ñena kiamiu plasgai vano. Yaru la naña akila yuñaena wo la ne sane amiu, ñisi yaru tañena la naña la amiyuñae pan la, monar avisuar ruru la vanonia.”

<sup>11</sup> Ana Yesu pisa ñena ga, pisape “Pogos naña amiu avano-o atol pulkumali tai, ana monar akale yaru tai naña kekanan naña were amiu ava ñana, ana asuña ga ñana, vano vano-o tol pogos naña amiu avatani si pulkumali nañani. <sup>12</sup> Ana pogos naña avano asike mratava ñana yaru nene, ana monar atalopan ruru la, avisavenua ‘Sunñare sike amio amiu.’ <sup>13</sup> A visae mratava nene kila wo van amiu, ana sunñare

naŭa apisa ana ĥisi na sike amio la, a visae la akila viowa ga van amiu, ĥisi na sumare nene wasuĥe ke sina ga, vim van amiu. <sup>14</sup> Ana visae yaru laĥasia yepela mavin were amiuena ava mĥala umĥa, pona yepela mavin loge amiuena, ana popon aligan ruru mratava nene pona pulkumali nene mĥeke na. Ana pogos naŭa amolue e yo nene, amiu atanvan puluyavi nae e yo nene naŭa sike e lamiu, sane kiamiu visena mĥarera tai ne pan la ne, pisape ĥisi na la akus nakoena naŭa mesmesun ga kiela ĥelaga viowa la nene. <sup>15</sup> Lelaga naŭa nevisa meraravan van amiu, e legiena na liĥereena, ana la nene na mĥarera la van la, taulu naŭa Ntewa mliĥere le Sotom amio le Komora lala nanua sumo.”

*Pisi na yaru la amĥene nalogena kiena ne Yesu lala*

*Mak 13:9-13; Luk 21:12-17*

<sup>16</sup> Ana Yesu pisa pan la, pisape “Amiu asitom ruru wo. Inu neligan plan amiu avano, a amiu ala limamiu ga ava sanene, amiu na sa ga sipsip la naŭa asike likan ĥegas nen lokul tetan lala. Visae sanene, ana monar ave manmarua ruru wo, a amiu monar amomĥau ruruia. <sup>17</sup> Ana monar avisuar ruru amiu, vanon naŭa saĥisi yaru lala aure amiu ava kiela kumali, a e kiela yuĥa na leniena lala, vena avis van amiu, ana ĥisi na ala nakoena van amiu, a avisuaria saĥisi awe amiu. <sup>18</sup> Ana ĥisi na aligan amiu ava asumĥalu ase marana ne yerkaŭa na purvanua

---

**10:14** Yumĥaena 13:51    **10:15** Mat 11:24    **10:15** Luk 10:4-12

**10:16** Luk 10:3    **10:17** Mak 13:9-11; Luk 12:11,12, 21:12-15

vanon ga naña amiu ape kiau nalogena lala, a e pogos nene amiu akilia avisawal kiamiu nalelagaena e inu e maran la nene a e marana ne la naña pe amlelaga re e Ntewa poli. <sup>19</sup> Ana pogos naña la nene aimi aure amiu, ana amiu na ve asitom manene re avisave ‘?Pisi na neviša sanape ne, a nevisa ya ne van la ne?’ vanon naña p̃isi na Ninuna Wa naga la visena na visawalena van amiu naña avisa, mesmesun e pogos na visena. <sup>20</sup> A pogos naña amiu avis, ana pe kiamiu visena re nene poli, ana visena kiena ne Ninuna ne Arimamiu naña naga visi e amiu.

<sup>21</sup> “E pogos m̃arera nene, p̃isi na yaru kilia tañan yaru viowa tañena la nene la aimi aurelua wenla ruru naapo pona narina ruru naapo, vena awe moñar la amarmare, nanene komin naña la nene amlelaga e inu. A nisisi lala la m̃ena ga akilia asum̃alu avisawal anela lala a arimala lala naña la amlelaga e inu, vena la m̃ena ga amare sanene. <sup>22</sup> Ana p̃isi na yaru lala ve sinelan amiu re sina, akawe kiamiu visena silaga, vanon kiau kia teke e amiu, a yaru naña sum̃alar m̃arera sum̃a ga vano-o pog m̃arera nene p̃isi, p̃isi na Ntewa tamalia naga. <sup>23</sup> Ana pogos naña la asum̃a añene manene amiu la e pulkumali tai, amiu monar aure ava e pulkumali tañena, a visae añene amiu ke sina ga e yo nene, amiu monar aure sina. Ana nevisa ruru van amiu, nesape kiamiu yuñena nene e pulkumali nae Israel lala, p̃isi na ve p̃isi ruru re wa ana Narina ne Yeririna vim warpoyo ke sina ga.”

---

**10:21** Mak 13:12; Luk 21:16  
21:17, Mat 24:13; Mak 13:13

**10:22** Mat 24:9; Mak 13:13; Luk

24 Ana Yesu pisa, pisape “Naloge-na, naga pe to re metavan kiena navianena poli, a yaru na yumãena, naga pe to re m̃ena metavan kiena supe poli. Ve sanene, amiu na ve asitom re avisave p̃isi na taṓatete m̃arera van amiu pogos tai, 25 komin p̃elaga m̃arera naṓa la akila va navianena, p̃isi na la akila ke m̃ena ga va nalogena, a suri m̃arera la naṓa supe naga kusia, p̃isi na kiena yeririna naga m̃ena ga monar tolia. Sa naṓa yaru la apio kare inu, naṓa in na nepe yerkawa e m̃au mratava, apisape in na Pielsipel, naṓa naga pe supe kiena ne yermare lala, p̃isi na la akilia avio kare amiu la sane na wa, amiu la naṓa ape kiau e mratava taaga.”

*Nalogena kiena ne Yesu taṓatete maraun yaru lala*

*Luk 12:2-7*

26 Ana Yesu pisape “Vanon naṓa p̃isi na avis viowa van amiu ve sa ke ga naṓa apisi piowa pan inu, ana amiu ve amaraun la re. Suri viowa la punu ga naṓa yaru lala akila vinaunia, pona apisawaniga, p̃isi na vim kakate e yometava na wa, vena yaru la punu ga akilia. 27 A amiu m̃ena ga, suri wo la naṓa nesuṓa nepisa ke pan amiu e yemalolo, amiu monar avisawal ke sina ga e yomerarava, a suri la naṓa nesuṓa nepraggon ke ga e kiligamiu, amiu na monar avion manene va metava e maran yeririna lala, vena yar punu ga akilia aloge.

---

**10:24** Luk 6:40, Yoan 13:16, 15:20    **10:25** Mat 9:34, 12:24; Mak 3:22; Luk 11:15    **10:26** Mak 4:22; Luk 8:17

<sup>28</sup> “Ana amiu na ve amaraun re yaru la naþa akilia aweñar tasnemiū mare, komin naþa la taþatete aweñar ninumiū mare. Ana amiu na monar amaraun ga Ntewa, naþa naga kilia kilalele kare tasnemiū amiō ninumiū luwoka e lele naloge viowaena. <sup>29</sup> Amiu asitoñalia. Ninlaea la ne akaka ke la ne, la moki paþisi, sa ga kororaki ga, a la asuñã aþiliwilin ke lua e narin kilavaru ga tai, ana visae tai loru vitove tano e porotano, ana Arimamiū naga kilia ña ga. <sup>30</sup> A vilþarimiū ñena ga moki paþisi, ana Ntewa naga poloar make ga peve taaga, naga kilia la ñaga. <sup>31</sup> Sanene, ana amiu ve amarau re, vanon naþa Ntewa pisu amiu na po manenea taulu ninlaea la nene, ana þisi na naga kilia visuar ruru amiu e suri punu ga e kiamiū malena.”

*Yaru naþa naga pisawal pisape naga pe kiena ne Yesu*

*Luk 12:8-9*

<sup>32</sup> Ana Yesu pisa pisape “Yaru naþa naga visawal e marana ne yaru lala visave naga pe kiau yeririna tai, þisi na inu ñena ga, nevisawal naga e marana ne Ata naþa ma e peni, nevisave yaru nene pe kiau. <sup>33</sup> Ana yaru naþa visawal e marana ne yaru lala visave naga pe pe kiau yeririna re poli, ana inu ñena ga nevisawal e marana ne Ata naþa ma e peni, nevisave yaru nene naga pe pe kiau yeririna re poli.”

*Yesu naga pe purþes nen kaween visena*

*Luk 12:51-53*

<sup>34</sup> Ana Yesu pisape “Amiu na ve asitom re avisave inu nepimin naña nekila sane pupia suñare pimi sike e yomarava nini. Peraga, inu pe nepimin re ga neligan suñare e poli, ana inu nepimi nemio playu na kilaen mara tai, naña p̃isi na yaru la aveveyu la, a akila mara van la vanon inu. <sup>35</sup> In na nepimin nesape nekila sane p̃isi na yaru m̃ee lala akawe visena kiena ne arimala lala, a sira m̃ee lala akawe visena kiena ne anela lala, a sira la naña atalopa ga na wa, p̃isi na akawe visena kiena ne anela simem lala. <sup>36</sup> Pisi na la naña sinela kari manene kiau nalogena lala, naga pe yaru tañena re la poli, yaru na mratava ga m̃ala lala.”

*Yesu naga sumo e malena kiena ne kiena nalogena lala*

*Luk 14:26-27*

<sup>37</sup> Ana Yesu pisa, pisape “Yaru naña sitom manene la arimana, pona anena, pona narina, taulu naña naga sitom inu, yaru nene naga mesmesun re imi sane ve kiau nalogena poli. <sup>38</sup> Ana visae yaru tai naña ve kus re kiena laktorovia taveve inu, sane naga pe tañan re naga loge viowa vanon inu poli, yaru nene tañatete imi ve kiau nalogena. <sup>39</sup> Visae yaru tai naña naga sitom manene la kiena malena, yaru nene naga p̃isi na kilalu kiena malena nene. A visae kiau nalogena tai naga kilalu kiena malena vanon inu, p̃isi na naga tol malena naña tañatete p̃isi.”



*La naþa avisuar ruru nalogena lala, þisi na la atol kiela nalaena*

*Mak 9:41*

<sup>40</sup> A Yesu pisa, pisape “Visae yaru tai naþa were amiu ava m̃ana loyuṃa, nanene sa ga naþa þere inu ke ga nepa m̃ana loyuṃa ne. A visae yaru tai were inu neva m̃ana loyuṃa, ana nanene sa ga naþa pere ke ga naga naþa naga mligan inu nepimi, pa ke m̃ana loyuṃa. <sup>41</sup> Visae yaru tai were navisawalena tai pona yaru mesmesu tai ne sanene va m̃ana loyuṃa, komin naga kilia ke sape yerkawa nene naga pe yaru wa nayuṃaena kiena ne Ntewa, yoko naga kus ke ga nalaena torokin naþa yoko Ntewa la va kiena yerkawa la nene. <sup>42</sup> A inu nevisa ruru van amiu sanini, visae yaru tai naga la piala na wii manini ve taaga va kiau nalogena tai, naþa naga pe sitom re pisape nalogena nene naga pe yerkawa tai poli, pona yaru tai naþa naga to ga tano, þisi na yaru nene la kiena nalaena tai komin suri wo nene naþa naga kila pa kiau yeririna tai.”

## 11

<sup>1</sup> Ana pogos naþa Yesu pisa ruru pa kiena nalogena la lualima taaga pa lua nene þisi, naga mligan yo nene, ana naga pa e pulkumali nae Kalele lala, vena vian la a lologon van la.

*Nalogena kiena ne Yoane Nakeena lala apimi*

*Luk 7:18-23*

<sup>2</sup> E pogos nene, Yoane Nakeena sike e yuṃa nakoena, a naga mloge ke yuṃaena la naþa

Kristo kila ke ne, ana naga mligan kiena nalogena lañasia, <sup>3</sup> apanon apiun tan Yesu, apisape “?Sanape? ?Ko na yaru nanua apisa ke sumo asape ãisi na yaru keviu tai imin vena ve kieta nasumonena, pona pe naga re nane ko poli, ana imimi na monar mesumãate laa na wa, ãisi na yaru nene imi?”

<sup>4</sup> Ana Yesu pisatamẽ la, pisape “Awasuþe amiu sina, ava ke ga puna ne Yoane, a avisawal vania e suri la naþa amiu apisuia naþa nemiyumãen ke e yo nini, a suri la naþa apisayu inu ke pan amiu, sane suri la naþa Navisawalena Aisea naga pisayu sumo rui, naþa naga pisape:

<sup>5</sup> *‘Kilamaraþala lala, nanagane akirava si rui,  
a yaru la naþa ape lapele a ape laulu, nanagane  
akilia amial po si narui,  
a yaru la naþa leperosi sike e yepela, nanagane  
yepela pimi mian ruru si narui,  
a yaru la naþa ape kiligapoþe, nanagane amloge  
si suri narui,  
a yaru la naþa amare, nanagane amal si rui,  
a yaru la naþa limala korena ga, nanagane  
nemlologon ke Nalologena Wo pan la rui.’*  
*Ais 35:5,6*

<sup>6</sup> “A amiu avano avisa mñena va Yoane, avisave ‘Yaru naþa pe kiena sitomena pe peve lua li re e inu pogos tai poli, ãisi na navisa ruruena sike e naga.’”

*Yesu pisayu Yoane Nakeena*

*Luk 7:24-30*

<sup>7</sup> Ana pogos naþa nalogena kiena ne Yoane Nakeena lala amolue vena awasuþe sina, Yesu

pisayu Yoane nene pa yaru la naña asike ne, pisape “?Nanua sumo na, pogos naña amiu apa e yokorena nene, amiu na apanon apisu ya? ! In na pe nesitom re naña nesape amiu apanon apisu kiai na yokorena la naña lagi miyuia ana kulkulul luen ga poli! <sup>8</sup> A pe nesitom re mña ga nesape amiu avanon vena avisu yerkawa tai naña naga miyowau ruru po poli, komin yaru la ne sanene ana tařatete ase lele viowa tai sane yokorena nene, ana silaga asike ga e pupia yumña wo mña ne suře kerkeviu lala. <sup>9</sup> ?Peraga, ana in na nesitom ke nesape amiu apanon ke vena avisu navisawalena tai, ne? Ee, ana naga nene na poga ga ne, ana inu nevisa van amiu, yaru nene naña amiu amoluen apa apisu naga, naga to laa metava, taulu navisawalena nasumo lala, <sup>10</sup> komin Ntewa naga pisayu Yoane nene sumo rui e kiena Visena Wa, naña naga pisape

*In na nemligan kiau navisi pimi sumon ko, vena kila ruru kioña mrapa.’* *Mal 3:1*

<sup>11</sup> “Lelaga nevisa van amiu sanini, e yomarava nini, Yoane Nakeena naga to la metavan yaru tařena la punu ga. Ana yeririna la punu ga naña řisi na la ava loyumña e nasuřenena kiena ne Ntewa, vano-o tol kiela yaru naña su maro la garo tano, la punu ga nene la apa la metavan Yoane, naña la awar kiela navisa ruruena kiena ne Ntewa pa laa taulu naga. <sup>12</sup> A siar e pogos naña Yoane Nakeena siar mlologo, pimi tol nanagane, yaru lala asumña akawe ke nasuřenena kiena ne Ntewa, a nasinekar mārera

na kilaen mara lala la m̃ena ga akilali naña atauluia. <sup>13</sup> Nanua sumo manene la, pimi tol pogos kiena ne Yoane, navisawalena lala, a navisaluaena naña Mosis siria, ana la apisayu suri la moki naña kilia kakate sirau. <sup>14</sup> A visae amiu akekaran alelaga e suri la nene naña p̃isi na aṃalivi sirau, ana p̃isi na amiu akilia avisu kilale naña Yoane Nakeena naga pe Elaisa nene, naña la apisaaria sumo rui apisape p̃isi na naga monar wasuṃe sina ga imi. <sup>15</sup> A visae kiligamiu tom̃a ga, popon ayagagon ruru kiau visena la nene.”

*Yesu pisi m̃arera pan kiena teras lala*

*Luk 7:31-35*

<sup>16-19</sup> A Yesu pisi pa laa sane, pisa pisape “?Ana p̃isi na nevisawal visena ya naña kilia tol p̃elaga kiena ne yeririna na nanagane lala? E lepas punu ga naña Ntewa naga kila vena kilali wo van amiu, ana amiu yepemiu mavin ga, amiu apisa kare ga naga vanonia. Komin pogos naña Yoane naga pimi sike ga wa, ana monsilu ga pe kinana re poli vena len, a naga palia m̃ena ga kuruta na munena, pe mun re poli, ana yaru la apisu naga sanene, la apismumun naga, apisape ‘Yaru nene yermare pa e naga.’ A pogos naña Narina ne Yeririna naga pimi sike na, naga kinana ruru ga a mun ruru ga, sa ke ga yaru taṃena lala, ana yaru la apismumun naga, apisa apisape ‘Opisu ke ne, yaru nene naga pe yaru na kinan merorolen paṃisi, a pe yaru na munena m̃ena kuruta na munena paṃisi, a naña naga kiena erau lala na, la

ape yaru nawarpoloen ga takis, a ape yaru viowa ga lala.’

“Komin suri ne nanene narui, inu nepisu amiu yeririna na nanagane lala naña amiu na sa ga sisi lala naña visae asuña akirakirai e yometava na kumali, p̄isi na la asuña aviovion va kiela erau lala, avisave ‘!E, amiu na apiowa nene! Visae imimi mesuña mowe plaḡe, ana amiu ve awol re amio imimi, a visae imimi meyaun yauena na marena, ana amiu ve atagi re amio imimi.’

“Ana suri punu ga naña la amolmolue e namanmaruaena kiena ne Ntewa, sumonia yaru la mokliu naña apisu sane piowa ga, ana siraunia p̄isi na Ntewa naga kila imi merarava sane kiena manmaruaena nene naga mesmesu a naga pe lelaga ruru nenaga.”

*Yesu pisaar ruru pa la naña pe amlelaga re e naga poli*

*Luk 10:13-15*

<sup>20</sup> Ana Yesu pisaar ruru pa yeririna lala na pulkumali la punu ga naña naga kila kile la moki pan la, komin naña apisu kiena suri la nene rui, ana pe apilon la re poli. <sup>21</sup> Naga pisa pisape “Yaru nae Korasin lala, amio yaru nae Petsaeta lala, amiu na akila kare amiu keviu paḡisi wa! Visae le Taea amio le Saeton la nanua sumo, ana la avisuli ga kile la naña amiu apisu p̄isi rui, pona avilopu la nanua sumo yo rui. La pe ape le Yu re poli, ana p̄isi na vera na ayen p̄ililis nen karo, a pona la akuwani posnoyavi e p̄arila yo rui, vena yaru la avisu kilale sane amloge kemua piowa lelaga vanon kiela mlamulena piowa lala.

<sup>22</sup> Inu nevisa mesmesun van amiu, e legiena na liṗereena, ṗisi na kiamiu nakoarena naṗa van amiu taulu naṗa van la nene. <sup>23</sup> !Ana amiu le Kapeneam lala, naṗa amiu asumã aṗarwar amiu, a naṗa sinemiun asape amiu ato manene metava, ana amiu avisuar amiu! Ṗisi na Ntewa koven plan amiu ato tano, ato tano vaṗisi e pulukapi. Visae le Sotom lala la avisuli ga kile la nene naṗa amiu apisuia, vera na la apilopu la rui, a vera na pupia kapi nae ma e peni nene taṗatete kekan kiela yo nene kovio. Ana amiu apisu pa kile la nene rui, amiu pe apilopu amiu re nena poli, <sup>24</sup> nane nevisa van amiu, e legiena na liṗereena, ṗisi na Ntewa naga sinena ye la manenea taulu amiu.”

*Yesu pisa potena pa Arimana*

*Luk 10:21-22*

<sup>25</sup> Ana e pogos nene, Yesu mlen, pisa pisape “!Ata-o, ko ope Suṗe nae ma e peni a Suṗe nae yomarava nini! Nevisa potena van ko, Ata, vanon naṗa ko opian suri la naṗa e inu pan la naṗa kiela sitomena sa ga nisisi lala, ana yaru la naṗa asitom asape ape manmarua a la naṗa asitom asape akilia ruru suria, ko okilawan suri la nene van la. <sup>26</sup> Lelaga, Ata, nanene ve sa ga naṗa ko sinomãnia.”

<sup>27</sup> Ana Yesu pisa m̃ena ga, pisape “Arimau naga mligan make suri la punu ga e lum̃au ṗisi rui. A Arimau naga taaga naga kilia ruru inu, a inu naṗa nepe narina, in ga taaga ga nekilia ruru naga. Inu nemio la naṗa nemligan la vena

nekilologia Arimau van la vena awasinea, ana imimi ga nene mekilia ruru naga naþa naga pe Arimamimi.”

*“Amiu aimi pun inu vena ava ruru amiu”*

<sup>28</sup> Ana Yesu pisa mēna ga, pisape “Amiu punu ga naþa amiu sinemiu mare paþisi vanon naþa amiu asumā aþar ke suri urmi lala e kiamiu malena lala, amiu aimi, amiu aimi pun inu, vena nekilia nekila amiu ava ruru amiu. <sup>29</sup> Amiu alarar kiau visena lala ve sa naþa þeligas tai e kiamiu malena, a amiu alarar kiau þelaga lala, vanon naþa inu na nepe yaru moñau tai, a kiau sitomena to ga tano. Sanene, þisi na amiu alual naþa kiamiu sitomena lala varuruia, <sup>30</sup> vanon naþa kiau vianena lala ameme ga a amelala ga, a suri la naþa þisi na inu nowar van amiu vena amiu awaria, þisi na naga taþatete urmi manene van amiu.”

## 12

*Yesu naga pe suþen Legiena Wa*

*Mak 2:23-28; Luk 6:1-5*

<sup>1</sup> Ana e legiena taþena si tai, naþa naga pe Legiena Wa, Yesu amio kiena nalogena lala amial apano, ana kiela mrapa pa ga likan lokove na wit lala. Amial ke sanene, ana kiena nalogena lala viso kar la, ana apeve plan mras nen wit laþasia vena akania. <sup>2</sup> Asiar akila ke sanene, ana Varasi la þasia asike e yo nene, ana apisula mñaga, ana la apisi pa Yesu, asape “!Ei, opisu ke ne! Kioñā nalogena lala la asumā aþar ke kinanena e lokove sanene, la asumā amiyumñae

ke e Legiena Wa ne, a visae ve sanene, la asu mña akilaro ke kieta navisaluaena ne.”

<sup>3</sup> Ana Yesu pisatamñe la, pisape “?Ana, sanene yo, pona amiu pe apuloli re Tusi Wa pogos tai poli yo, e suri la naña Parin Suñe Tepet naga kila sumo? Naga amio kiena yeririna lala viso kar la pañisi,<sup>4</sup> ana naga pa loyuma e silparpara wa mña Ntewa, ana naga mla kilaparavi wa nene naña Navisaluaena pisape yaru wa ga lala, la akilia akania, ana Tepet mña ga la akania. <sup>5</sup> ? Pona amiu na pe apulo re mña Navisaluaena kiena ne Mosis poli yo, naña e Legiena Wa punu ga, yaru wa lala, la monar ava loyuma e Yuma Wa mña Ntewa vena akila kiela yumaena la ea? Sanene na, la akilaro ke Navisaluaena naña pisaluñar ke sape yaru ve yuma re e Legiena Wa ne, ana Ntewa naga pisu suri nene ana pe sitom re pisape suri viowa tai nene poli. <sup>6</sup> Inu nevisa van amiu, nesape nasuñenena viu tai sike nanagane, naña naga to laa metava taulu navisaluaena na Yuma Wa mña ne Ntewa,<sup>7</sup> ana naga sa naña e Tusi Wa, Ntewa pisa pisape

*‘Inu na pe sineun re kiamiu kuñañaena la poli, ana in na sineun ga ñelaga na sineyeena.’ Ose 6:6*

?Pona amiu na amñue ke kinañ nen visena nene wa? Visae amiu akilia, a pisi na amiu tañatete asuma aliñere kare kiau nalogena la nene naña pe akila re ñelaga viowa tai poli. <sup>8</sup> Narina ne Yeririna, naga ke naña pe suñen Legiena Wa narui.”



*Yesu miyumaen ruru limana yaru tai*  
*Mak 3:1-6; Luk 6:6-11*

<sup>9</sup> Ana Yesu molue e yo nene, mial pano, ana pa loyuma e kiela yuma na lotuena tai. <sup>10</sup> E yo nene, yaru tai sike ea ana naga limana ve tokak, a pe lima mare, ana yaru mēna ga laḡasia naḡa asuma ga sinelan asape alual li suri laḡasia naḡa Yesu naga kila na pe mesmesu re poli yo. Ana yaru la nene apiun tan Yesu, asape “? Sanape, kieta navisaluaena pialuḡar yumaena na kilaruruen tas nen yaru e Legiena Wa, pona pe pialuḡar re poli? !Ovisali suri nene!”

<sup>11</sup> Ana Yesu pisatamea, pisape “Visae yaru tai kiena sipsip ve taaga ga, ana e Legiena Wa tai, kiena sipsip nene va loru vitove e ḡiliḡili tai, amiu asitom asape ḡisi na yaru nene taḡatete va werelua sina? !Ee, ḡisi na ita punu ga monar tekila sanene va kieta suri mali lala! <sup>12</sup> Ana visae mesmesu ga ve sanene e kieta navisaluaena vena teiila kieta sipsip tai sanene e Legiena Wa, ana sanene ita tekilia tekila mēna ga yumaena naiilaen yaru taḡena e Legiena Wa, komin yaru naga po taulu sipsip.”

<sup>13</sup> Ana Yesu pisa pa yaru naḡa limana mare, pisape “Okian mesmesun lumoma.” Ana yaru naḡa kila sane Yesu pisa, kian mesmesun limana, ana limana pimi po sina, sa ke ga limana komḡas.

<sup>14</sup> Ana Varasi la naḡa asike e pogos nene apielue, ana amolue apa vanua, vena avisayu sanape naḡa akilia awemaḡar Yesu mare.

*Yesu naga pe yaru nayumaena kiena ne Ntewa*

15 Ana Yesu kilia m̃a naṗa Varasi lala asape awe naga, ana naga molue e yo nene, amio yeririna la moki naṗa atavevea. Ana naga sum̃a kila ruru ke namaiena lala, 16 ana naga pisi m̃arera pan la, naga pialuṗar la pisape la ve avisayu re naga va yaru taṗena lala. 17 Naga kila sanene vena visena kiena ne Ntewa tai vim ve lelaga, naṗa Navisawalena Aisea pisawal sumo rui, a visena nene pisa sanini, pisape

18 *“Nanene yaru naṗa naga miyuṃae kiau, naṗa in na nemligan lua naga.*

*In na nesitom naga paṗisi, a kiau sitomena kekaran naga paṗisi.*

*Pisi na inu neligan Ninuu van naga, vena naga visawal ṗelaga mesmesu lala va yolai lala na yomarava nini.*

19 *Pisi na naga taṗatete visin sinekar van yaru, pona visi molmolue va ṗisi, a naga taṗatete koven visena ve moki e yo metava.*

20 *Ana naga taṗatete telua kiai naṗa poroli ṗisi rui, a naga taṗatete vilonm̃ar kapi vivaga naṗa lavis mare rui.*

*Naga ṗisi na yuṃae m̃a sanene vano vano-o, tol naṗa ṗelaga mesmesu suṃalu m̃arera taulu nena ṗelaga viowa.*

21 *Ana ṗisi na yolai lala na yomarava nini, la alelaga m̃arera e naga, avisave ṗisi na naga tamalia la.”*

*Ais 42:1-4*

*Apisa apisape Yesu myuṃae e naṃareraena kiena ne Yermare*

*Mak 3:20-30; Luk 11:14-23, 12:10*

<sup>22</sup> Ana yaru lala asumon yaru tai naña yermare pa e naga pimi puna Yesu. Yermare nene kila naga pe kilamara p̄ala, a pe puru m̄ena ga, ana Yesu kila ruru si kilamarana amio pulgona apimi apo sina. <sup>23</sup> Ana yeririna la naña apisu suri nene amilania, a sinela kurkuru pañisi, ana apiun ke sina ga tan la, apisape “!E! ?Yaru nene naga narina ne Tepet naña tesum̄ate ke yo, pona peraga?”

<sup>24</sup> Ana pogos naña Varasi lala amloge visena kiena ne yeririna la nene, ana apielue pañisi, naña apisape “Yaru nene m̄ene plan yermare lala e ga e nam̄areraena kiena ne supe kiena yermare lala, naña Pielsipel, naga tam̄an pania.”

<sup>25</sup> Ana Yesu mlogekilale m̄a kiela sitomena nene, ana naga pisa pan la, pisape “Visae supe tai, kiena yeririna lala aliṗerela, naña laṗasia akawe si visena kiena ne lala komṗasia, ṗisi na supe nene kiena yum̄aena lala monar loloru ga vito sike na; a visae pulkumali tai pona mratava tai, kiela yeririna lala aliṗerela, naña sane laṗasia sinelan asape am̄ene plan si laṗasia, ṗisi na yeririna la nene taṗatete asu ruru pogos tai. <sup>26</sup> ?A sa m̄ena ga nini, visae yermare lala kiena ne Yermare Lego, laṗasia am̄ene plan ke sina ga lala p̄asia, nanene na kana kinasia sane amliṗere la ṗisi narui, ana nasuṗenena kiena ne Yermare Lego naga yoko sum̄alu ve sanape ne? <sup>27</sup> !Ana amiu na apisa ke asape sanene narui, asape in na nesum̄a nem̄ene plan ke yermare taṗena lala e nam̄areraena kiena ne

pupia yermare naña Pelsepel, ana pe sa re nena nene poli! Ana visae ve sa naña amiu apisa, sanape na amiu mēna lañasia naña añene plan ke yermare lala? ?Ane mla nañareraena nene pan la, pona Yermare Lego mēna yo? A popon visae kiamiu nalogena la naña añene plan ke yermare lala, la alogeveveruruli kiamiu visena la nene. <sup>28</sup> Ana peraga, amiu apisa suri nene na pe mesmesu re poli. Inu na neñene plan ke ga yermare lala e nañareraena kiena ne Ninuna Ntewa, ana suri nene na sane nasuñenena kiena ne Ntewa sike likan amiu pñisi rui.

<sup>29</sup> “!Amiu na apisu ke ne! Visae yaru tai sinenan ke pisape va loyuma mēna ne yaru ñarera tai, vena vinaun kiena suria, naga monar war kilika viar ke ne yaru nene sumo wa, pñisi na naga kilia va loyuma ana war plan make kiena suria. Ana in na nekila ke sanene pa yaru ñarera nene naña Yermare Lego.

<sup>30</sup> “Yaru naña pe taveve inu re poli, naga suwo inu ke ne, a yaru naña pe miyumaē re amio inu poli vena moure kiau yeririna lala aimi lele taaga, naga sane suma mēnetetain la ke ne. <sup>31-32</sup> Ana sanene narui, in na nevisa van amiu, mlamulena viowa lala, a visena viowa lala, a visena naña kila kare Narina ne Yeririna, Ntewa naga kilia viewo yaru vanonia, ana yaru naña pisayu kare Ninuna Wa, naña pisa pisape kiena yumaena naga Yermare Lego ga miyumaenia, yaru na sanene, Ntewa tañatete viewo naga

pogos tai, e pogos na tesike e ne, a e pogos naña pimi ke sirau.”

*Purlaki amio kana mrasnena*

*Luk 6:43-45*

<sup>33</sup> A Yesu pisa mēna ga, pisape “Ita tekilia tevisu kilale purlaki lala e mrasnela naña añaia. Purlaki naña kapuru po, naga mrasa mēna ga po, ana purlaki naña piowa ga, p̄ar mēna ga mrasa naña piowa ga. <sup>34</sup> A malena kiena ne yeririna naga sa ke mēna ga nene, naña e losinena naga sane pe purp̄es tai, a visena la naña amolmolue e kiena malena, la sane mras la naña amolmolue ke e purp̄es nene. ?A inu nepisu kiamiu purp̄esia menunu p̄isi rui, ana sanape naña yoko mras wo laḡasia kilia molue kome kiamiu visena lala? ! Amiu na ape lus kiena ne lom̄ara kemua lelaga narui! <sup>35</sup> Yaru naña po, p̄arpolo suri wo lala sike e losinena, ana silaga naga kiena sitomena wo tom̄a ga naña kilia lalua va yaru. Ana yaru viowa, naga sum̄a p̄arpolo suri viowa lala sike e losinena, ana naga taḡatete kilia lalua kiena sitomena wo tai pogos tai.

<sup>36</sup> “Inu sineun nesape amiu akilia naña e legiena na liḡereena, ana yaru la punu ga monar akila navisawalena tai vanon kiela visena viowa la veve taaga naña apisa e kiela malena lala, <sup>37</sup> vanon naña p̄isi na Ntewa naga liḡere kiom̄a malena e ga e kiom̄a visena lala. Nanene, vanon naña kiom̄a visena lala akilia akila ko vena omal, pona akila ko vena owar nakoarena.”

*Yerkawa laṣasia la sinelan asape avisu kile  
Mak 8:11-12; Luk 11:29-32*

<sup>38</sup> Ana navianena na navisaluaena laṣasia, amio Varasi laṣasia, apisa pa Yesu, apisape “! Ei, ko naṣa apio ko ke asape Navianena, imimi sinemimin mesape okila kile tai van imimi vena imimi mevisu kioṃa naṃareraena.”

<sup>39</sup> Ana Yesu pisataṃe la, pisape “Yaru la naṣa sinelan ga asape avisu kile la sanene, la ape yaru viowa la paṣisi, akila ke wowe pa Ntewa sane la naṣa akila ke kolau. Peraga, ṣisi na taṣatete amiu avisu kile tai, ana kile naṣa kiena ne Navisawalena Sona sumo, naga ga nene na akilia avisuia. <sup>40</sup> Sona nene ṃeke e loṃeṣen pupia ika lesumsum nene pano-o tol legiena telu a lemalo telu, ana ṣisi na ve sa ke ṃena ga nene e Narina ne Yeririna, naṣa ṣisi na naga ṃeke e los nen porotano vano-o tol legiena ve telu a lemalo ve telu. <sup>41</sup> Ana la nae Ninive nanua sumo amloge visena kiena ne Sona narui, ana apilopu la, a e legiena na liṣereena, ṣisi na la nene asumalu avisa lologia kiamiu naviowaena lala, komin naṣa yaru tai naṣa naga to laa metavan Sona naga sike amio amiu nanagane, ana amiu na pe apilopu amiu re nenaga.

<sup>42</sup> “Nanua ṃena ga sumo, ana sira kawa tai naga pe ṣarin suṣe tai, naṣa naga mligan kiena purvanua naṣa sike koperina paṣisi, ana pitomi tano vena loge visena namanmaruaena kiena ne Parin Suṣe Solomon. Ana sira kawa ṃena ga nene ṣisi na sumalu e legiena naliṣereena,

naga visa lologia kiamiu naviowaena lala, komin naña yaru tai naga pe manmarua to laa metavan Solomon sane, naga sike amio amiu nanagane, ana amiu na pe sinemiun re nenaga.”

*Ninuna viowa naga kilia wasuþe sina*

*Luk 11:24-26*

<sup>43</sup> Ana Yesu pisa mēna ga, pisapenua “Pogos tai, pogos naña visae aṃenelua yermare e yaru tai, yermare nene kilia va yom̃arua vena kaleli yo tai naña va se ea vena ve m̃ana uṃa. Ana visae ve lual re, <sup>44</sup> þisi na naga visavenua, ‘A, þisi na nevito li si e m̃au uṃa marua na sumo wa.’ Ana pogos naña naga wasuþe vitomi, þisi na naga vitomi wal yuṃa naña mon korena ga, ana merarava po paþisi, a akila ruru make suri la e yuṃa naña þisi rui. <sup>45</sup> Ana naga kilia wasuþe sina va were si yermare taþena lala ve olua, naña la apiowa manene la taulu naga sane, atomi amio naga, ana akilia ava si asike e los nen yaru nene. Ana yaru nene, nanua sumo kiena malena piowa, ana siraunia kiena malena viowa la sane. A þisi na ve sa ke mēna ga nene e malena kiena ne yaru viowa nanagane lala.”

*Yesu, anena amio wenla lala*

*Mak 3:31-35; Luk 8:19-21*

<sup>46</sup> Pogos naña Yesu pisi ke amio yaru la nene wa, ana anena amio wenla lala apimi aporu e yo nene, asuṃalu asuṃa ga vanua, la sinelan asape avis amio Yesu. <sup>47</sup> Ana yaru la tai nene pisa pa Yesu, pisape “Ei, anom̃a amio womla lala asuṃalu asike vanua, la sinelan asape avis re amio ko wa.”

<sup>48</sup> Ana Yesu pisatañea, pisape “?Ana ane pe aneu, a ane pe wolai lala?” <sup>49</sup> Ana naga kiar kiena nalogena lala, pisapenua “?Apisu ke yaru la ne asike ne? Aneu a wolai lala, yaru ne la nane asike ne. <sup>50</sup> Komin visae yaru naña kila ke ya naña Ata nae ma e peni naga sinenania, yaru na sanene naga pe wolai, a pe vineu, a pe aneu.”

## 13

*Pakaiwa na kurus nen wit la naña akekapil apa e porotano la naña ape tañena la vari*

*Mak 4:1-9; Luk 8:4-8*

<sup>1</sup> E ke e legiena nene, Yesu molue umña, pito totano e yepas nen pupia lapa nene vian yeririna lala. <sup>2</sup> Ana yeririna la moki pañisi apitomi puna e pogos nene narui, ana kila naga ñiyu pa to meta e waa tai, ana yeririna la punu ga yo pule ga asike ura, <sup>3</sup> ana naga pian suri moki pan la e ga e ñakaiwa lala.

Ana naga pisa pan la, pisape “Yaru tai pa peven kurusa e kana lokove. <sup>4</sup> Pogos naña naga sumña sisilin ke kurus la nene, ana kurus lañasia kekapil pa e mrapa, ana siraunia manu lala apimi ate plan make ga. <sup>5</sup> Ana kurus lañasia akekapili pa e naña kilavaru ñeke tano, ana pe porotano po re teke meta poli. Ana akakapur vilaga, vanon porotano meninivi ga. <sup>6</sup> Ana pogos naña mrae pa ñarera, kekan kurus nen suri la naña pitotovi memeu veraga, vanon ñeligas lala pe pito ruru re tano poli wa. <sup>7</sup> Ana kurus lañasia akekapili apa e naña sumo pe ate plan ruru re



kilika viowa la e poli, ana ĩisi na kilika viowa naĵa pitovi pimi keviu sina, ana piwo kare kurus nen suri la naĵa pitotovi ne ana amarmare. <sup>8</sup> A kurus taĵena si laĵasia akekapil apa e porotano tai naĵa po, ana akapuru po, ana aĵar mrasnela, naĵa laĵas aĵar mras tol ponotia taaga, laĵasia aĵar mras tol lualima orai, a laĵasia lualima telu.”

<sup>9</sup> Ana Yesu pisa, pisape “Yaru naĵa kiligana teke ea naga monar yagokon ruru visena nene.”

*?Vanon ya ne Yesu pis e ĵakaiwa lala?*

*Mak 4:10-12; Luk 8:9-10*

<sup>10</sup> Ana siraunia, nalogena lala apimi puna ne Yesu apiunia, asape “?Vanon ya ne ko osuĵa opian ke yeririna lala e ĵakaiwa la sanene?”

<sup>11</sup> Ana Yesu pisatamea, pisape “Ntewa naga kila ke sape ĩisi na amiu akilia alual nakilia wanena kiena ne kiena nasuĵenena, ana naga taĵatete la kiliaena ne va yeririna taĵena la nene. <sup>12</sup> Nevisa sanini van amiu, visae yaru naĵa kiena suri moki rui, ĩisi na war va la sane vena ve moki va ĩisi, a yaru naĵa pe kiena suri re poli, ĩisi na naga kilalu narin suri ya naĵa naga kiena. <sup>13</sup> Sanene, nepian la e ĵakaiwa lala, vanon naĵa la asuĵa apisuia, ana apisu kilale ĵele ga, ana asuĵa amloge, ana amloge kilale ĵele ga. <sup>14</sup> Yaru suri la ne sanene, akila narui ana Ntewa pisayu la nanua sumo rui e visena lelaga naĵa Navisawalena Aisea pisawal sumo, naĵa pisa pisape

*‘Ana ãisi na amiu aloge vano-o, ana taãatete alogakilale pogos tai.*

*A ãisi na amiu avisu vano-o, ana taãatete avisu kilale pogos tai,*

<sup>15</sup> *vanon naãa amiu na sane yaru la naãa kiela sitomena la amarmare ãisi rui, sa naãa aãiwo pulkiligala, a sane aãelawa rui.*

*Visae ve akila re sanene, pona vera na akilia avisu kilale suria, a vera na akilia alogakilale suria, a vera na kiela sitomena akilia asito-mkilale suria, ana sanene, akilia avilopu la aimi pun inu vena nekila ruru la.’* *Ais 6:9,10*

<sup>16</sup> “Ana nevisa van amiu, kiau nalogena lala, navisa ruruena sike e amiu komin naãa kilamaramiu la asumã apisu ke suri la naãa amiu apisuia, a kiligamiu la amloge mã suri la naãa nesumã nepian amiu ke ea. <sup>17</sup> Inu nevisa van amiu, navisawalena la moki amio yeririna kiena ne Ntewa lala la moki liu nanua sumo, naãa sinelan manene paãisi naãa asape avisu suri la naãa amiu apisu ke nanagane, ana pe apisu re poli, a la akilayon manene naãa aloge suri la naãa amiu amloge ke nanagane, ana pe amloge re nenaga.”

*Yesu pisawal kinas nen ãakaiwa na kurus nen wit*

*Mak 4:13-20; Luk 8:11-15*

<sup>18</sup> Ana Yesu pisa pan la, pisape “Amiu, ayagogo ruruia, ãisi na nevisayu kinas nen ãakaiwa nene,

naŝa naga pisayu yaru nene naŝa pa peven kurusa e kana lokove.

<sup>19</sup> “Suri nasumo, naga kurus la naŝa kekapili e mrapa, naga sa naŝa yaru la ne amloge nalologena wo nasuŝenena nene ana pe amloge kilale re poli. Kurus wo lala kekapil e kiela sitomena lala, ana yaru viowa nene naŝa Yermare, naga pimi ŝar plan ke sina ga nalologena wo nene e losinela.

<sup>20</sup> “Taŝena, naga nene na kurus la naŝa kekapili e yo naŝa kilavaru meke tano, a naga sa naŝa yaru la ne amloge lologena wo nene, ana akekaran veraga, <sup>21</sup> ana sa naŝa ŝeligasa pe po re poli. Akilia asu ve plas ga, a visae pogos marera tai, pona yaru la aŝene la vanon naŝa la amlelaga e visena kiena ne Ntewa, ŝisi na la aloru ke veraga.

<sup>22</sup> “Taŝena meŝena ga, naga na kurus la naŝa kekapil e yo naŝa kilika viowa sike ea, ana naga na sa naŝa yaru la ne amloge lologena wo nene, ana la asitom manene la kiela malena lala, a sinelan manene la suri na yomarava nini. Pelaga la nene apimi sane kilika viowa, ana la apiwo kare nalologena wo nene vena ve war re si mrasa e kiela malena.

<sup>23</sup> “Ana na maro, naga na kurus la naŝa kekapili e porotano naŝa po, naga na sa naŝa yaru la amiyagogo ruru e lologena wo nene, ana amloge kilale ruru po, ana aŝar mras nen nalologena nene e kiela malena lala, naŝa sane laŝasia aŝar lualima telu, laŝasia aŝar sane lualima orai, a laŝasia aŝar moki sane mrasa tol ponotia taaga.”

*Pakaiwa na vilumĩini viowa amio kurus nen wit lalua akapuru lele taaga*

<sup>24</sup> Ana Yesu pisa sina ga ðakaiwa taþena tai pan la, pisape “Pelaga naþa Ntewa þere yaru lala apimi loyuma e nasuþenena kiena naga sanini. Yerkawa tai naþa naga pa peven kurus nen wit la naþa po e kana lokove, <sup>25</sup> ana pogos naþa yaru lala amomalio ke kolemallo, kiena nasinekar tai naga pimi, mapila kurus nen vilumĩini viowa tai e lokove nene þisi, ana pure pano. <sup>26</sup> Ana suri la lua nene apitotovi, ana lalua maran taaga ga, ana pogos naþa wit lala asiar naþa awar mrasa, ana yerkawa nene, kiena yaru na yumaena lala apisu kilalea sane vilumĩini viowa mēna ga kapuru ke amio wit nene. <sup>27</sup> Ana la apimi puna, apiun tania, asape “?Yerkawa, sanape? Kurus la naþa tepeven e komā lokove, ana kurus wo ga lala. ? Ana vilumĩini viowa nene pimi sanape?”

<sup>28</sup> “Ana naga pisa pan la, pisape ‘Peraga, nene na kiau nasinekar tai ne kila suri sanene.’

“Ana kiena yaru na yumaena lala apiun ke sina ga tania, asape “?Poga ga, ana sanape, sinomān osape imimi meva moure plan vilumĩini viowa la nene?” <sup>29</sup> Ana naga pisaluþaria, pisape ‘Toko, aligan suwa wa. Visae amiu ava aure plan vilumĩini viowa la nene, pona visae akila palia sa aure plan lae mēna ga amio wit la nene veraga. <sup>30</sup> Lalua akilia akakapuru mā veraga vano-o tol pogos na waren kinas nen wit imi. E ke e pogos nene, þisi na nekilia nevisa va yaru la naþa ava awar wit, vena ava ate ke ne vilumĩini viowa nene sumo wa, aviaria e þegasia akoven va e

kapi. Siraunia, la akilia ava ate wit lala vena awar vitomi umã.’ ”

*Pakaiwa na kurus nen mras nen purpa*

*Mak 4:30-32; Luk 13:18-19*

<sup>31</sup> Ana Yesu pisawal ðakaiwa taþena tai pan la, pisape “Nasuþenena nae ma e peni naga sane kurus nen mras nen purpa tai naþa pito pelan te laki tai. <sup>32</sup> Kurus nene na ve tokak na ve tokak paþisi, ana pogos naþa kapuru pano-o, ana pimi pe purlaki tai naþa keviu taulu make purlaki taþena lala, ana manu lala akila mala ponovi lala e kana korowas lala.”

*Pakaiwa na is*

*Luk 13:20-21*

<sup>33</sup> A Yesu pisawal sina ðakaiwa taþena tai pan la, pisape “Nasuþenena kiena ne Ntewa, naga sa naþa sira tai þalelar narin is amio puluyavi na kilaparavi e pupia pialora tai, ana narin is nene kilia kila kilaparavi la nene punu ga mlapa.”

*Yesu pisi pan la e ga e þakaiwa lala*

*Mak 4:33-34*

<sup>34</sup> E visena kiena ne Yesu la nene, naga pisawal suri la ne sanene pa yaru lala, a silaga naga pisi pan la e ga e ðakaiwa lala. <sup>35</sup> Sanene, naga kila visena kiena ne navisawalena nanua sumo imi ve lelaga, naþa Ntewa pisa, pisape

*“Pisi na inu nevisawal kiau visena lala e ga e þakaiwa, þisi na nevisawal suri la naþa tapolou su nakonua rui, asike ga perina wa, siar e pogos na siien yomerava nini, pimi tol nanagane.”*  
*Yauena 78:2*

*Yesu pisawal kinas nen ðakaiwa na vilumñini viowa*

<sup>36</sup> Ana Yesu mligan ðina lala, pa loyuma, ana kiena nalogena lala apimi puna, apiunia apisape “?Yesu, imimi sinemimi mesape ovisawal van imimi ya ne kinas nen ðakaiwa na vilumñini viowa naña kapuru ke e lokove na wit nene?”

<sup>37</sup> Ana Yesu pisatame la, pisape “Yerkawa naña peven ke kurus wo lala, nane Narina ne Yeririna nene. <sup>38</sup> A kana lokove nene, nane yomarava nini. A kurus wo la nene, nane yeririna la naña asike loyuma e nasuñenena kiena ne Ntewa nene. A vilumñini viowa la nene, nane yeririna kiena ne Yermare la nene. <sup>39</sup> A nasinekar nene naña pa peven kurus nen vilumñini viowa nene, nane Yermare na ga. A pogos nawarpoloen kinas nen wit la nene imi, nane luas nen pog nini. A yaru na yumaena la nene naña avanon ate wit awarpuloia, nane navisi lala. <sup>40</sup> A yumaena nene na warpiloena vilumñini viowa la nene vena asikapila, nane ðelaga ke sina ga nene naña ðisi na imi e pogos maro, <sup>41</sup> naña Narina ne Yeririna, naga ligan kiena navisi lala vena avano awar plan suri la naña kila yaru lala amloru e mlamulena viowa, amio yaru la natañen mlamulena viowa, vena ve asu re si veraga amio yaru la nasuñenena kiena. <sup>42</sup> Pisi na navisi lala akoven la ava e pupia kapi, e yo naña yaru lala asuma ga atagi, a asuma ga akar ke maluela ea. <sup>43</sup> Ana siraunia, yaru mesmesu lala ðisi na atego ve sa mrae, loyuma e nasuñenena kiena ne Arimala. A yaru naña kiligana teke e naga monar yagogo ruru e visena nene.”

*Pakaiwa na pupia kilavaru wo tai natauluen kilavaru*

<sup>44</sup> A Yesu pisape “Pelaga kiena ne yaru naŕa sinenan sape va loyuma e nasuŕenena kiena ne Ntewa, sane ŕakaiwa nini: yaru tai pa pisu kinakinas nen porotano tai, ana naga milan pupia kilavaru wo tai naŕa monyoyou ga meke ea. Ana naga sinwan rurulein kilavaru naŕani, ana naga pitove ŕiliwilin plan make kiena suri lala punu ga, vena kilia vam ul lua kinakinas nen porotano nene, vanon naŕa mloge po manene la paŕisi e suri wo naŕa maŕia.”

*Pakaiwa na kilavaru yuwowo naŕa teke e mratamelilivi*

<sup>45</sup> A Yesu pisa mena ga, pisape “A sa ke sina ga nini, pelaga kiena ne yaru naŕa sinenan pisape va loyuma e nasuŕenena kiena ne Ntewa, sa ke mena ga nini: yaru tai naŕa naga pul ke kilavaru yuwowo la naŕa po tan yaru lala, naŕa sike loyuma e mratamelilivi. <sup>46</sup> Ana pogos tai naga maŕal tai naŕa po na po, pisa pisape ‘!Lelaga pa, in na sineun suri nene paŕisi wa! Visae in na nokus ga ve kiau ga rui vera wo wa. Yoko in na neto nowilwilin plan make kiau suri taŕena lala, vena nevam nowul lua suri wo nini.’ ”

*Pakaiwa na lilivi*

<sup>47</sup> Ana Yesu pisa ke sina ga, pisape “A naga ke sina ga, pelaga kiena ne Ntewa nawereen yaru lala ava loyuma e kiena nasuŕenena, naga sa mena ga nini, naŕa pogos na yaru la aŕure lilivi e lapa, la akilia asuwoia ana aure ika la naŕa veve taŕena ve moki vaŕisi ea. <sup>48</sup> Ana pogos naŕa

lilivi pule ruru po, ana yaru lala aþurelua pa ura e yomema, ana atapurpurga atotano, amliþere ika lala. Ana ika la naþa po, akon apito e kiela karo lala, a ika la ne piowa, ana akuwani pano. <sup>49</sup> Pisi na ve sa nene e luas nen pogos nini, naþa þisi na navisi lala ava aliþere yaru lala, awere plan yeririna viowa lala, <sup>50</sup> vena akoven la ava e pupia kapi nene, naþa yaru lala asumã ga atagi, a asumã ga akar ke maluela ea.”

*Pakaiwa na suri marua amio suri viu*

<sup>51</sup> Ana Yesu piun tan kiena nalogena lala, pisape “?Amiu amloge kilale ke visena la nene?”

Ana lala apisatamãea, asape “Ee, pona mekilia mã yo.”

<sup>52</sup> Ana naga pisa pan la, pisape “Suri la nene naga sane yaru tai naþa sumo, naga pe navia-nena tai e navisaluaena lala na Visena Wa kiena ne Ntewa, ana siraunia, naga pimi sane kiau nalogena tai e nasuþenena kiena ne Ntewa. Yaru na sanene naga sane yerkawa tai naþa kiena suri wo na yumãena lala moki e mãana yumã. Ana silaga naga kilia lalua kiena suri marua naþa po ke ga wa, akilia mãena ga lalua kiena suri viu, vena kila kiena yumãena amio la.”

*Le Nasaret lala pe sinelan re Yesu poli*

*Mak 6:1-6; Luk 4:16-30*

<sup>53</sup> Ana pogos naþa Yesu pisawal þakaiwa la nene þisi, naga molue e yo nene, <sup>54</sup> þasuþe sina ga pimi kiena. Ana naga sumã pian ke yaru lala nae yo nene, loyumã e kiela yumã na leniena, a la sinela kurkurun kiena visena la pano paþisi. Ana la asumã apisavisa ke pan la, apisape “!Aulai!



?Yaru nene tol nakiliaena na sanene sanape, a naga kila ke kile la nene sanape? <sup>55</sup> Ita tekilia ke yaru nene rui. Naga arimana, yaru na yumãenen ga yumã, naña Yosop, a anena naga naña Maria. A wenla lala yaru la nene, Semes, a Yosop, a Saemon, a Sutas, naga pe wenla la nene. <sup>56</sup> A vinena lala, la ga nene naña asike ga amio ita ne. ?Ana yaru nene naga molue pun ita pa þar suri la nene pe?” <sup>57</sup> Ana sinela karia, pe sinelan re nena naga.

Ana Yesu pisa pan la, pisape “Yaru naña pe navisawalena, yaru taþena lala akilia avatanon naga, ana yaru na mña mratava lala, amio yaru na kiena yo lala, la ga nene na taþatete avatanon naga.” <sup>58</sup> Ana e yo nene, naga pe kila re kile la moki e poli, vanon naña pe amlelaga re e naga poli.

## 14

*Parin Suþe Erot Antiþas pisayu Yesu*

*Mak 6:14-16; Luk 9:7-9*

<sup>1</sup> E pogos nene, apisayu Yesu pa tol Suþe Erot, naña naga pe þarin suþe e lepas nae garu Kalele.

<sup>2</sup> Ana Suþe Erot mloge visena la nene, ana naga pisa pan kiena yerkawa lala, pisape “?Yaru nene naña apisayu ke ne, pona naga Yoane Nakeena nene, naña nanagane naga mali sina e marena yo? Vanon suri ne nanene, naga kila naga tol namãreraena nakilaena kile la nene.”

*?Yoane Nakeena mare sanape?*

*Mak 6:17-29*

3-4 Ana Suđe Erot pisa sanene, vanon nađa naga mēmār Yoane Nakeena mare rui, ana naga marau pađisi. Ana marena kiena ne Yoane Nakeena kana suniena nena sanini: wenla Suđe Erot nene, naga kiena kia Pilip, nađa lalua arimala taaga, ana anela lua. Ana sumo, Pilip nene talopa amio sira tai, kiena kia Lerotias. Ana siraunia, Suđe Erot pa p̄erelua sira nene. Ana e pogos nene, Yoane pisi pa Suđe Erot, pisape “Suri nene pe mesmesu re nene poli, nađa ko oure sira nene, komin naga pe wona ne womla.” Ana Erotias naga pe kekaran re nena visena kiena ne Yoane poli, ana naga pisi pa Suđe Erot, ana Suđe Erot mligan kiena yeririna la p̄asia apa atarar Yoane, ana apiari naga, amligan naga pa e yuņa nakoarena. <sup>5</sup> Ana Suđe Erot sape wemār Yoane, ana naga maraun li m̄a le Israel lala, vanon nađa amlelaga e Yoane asape naga pe kiela navisawalena tai.

<sup>6</sup> Ana Lerotias nene, naga narina na lom̄earu m̄a tai, ana pogos nađa la akila p̄ađagena nasitom̄alena legiena nađa Suđe Erot paeme ea, lom̄earu nene naga polu e marana ne la nađa asike lele taaga e p̄ađagena nene. Ana Suđe Erot kekaran kiena wolena pađisi, <sup>7</sup> ana naga pisaar m̄arera pan lom̄earu nene, pisape suri ya nađa naga visa, p̄isi na naga la vania.

<sup>8</sup> Ana Lerotias pisi amio narina nađa sira m̄ee nene, ana sira m̄ee pa pisalein pa Suđe Erot, pisape “In na sineun nesape okus p̄arina ne Yoane Nakeena, m̄ene pialo tai, imi van inu nagane ga ne e nini.”

<sup>9</sup> Ana visena nene kila Suḑe Erot mloge piowa vanon kiena navisalaweena nene, ana naga pisape akila ga ve sa naḑa sira m̄ee nene pisa, vanon naḑa naga pisaar m̄arera sanene e marana ne kiena erau la ḑisi rui. <sup>10</sup> Ana apa e loyuma nakoena nene, atelua kolmekina ne Yoane, <sup>11</sup> ana la amligan ḑarina m̄ene pialo tai, akus pimi pa sira m̄ee naḑani, ana sira m̄ee nene kus pa anena. <sup>12</sup> Ana siraunia nalogena kiena ne Yoane lala apimi akus tasnena, apa asinia, ana apano apa apisawal pa Yesu.

Suniena kiena ne Yoane Nakeena nane maro e nene.

*Yesu pagan yermene lala tol manu lima*

*Mak 6:30-44; Luk 9:10-17; Yoane 6:1-14*

<sup>13</sup> Ana pogos naḑa Yesu mloge sanene, naḑa Suḑe Erot naga pisayu ke m̄ena naga, sape naga Yoane Nakeena naḑa mali sina petan marena, ana Yesu molue e yo nene, ana ḑiyu e waa tai, vena va e yo m̄ano tai naḑa pe yaru re e poli. Ana pogos naḑa yeririna lala akilia asape naga pa ke e sanene, la m̄ena ga amolmolue e kiela pulkumali lala, la amial akom ura. <sup>14</sup> Ana pogos naḑa Yesu pa ura, naga pisa naḑa ḑina na yeririna m̄eke pa ura rui, ana naga sinena mie la paḑisi, ana naga kila ruru si kiela yaru namaiena lala apimi apo sina.

<sup>15</sup> Ana pogos naḑa mrae pito tano, nalogena lala apimi puna Yesu, apisa apisape “Ei, Suḑe, yo nini pe po re nenaga, a lavisi m̄ena ga yemalo narui. Popon ko oligan ḑina na yeririna la nene awasuḑe ava e pulkumali lala vena auli kala kinanena la ḑasia.”

<sup>16</sup> Ana Yesu pisatañe la, pisape “Toko, akilia asuñña ga ve sanene woga ga ne. Popon amiu awar kinanena lañasia van la.”

<sup>17</sup> Ana la apisa, apisape “!Ke peraga yo, imimi memlarar narin kilaparavi lima ga teke na, amio narin ika naña satin lua ga!”

<sup>18</sup> Ana Yesu pisape “Ala imi van inu,” <sup>19</sup> ana naga pisi pan yeririna la nene, pisape “Amiu atotano e vilumñini sumo wa.” Ana naga mla narin kilaparavi lima amio narin satin lua nañani, kirava pa metava ma e sinapane, pisa potena pa Ntewa vanon kinanena nene, ana kauroro narin kilaparavi lima nañani, kian pa kiena nalogena lala vena avion plan va yeririna la nene. <sup>20</sup> Ana la akan pano-o, mẽpela kawa pañisi, ana kinakinas nen kinanena la naña pe akan re poli, torokin akon va e karo mavava la naña kerkeviu ve lualima taaga pa lua. <sup>21</sup> Ana yaru la naña akan kinanena nene, la pa sane manu lima, ana pe apulo re sira la poli amio ninis lala.

*Yesu mial yau metava e wos nen sive*

*Mak 6:45-52; Yoane 6:15-21*

<sup>22</sup> Ana Yesu pisa pan kiena nalogena lala, pisape “Inu sineun nesape amiu akus kieta waa, ana asumo akusro pupia lapa nene ava lepas ñasia navano, ana in na nesuwa nesuñña neligan plan kone yeririna la awasuñela avano wa.”

<sup>23</sup> Ana pogos naña naga mligan plan yeririna lala apavano ñisi, ana naga pa metava e kunus tai, naga taaga, vena len. Pogos naña yemalolo, Yesu naga ga taaga sike na, <sup>24</sup> ana e pogos nene,

waa nene mēke perina pañisi, mēke likan lapa nañani, mēke va yotena narui. Ana sive keviu, a la asumã akawe lagi pañisi, a kila sane akus mēna ga sive naña akus sive. <sup>25</sup> Pogos naña lavisi yelagi merarava, Yesu pimi pula, naga mial yau ga metava e wos nen sive.

<sup>26</sup> Pogos naña kiena nalogena lala apisu naga mial yau ke e wos nen sive pimi pula sanene, amarau pañisi, apisa apisape “!Aulai! ?Suri ya na pimi ke sanene? ?Yermare yo, pona ya ne sanene?”

A la asumã ga amlolokai keviu, vanon naña la amarau pañisi, <sup>27</sup> ana Yesu pis pan la vilaga, pisa pisape “!Ei, ve amarau re, in ga nini!”

<sup>28</sup> Ana Pita pisatamea, pisape “Suñe, visae ko kemua nene, otamãan naña inu mēna ga neyal yau metava e wos nen sive, neimãasu punã.”

<sup>29</sup> Ana Yesu pisa, pisape “Ko, poga, otomi.”

Ana Pita mligan waa, pito tano, siar mial yau e sive, pa lavisin Yesu, <sup>30</sup> ana pogos naña naga sitomãl si lagi m̃arera nene, naga marau. Naga marau sanene, siar mian pito tano narui, ana naga pio Yesu, pisape “Suñe, ko otamalia inu.”

<sup>31</sup> Ana Yesu kian limana pa veraga, tarar Pita, ana pisa pania, pisape “?Vanon ya ne sinemã miyuwawa sanene? !Ko pe opiawa re nena kawa e inu poli wa!”

<sup>32</sup> Ana pogos naña lalua añiyu si apa meta e waa, lagi nene mare, <sup>33</sup> a la naña e waa amieluar Yesu, apisa, apisape “Lelaga kemua, ko ope narina ne Ntewa lelaga.”

*Namaiena lala atol ga isinen kulkota m̃ana Yesu*

*Mak 6:53-56*

<sup>34</sup> Ana Yesu lala akusro pupia lapa nene e kiela waa, apa e laṗas ṗasia, ana apa ura e yo tai, kiena kia Kenasaret. <sup>35</sup> Ana pogos naṗa yaru lala nae e yo nene apisu kilale Yesu, amligan visena telivi piora pa e yo punu ga. Ana yaru lala aṗure namaiena lala apimi puna, <sup>36</sup> apiun tan naga vena naga taṃan namaiena lala atol ga m̃ana isinen kulkota. Ana la naṗa atol ga sanene, kiela maiena la kokovio nenaga, apimi apowo sina.

## 15

*Nalogenena lala kiena ne Yesu pe ataveve re ṗelaga marua kiena ne le Yu la poli*

*Mak 7:1-13*

<sup>1</sup> Ana e pogos nene, Varasi la ṗasia amio navianena navisaluaena laṗasia amolue garu Yerusalem, apimi apisu Yesu. <sup>2</sup> Apiun tan naga, apisa apisape “?Vanon ya ne kiom̃a nalogenena lala pe ataveve ruru re kieta ṗelaga marua na lotuen nanua sumo poli, naṗa kieta nasumonena lala apian ita, sa naṗa la asum̃a apisa, apisape visae yaru tai sinenan sape kinana, naga monar taveve ruru ṗelaga mesmesu lala na kevanen limana sumo wa, ana ṗisi na naga kilia kinana?”

<sup>3</sup> Ana Yesu pisataṃe la, pisape “?Ana amiu m̃ena ga, vanon ya ne amiu aṃareran naṗa ataveve kiamiu ṗelaga marua lala, ana e kiamiu ṗelaga marua la nene, amiu asum̃a akilaro ke navisaluaena kiena ne Ntewa? <sup>4</sup> Ana Ntewa pisa

rui, pisape ‘Ovatano e arimoña amio anomña,’ a naga pisa mēna ga, pisape ‘Yaru naña pisi piowa pan arimana pona anena, aweñar naga mare.’ <sup>5</sup> Ana nanagane, pogos naña yaru tai visaar visave kiena suri lala ve suri wa, ñisi na la va Ntewa pogos tai, ana naga pisa sanene ana siraunia naga pe pisuar ruru re kiena yermarua la luwoka poli, pona ve iila re si la luoka e suri la nene, <sup>6</sup> ana amiu asuñña ga apisa ke asape sanene na poga ga ne, pe pe sur re tai nene poli. A e ñelaga nene, amiu asuñña ga akila ke navisaluaena kiena ne Ntewa pimi pe suri korena ga tai ne, vanon naña amiu sinemiun asape auarar ga kiamiu ñelaga marua lala. <sup>7</sup> !Ana amiu na apisokani ke nene, amiu apisi korena ga ne! Navisawalena Aisea naga pisayu amiu sumo rui, naña naga pisawal visena nene naña Ntewa pisa, naña pisa pisape

<sup>8</sup> *‘Yaru la nene apatanon inu e ga e kiela visena lala,  
ana kiela sitomena lala asike perinan inu wa.*

<sup>9</sup> *Akila ke lotuena pan inu, ana pe suri korena ga,  
vanon pogos naña akilapian yeririna lala,  
apisa ke asape visena nene naga pe visena  
kiena ne Ntewa nene, ana visena la nene pe  
kiela ga la ga yeririna lala.’ ” Ais 29:13*

*Suri la naña kila yaru namname e marana  
Ntewa  
Mak 7:14-23*

<sup>10</sup> Ana Yesu pio viraviran yeririna lala vena aimi puna, ana naga pisa pan la, pisa pisape “Amiu ayagogo ruruia, amiu monar alogekilale

kiau visena nene. <sup>11</sup> Pe kinanena re naña pa e logon yaru poli naña kilia kila naga namname e marana ne Ntewa, ana visena lala naña molue e logona yaru, suri ne nanene naga kilia kila naga namname.”

<sup>12</sup> Ana siraunia, kiena nalogena lala apimi, apisa pania, apisape “?Ei, ko okilia mña naña Varasi lala sinela mimi pañisi vanon kioña visena la naña osumña opisa ke ne?”

<sup>13-14</sup> Ana Yesu pisatamñe la, pisape “Amiu na ve asitom re yaru la nene. Ya naña la asumña akila ke ne, naga pe yumñaena kiena ne re Ntewa nene poli, a yoko kau Ata nae ma e peni, ãisi na naga wereplan make suri la naña naga pe mapila re poli. ?Yeririna la nene na ape kilamara ãala ga, ana sinelan asape asumoni yeririna lala, ana sanape narui, yaru tai naña pe kilamara ãala kilia sumon yaru tañena naña pe kilamara ãala lalua ayal? !Pisi na lalua akilia aloru veraga atotano e ãiliãili tai ne!”

<sup>15</sup> Ana Pita piun tan Yesu, pisape “Suñe, sineun nesape ovisawal ke ne kinas nen ãakaiwa nene sumo wa, naña opisa ãesan ga na wa.”

<sup>16</sup> Ana Yesu pisa pisape, “?Sanape ne, pona ãarimiu mña ga merorol ke yo wa? <sup>17</sup> Pona amiu akilia mña ve tokak ga yo, naña suri ya naña vito kome logona yaru, pito tano vitove kome mñeña narui, ana kilia pa vanua si kome tasnena, <sup>18</sup> ana suri ya naña molue e logona yaru, naga molue e losinena sumo, a suri ne nanene, naga kilia kila yaru namname. <sup>19</sup> Naga nene na



vanon naña nasitomiēna viowa lala amomolue e los nen yaru, sa naña nawemomñaren yaru, natañaen kolau, nakilaena lau, navinauena, navisokanena, a nasisiena visena. <sup>20</sup> Nanene ðelaga la naña akilia akila yaru namname e marana ne Ntewa. A ðelaga nene naña yaru kinana ana pe ke re limana sumo poli, suri nene naga taþatete kila yaru namname sanene.”

*Yesu pilelua yermare e sira mñee tai*

*Mak 7:24-30*

<sup>21</sup> Ana Yesu molue e yo nene, naga pito e lepas naña pulkumali lua asike ea, naña Taea amio Saeton. <sup>22</sup> Ana sira tai nae lepas naña Kenan, naga pe wolawa ga, sike e lepas nene, ana naga pimi puna ne Yesu, pio naga, pisape “Suþe, ko ope Navisaarena naña ko omolue e lus kiena ne Tepet, neviun tan ko vena sinemña ye inu. Kiau loñearu, yermare tai sike e naga, naña sumña kila kare naga silaga.” <sup>23</sup> Ana Yesu mloge visena nene, ana pe pisa re nena suri tai pa sira nene poli.

Siraunia, nalogena lala apimi, apisa pa Yesu, apisape “Sira nene sumña taveve ita ke sanene na, naga sumña pio manene liu wa. Popon oligan lua naga vano.”

<sup>24</sup> Ana pe Yesu pisatamñe la re poli, ana naga pisi pa sira nene narui, pisa pania, pisape “Ntewa mligan inu nepimi vena neva ga puna ne le Israel lala, la naña sane sipsip la naña akila pal mrapa.”

<sup>25</sup> Ana sira nañani pimi, kinai tano e lana ne Yesu, pisape “Awis, Suþe, nepiun tan ko, nesape oiila inu.”

<sup>26</sup> Ana Yesu pisatam̃ea, pisa pisape “Ana pe mesmesu re naṓa nelalua kinanena kana ne nisisi lala, vena nela va lokul poli.” Naga pisi sanene vanon naṓa naga kilia m̃a sape e pogos nene, le Yu taṓena lala, naṓa la asitom asape la ga ape narina ne Ntewa, asuṓa apisayu kare yaru la naṓa pe ape le Yu re poli, apisape la ape lokul ga la ne.

<sup>27</sup> Ana sira nene pisi, pisa pisape “Ko opisa pe lelaga, Suṓe, ana lokul lala akilia akan m̃ena kororos nen kinanena naṓa amloloru vatano e lelen kinanena kana ne taena ne lokul lala.”

<sup>28</sup> Ana Yesu pisatam̃e ruru naga narui, pisa pisape “Sira, ko opiawa ruru ke m̃arera e inu paṓisi. Pisi na ko ovisu ga nanagane imi van ko ve sa naṓa ko omlelaga ea.” Ana e ke e pogos nene narui, sira m̃ee kiena ne sira nene pimi po sina.

*Yesu kila ruru namaien la moki*

*Mak 7:31-37*

<sup>29</sup> Siraunia, Yesu molue ke sina ga e yo nene, ṓasuṓe si pa lepas naṓa Kalele. Naga suṓa mial pano, ana pa kom ga lavisin pupia lapa na lepas nene, ana pa totano metava e kunus tai. <sup>30</sup> Toṓa sane, ana ṓegas nen yeririna lala apimi puna, amio laulu lala, amio latakin lala, amio kilamara ṓala lala, amio kiligapoṓe lala, amio m̃ena namaiena taṓena m̃ena ga laṓasia. Ana aṓar la nene apimi, amligan la asike ga lavisin Yesu, ana Yesu kila ruru la apo ke sina ga. <sup>31</sup> Ana yeririna lala sinela kurkuru paṓisi, pogos naṓa apisu puru lala apisi, latakin lala apimi apo, laulu lala amial po, a kilamara kata lala akirava,

ana la amieluar Ntewa kiena ne le Israel lala paṽisi vanonia.

*Yesu pagan yermene lala tol manu vari [4000], amio mēna ga sira lala a nin sisi lala*

*Mak 8:1-10*

<sup>32</sup> Ana Yesu pio kiena nalogena lala apimi puna, ana naga pisa pisape “Inu sineu mie ṽina na yeririna la nene paṽisi wa, komin naṽa asike amio ita legiena telu narui, ana pe kala kinanena re si poli. A inu taṽatete neligan la ava si umā naṽa pe kala kinanena re sanene poli, vanon naṽa visae nekila sanene, pona e mrapa komsusa ana yaru laṽasia viso kar la vano-o marala malko yo.”

<sup>33</sup> Ana nalogena kiena ne Yesu lala apisa pania, apisape “?Ana ṽisi na ita towar kala kinanena pe ne? Ana komin yo nini na yo korena ga nini, a la moki manene la wa.”

<sup>34</sup> Ana Yesu piun tan la, pisape “?Ana amiu kamiu kilaparavi via na sike na?”

Ana la apisa, pisape “Olua ga, amio narin ika naṽa satin laṽasia.”

<sup>35</sup> Ana Yesu pisa pa ṽina na yeririna la naṽani, pisape “Atotano e nene sumo wa.” <sup>36</sup> Ana naga ṽar kilaparavi la olua naṽani, amio narin ika naṽa satin la nene, ana naga pisa potena pan Ntewa vanonia, ana siraunia ana kawewowala, ana kian pa kiena nalogena lala, ana la lein aṽar apiovion pa yeririna lala. <sup>37</sup> Ana la punu ga akan pano-o mēṽela kawa ruru po paṽisi. Ana siraunia, akon kinakinas nen kinanena la nene naṽa sike na, pa e karo popos olua, ana puleule

paḗisi. <sup>38</sup> Ana yermēne la naḗa akania, tol manu vari, ana pe apulo re sira lala amio ninis la poli.

<sup>39</sup> Ana Yesu mligan ḗina na yeririna la nene aḗasuḗe apa si umā, ana naga pa si e kiela waa, ana mligan yo nene, pimi suli ga plas ga e lepas naḗa kumali keviu naḗa Makatan mēke ea.

## 16

*Yer kawa la ḗasia asape avisu kile tai*

*Mak 8:11-13; Luk 12:54-56*

<sup>1</sup> Ana pogos tai Varasi la ḗasia amio Satusi la ḗasia apimi puna Yesu, naḗa sinelan asape akilali naga, ana apisa, apisape “Imimi sinemiminia mesape ko okilali pupia kile tai van imimi, naḗa ko okila e puriukawa nae ma e peni.”

<sup>2</sup> Ana Yesu pisatamē la, pisape “Pogos naḗa mrae pito ke tano, ana visae amiu avisu naḗa yo vivaga e lepas naḗa mrae pito ke tano ea, amiu akilia avisa avisave ‘Pisi na yepisun peni,’

<sup>3</sup> a pogos naḗa mrae pa ḗarpo yo, a visae amiu avisu sinapane tano vivaga a lul la malolo mēna ga metavana, amiu akilia avisave ‘Pisi na yua kove ḗane.’ ?Nane amiu asumā apisu kilale ke kile la nene e sinapane ḗisi narui, naḗa ḗisi na pog ve sanape pona ve sanape, ana sanape naḗa amiu pe apisu kilale re kiau kile lala na pog keviu nini naḗa nesike nemio amiu poli?”

<sup>4</sup> Ana Yesu pisa mēna pan la, pisape “Yaru la naḗa sinelan ga avisu kile lala, la ape li viowa la paḗisi, la akila wowe pa Ntewa, la apilon māsila

pania, sane la naña akila lau, aþure matan wola lala. Peraga, þisi na taþatete amiu avisu kile tai narui, ana yoko amiu avisu ga naña malivi e inu ve sa ke ga kile naña pa Navisawalena Sona nanua sumo, naña Ntewa kila naga mali sina.” Ana Yesu purmatan la, naga mligan la asikena.

*“Amiu avisuar e is kiena ne Varasi lala amio Satusi lala”*

*Mak 8:14-21*

<sup>5</sup> Ana pogos naña Yesu amio kiena nalogena lala amligan e nene, ana aþaro e pupia lapa naña apa e lepas þasa, ana nalogena lala sinela þesania naña pe aþar re si kala kilaparavi laþas poli. Ana pogos naña atol lepas þasa, <sup>6</sup> ana Yesu mla visena tai pan la, pisape “Amiu na monar avisuar ruru amiu, e is kiena ne Varasi lala amio Satusi lala.”

<sup>7</sup> Ana la amloge visena nene, ana la apisayulein pan la, apisape “?Pona naga pisi sanene vanon naña pe toþar re kilaparavi laþas pimi poli yo?”

<sup>8-9</sup> Ana Yesu kilia na kiela sitomena nene narui, pisape “?Pe na ya naña amiu asitom manene ke meþemiu la sanene, naña apisape yoko takan ya ne? ?Sanape naña amiu pe amloge kilale re suri la nene poli wa? !Kiamiu lelagaena ve tokaki paþisi wa! ?Pona amiu sinemiu þesan mena ga kilaparavi la lima nene yo, naña inu nemla pa yeririna lala tol manu lima nene, amio mena karo la naña amiu akon puleule? <sup>10</sup> ?Pona amiu sinemiu þesan mena ga kilaparavi la olua nene, naña inu nemla pa yeririna lala tol manu

vari nene yo, a karo via naña amiu akon sirau?  
<sup>11</sup> ?Sanape naña amiu pe amloge kilale re naña pe nepisi re pan amiu vanon kilaparavi poli? Inu nevisa ke sina ga van amiu, nesape amiu na monar avisuar ruru amiu e is kiena ne Varasi lala amio Satusi lala.”

<sup>12</sup> Ana e pogos nene, la akilia mña naña naga pe pisayu re is nakilaen kilaparavi pan la poli, ana naga pisa ke visena navisokanena la naña Varasi lala amio Satusi lala akilia avian la ea, naña kilia kila þarin yaru lapa imi ve keviu, ana kilia kila kare make kiena malena, sa naña is na miyuñaen ke e kilaparavi.

*Pita pisawal sape Yesu naga pe Navisaarena kemua lelaga*

*Mak 8:27-30; Luk 9:18-21*

<sup>13</sup> Ana Yesu lala apito garo e lepas naña pulkumali keviu nene Sisaria Piliþae mñeke ea, ana e pogos nene naga piun tan kiena nalogena lala, pisape “?Amiu asumña amloge mña naña yeririna lala asumña ga apisavisa ke Narina ne Yeririna, apisape naga ai?”

<sup>14</sup> Ana lala apisa, apisape “La þasia apisa apisape ko Yoane Nakeena ke sina ga, a la þasia apisape ko Elaisa, a la þasia apisape ko Seremñaea, pona navisawalena taþena tai na nanua sumo.”

<sup>15</sup> Ana naga piun tan la, pisape “?Ana amiu, amiu na asape inu na ai?”

<sup>16</sup> Ana Saemon Pita pisatamñea, pisape “Ko, ko na Navisaarena, ko ope Narina ne Ntewa Mali.”

17 Ana Yesu pisatañe pania, pisape “Saemon, narina ne Yoane, navisa ruruena imi van ko. Suri naña ko opisa ne, pe yaru re na pian ko e poli, ana Ata ga nae ma e peni naga pian ko ea. 18 A ko nene ko kionña kia tañena naña Pita, naga kana kinasia sanini, sane ‘kilavaru,’ ana lelaga pañisi, sa naña nanagane, in na nepisu ko na sane ko ope varsu tai, ana ñisi na in na nevisirlua ñegas nen kiau li nalotena lala e kilatapili na sanene narui, a puriukawa na marena tañatete kilia taulu ñegas nene. 19 Pisi na in na nela kii lala navietavanena amio nakotaween nasuñenena kiena ne Ntewa van ko, a suri ya naña ko ovisaluñar e yomarava nini, ana Ntewa nae ma e peni naga ñena ga visaluñaria amio ko, a suri ya naña ko otamania e yomarava nini, ana Ntewa nae ma e peni naga ñena ga tamania amio ko.”

20 Ana Yesu pisa ñarera pa kiena nalogena lala, pisape “Amiu na ve ava avisawal re van yeririna la avisave in na nepe Navisaarena.”

*Yesu pisawal kiena marena*

*Mak 8:31-33; Luk 9:22*

21 Ana siar e pogos nene, Yesu kilali naña kila merarava va nalogena lala, sape naga monar va ma Yerusalem, ana e yo nene, ñisi na suñe kiena ne le Israel lala, akila kare manene naga vañisi, amio ñarin yaru wa lala, amio ñena ga navianena navisaluaena lala, la make narui ñisi na akila kare naga vañisi. Yesu pisa ñena ga pisape ñisi na la nene awemñar naga mare, ana

kana legiena na telu p̄isi, Ata Ntewa kila naga suñalu mali sina.

<sup>22</sup> Ana pogos naña Pita mloge visena nene, piolua Yesu pano, pisi m̄arera pania, pisape visaluḡaria, pisape “Yesu, Ntewa monar visaluḡar suri nene. Suri la nene taḡatete kilia imi ve lelaga e ko ve sa nene.”

<sup>23</sup> Ana Yesu pilopuia, pisi m̄arera pa Pita, pisape “!Yermare Lego, oure vetan inu! Ko osuñã okilali inu ke sina ga e kioñã sitomena nene naña pe sitomena kiena yaru ga, pe sitomena kiena ne Ntewa re nena ga.”

*Nalogenã kiena ne Yesu monar sitom korenan ga kiena nasinenanena lala*

*Mak 8:34–9:1; Luk 9:22-27*

<sup>24</sup> Ana Yesu pisa pa kiena nalogenã lala, pisape “Yaru naña sinenan sape siraun inu, monar sitom korenan ga kiena nasinenanena lala, ana monar kus kiena laki torovia, ana taveve inu.

<sup>25</sup> Yaru naña sinenan sape visuar ruru kiena malena, naga p̄isi na kilaluia, ana yaru naña naga kilalu kiena malena vanon inu, naga p̄isi na kilia tol malena lelaga. <sup>26</sup> Ana visae yaru tai naga tol make suri na yomarava la punu ga, ana kilalu mrapa na malena, naga pe taulu re nena suri wo napo lelaga tai poli, ana siraunia, taḡatete kiena suri wo la nene aulimaran si kiena malena.

<sup>27</sup> Ana lavisi ke Narina ne Yeririna wasuḡe ke sina ga imi narui amio navisi lala, naga imi amio naurarena kiena ne Arimana, ana naga ul



yaru lala mesmesun kiela nayuñäen lala. <sup>28</sup> Inu nevisa suri na lelaga nene van amiu, nesape yaru la ðasia asumñalu asike e nini, naða þisi na taðatete amare asumña ga vano-o avisu Narina ne Yeririna warpoyo amio kiena nasuðenena, vena vim ve suðen yeririna la punu ga.”

## 17

*Yepena ne Yesu pilonia pimi pe taðena*

*Mak 9:2-10; Luk 9:28-36*

<sup>1</sup> Siraun e pogos nene, legiena orai þarovia, ana Yesu þere Pita, a Semes, a wenla naða Yoane, ana la ga vari nene apa metava e ravie tai. <sup>2</sup> Asumña sanene, ana nalogena la telu nene apisu naða yepena ne Yesu pimi ke pe taðena, a marana pilavila manene sa naða mrae, a mñana kulkota lala apimi amiyuwowo pano-o amiyuwowo po paþisi. <sup>3</sup> Ana la telu nene apisu mñena ga Mosis amio Elaisa, lalua añaliv, ana lalua asumña ga asun ke amio Yesu. <sup>4</sup> Ana Pita pisa pa Yesu, pisape “Suðe, popon tanea ita tesuñä ga e yo nini. Visae ko sinoñania, ana neyuñäen silparpara ve telu e nini, moñä tai, mñana ne Mosis tai, a mñana ne Elaisa tai.”

<sup>5</sup> Ana pogos naða Pita suñä pisi ke ga wa, ana lul tai naða pilavila paþisi pitomi kalo la, ana amloge visena tai molue e lul nene, pisa pisape “Nene na naruu nene, naða in na nesitom naga paþisi. Kiau sitomena sike ga e naga, a nekekarana naga paþisi. Amiu na monar alogear ruru naga.”

<sup>6</sup> Nalogena lala amloge visena nene, ana amarau na amarau, ana amloru e porotano, ařariwani marala lala.

<sup>7</sup> Ana Yesu pimi pulu, mlipalipa la telu nene, ana pisa pan la, pisape “Amiu asumalu, ve amarau re.” <sup>8</sup> Ana pogos nařa la ařar plan si řarila pa metava, apisu re si lalua nene poli, ana la apisu ga Yesu naga taaga sike na.

<sup>9</sup> Ana lala amolue e ravie nene, ařasuře la ke sina apitomi tano, ana Yesu pisaar mārera pan la, pisaluřar la, pisape “Suri nařa Ntewa kila amiu apisu ne, řisi na amiu ve avisawal re va yaru la nanagane, vano-o tol nařa Narina ne Yeririna mali sina ga e marena, e pogos nene narui amiu akilia avisawal va yeririna lala.”

### *La apisayu Elaisa*

#### *Mak 9:11-13*

<sup>10</sup> Ana nalogena la telu nene apiun tan Yesu, apisape “?Sanapen nařa navianena na navisaluaena lala asumā ga apisa ke, apisape ‘Monar Elaisa naga wasuře ke sina ga imi sumo wa, siraunia na Navisaarena nene kilia imi mālivi?’”

<sup>11</sup> Ana Yesu pisatañe la, pisape “Nařa la apisa sanene, naga lelaga kemua, komin Navisawalena Malakaea naga pisa sanene rui e kiena tusi. Elaisa naga monar imi sumo vena kila ruru make suri punu ga, řisi na Navisaarena naga kilia imi sirau, <sup>12</sup> ana in na nevisa van amiu sanini, Elaisa nene pimi řisi rui, ana pe yaru lala apisu kilale re asape naga poli, ana pe asitom re naga poli.

Ana e ke e ðelaga nene, ðisi na akila ke mēna ga viowa va Narina ne Yeririna.”

<sup>13</sup> Ana e pogos ke nanene, nalogena la telu nene akilia ga na wa, naþa Elaisa naþa Yesu pisayu ke ne, nane Yoane Nakeena nene.

*Yesu pilelua yermare e yaru mēe tai  
Mak 9:14-29; Luk 9:37-42*

<sup>14</sup> Ana Yesu amio la telu nene aþasuþela, ana apito asikolila amio þina la naþa asike e pogos nene, ana yaru tai pimi kinai tano e lana ne Yesu, ana pisa pisape <sup>15</sup> “Suþe, inu sineun nesape ko sinemā ye kiau yaru mēe nini, oiila naga, komin naþa maiena tai teke e naga. Maiena nene kila naga marmarlusia yam moki paþisi, ana kila kare manene la naga wa, suñā kila ke naga mlorvavae mā pano, mloru pa e kapi pona e mēna ga e wii lala. <sup>16</sup> Inu nepureli naga pimi puna ne kioñā nalogena lala, ana amiyumāen pano-o, peraga, ana akila ruru þele naga.”

<sup>17</sup> Ana Yesu pisi pa kiena nalogena lala, pisape “?Amiu la nene, sanape na sanene? Amiu na pe apiawa re nenaga e Ntewa poli, silaga amiu asuñā ga apa ape wowe yo. ?Monar nesuñā si nemio amiu vano tol pogwai? Inu sineu maren amiu paþisi rui. Ana poga ga, aure yaru mēe nene imi pun inu.” <sup>18</sup> Ana la aþure yaru mēe nene pimi, ana Yesu pisaar pan yermare naþa sike e naga, pisape “!Omolue e naga nanagane ga ne!,” ana verakorena yaru mēe nene pimi po sina.

<sup>19</sup> Ana siraun e pogos nene, pog naþa Yesu suñā naga taaga, nalogena lala apimi

puna, apiun tania apisape “?Sanape na imimi mepilelua ãele yermare naãa sike e yaru m̃ee nene?”

<sup>20</sup> Ana Yesu pisa pan la, pisape “Nanene na vanon naãa amiu pe apiawa ruru re m̃arera e inu poli wa. Lelaga nevisa van amiu, visae avi-awa e inu ve tokak ga ve sa ga narin kurus nen mras nen purpa, ana visae kiamiu naviawaena ne ve lelaga kemua napo, ana ãisi na amiu akilia avisa va tavie na m̃eke ne, avisave ‘Ko oure,’ ana ãisi na naga monar ure. ãisi na pe suri re tai naãa amiu akilia akila ãele poli. <sup>21</sup> Ana naãa nam̃eneplanen yermare la ne sanene, ana kana mrapa ne sanini: yaru na monar len, ana monar monsilu ga ve kinan re. E ga e ãelaga nene, ãisi na naga kilia m̃ene plan yermare kar la ne sanene.”

*Yesu pisawal ke sina ga kiena marena*

*Mak 9:30-32; Luk 9:43-45*

<sup>22</sup> Ana pogos tai naãa Yesu amio kiena nalogena lala apimi lele taaga garu Kalele, Yesu pisa pan la, pisape “Lavisi ke naãa aligan Narina ne Yeririna va e limana yaru la narui, <sup>23</sup> naãa ãisi na aweñar naga mare, ana siraunia, e kana legiena na telu, ãisi na Ntewa kila naga mali ke sina ga.” Ana pogos naãa Yesu pisa visena nene, kiena nalogena lala amloge piowa vanon paãisi.

*Kilavaru na takis na Yumã Wa Mana Ntewa garu Yerusalem*

<sup>24</sup> Pogos naãa Yesu amio kiena nalogena lala apimi atol Kapeneam, yaru lala na warpoloen

takis na Yumña Wa Mana Ntewa, apimi puna ne Pita, apiunia apisape “?Sanape, kioṃña navianena mēna ga pul mā takis ne, pona peraga?”

<sup>25</sup> Ana Pita pisataṃnea, pisape “Naga pul ṃaga.”

Ana Pita ṃasuṃe si pa e yumña naṃa Yesu sike ea, a naga pe pis re poli wa, ana Yesu naga pisṃesia, piunia pisape “Saemon, ko ositomveveli ṃarin suṃe na yomarava la nene. ?Li pe la ne apul ke takis nene pan la? ?Yaru na ṃala mratava ga lala, pona yaru taṃena lala?”

<sup>26</sup> Ana Pita pisa, pisape “Yaru taṃena ga lala, la monar aulia.”

Ana Yesu pisa, pisape “Ee, sanene narui, ana kana kinasia sanini, mratava kiena ne ṃarin suṃe lala, la taṃatete aulia. Ana in ke nena naṃa nepe mratava kiena ne Suṃe Keviu na Yumña Wa naṃa narui, ana vanon suri ne nanene, in na pe pon re neul takis naṃa la apiun ke tan ko poli. <sup>27</sup> Ana popon italua na ve tekila kare re yaru lala na warpoloen takis, italua mēna ga monar toul ga. Ko, oto garo e lapa, oto omāte ika, a ika naṃa omāte ṃesania, ṃisi na ko olual kilavaru tai e logona, naṃa torokin italua toul kieta takis ea, ana olavia ola ova oulia.”

## 18

*“?Yaru ai naṃa naga to laa metavan yaru taṃena lala?”*

*Mak 9:33-37; Luk 9:46-48*

<sup>1</sup> Ana e pogos ke nene, nalogena taṃena lala apimi aṃalivi, apimi nena puna Yesu, apiun

tania, asape “Imimi sinemimin meviun mesape: ?Yaru ai naña naga to laa metavan yaru tañena lala e loyũña na nasuñenena kiena ne Ntewa?”

<sup>2</sup> Ana Yesu pio sisi tai naña suña ga pimi puna, ana mligan sisi nañani suñalu su likan la, <sup>3</sup> ana naga pisa pan la, pisape “In na nevisa van amiu, visae amiu ve avilopu amiu re naña kiamiu ðelaga la aimi ve sa ðelaga kiena ne nisisi nene, ðisi na amiu tañatete kemua aimi loyũña e nasuñenena kiena ne Ntewa pogos tai. <sup>4</sup> Ana yaru naña kila kiena sitomena su ga tano ve sa nisisi nini, yaru nene naga yoko kilia imi to laa metava, taulu yaru tañena lala e nasuñenena kiena ne Ntewa. <sup>5</sup> Yaru naña kiena sitomena pito tano e inu, ana naga kekaran naña naga kila wo va nisisi kokan tai ne sanene, yaru nene naga sa ga naña naga kekaran inu ke ga narui.”

### *Natañaliena lala*

*Mak 9:42-48; Luk 17:1-2*

<sup>6</sup> Ana Yesu pisa mña ga, pisape “Ana visae yaru tai kila nisisi tai ne sanene ligan inu, ve viawa re si mñarera e inu, ana ðisi na yaru nene kus nakoena tai naña mñarera manene la. Visae amñatear pupia kilavaru tai mñene kolmekina, ana akuwani naga talilu vitove e lowe memaena, nanene naga nakoena tai ne meme ga ne, ana yaru nene naga yoko war va re la na wa taulu nanene. <sup>7</sup> !Aulai! Yomarava nini piowa manene la narui, naña pulen manene la suri la naña silaga asumña akilali ke yaru lala vena kila la akilalu kiela naviawaena e inu. Natañaliena

la nene ĩisi na asuńa likan amiu silaga, ana ĩisi na viowa manene la va yaru la naĵa aĵar nataĵaliena viowa la nene pimi e yaru taĵena lala.

8-9 “Visae lumońa tai, pona lańa tai, pona kilamaramńa tai, pona suri ya sina naĵa e kiońa malena, visae suri la nene tai kila ko ve oviawa re si mńarera e inu, popon otelua suri nene vetan ko, okuwan vano. Visae otelua ĵelaga na mlamulena viowa vetan kiońa malena ve sanene, ĩisi na ko okilia ova loyuńa e malena, a visae ko ova loyuńa e malena naĵa lumońa, pona lańa, pona kilamaramńa, pona suri ya sina e kiońa malena, visae suri la nene tai kovio ĩisi rui, ana nanene na poga ga nene. Ana piowa manene la naĵa visae tasneńa la punu ga amio kiońa ĵelaga viowa lala asuńa woga ga e ko, ana siraunia akoven ko e kapi naĵa taĵatete mńewo pogos tai e yo naloge viowaena.”

*Pakaiwa na sipsip naĵa kilalu mrapa*

*Luk 15:3-7*

<sup>10</sup> Ana Yesu pisa mńena ga, pisape “Amiu na monar avisuar rurui a vena amiu ve asitom korenan re naruu la tai nene pogos tai. Visae peraga, amaramńe amiu, vanon naĵa naruu la nene, la kiela navisi lala nae ma e peni naĵa la asuńa apisuar la mńaga, a navisi la nene silaga asike e marana ne Ata nae ma e peni.

<sup>11</sup> Ana yuńaena kiena ne Narina ne Yeririna naga sanini: naĵa naga pimin pisape tamalia la naĵa akilalu mrapa.

<sup>12</sup> “Amiu ayagogon ruru li suniena nini: Yaru tai naña naga kiena sipsip lala tol ponotia taaga, ana lala tai kila ñarina, pa la perina, ana kila pal mrapa, pa kovio. ?Pisi na yaru nene kila sanape narui? Naga monar ligan kiena sipsip la lualima ovari pa ovari nene, asuñña ga akinana ke e yo na vilumñini, ana naga monar vano vena kaleli sipsip nene naña kilalu mrapa. <sup>13</sup> Lelaga nevisa van amiu, pogos naña naga ñal si sipsip nene, ana naga kilia kekaran va ñisi, taulu naña naga kekaran kiena sipsip tañena la moki naña asu ruru asuñña ga, pe amial re naña apa akovio poli.

<sup>14</sup> “Ana Arimamiu nae ma e peni, naga ñena ga sa ke ga, naña naga yepen mavin narina tai nene yepe vetan mrapa vena vano va kovio.”

*Visae womla tai naña kila viowa van ko  
Luk 17:3*

<sup>15</sup> Ana Yesu pisa ñena ga, pisape “Visae womla tai naga kila viowa van ko pogos tai, monar ko ova ovisu naga naña amiu ga lua nene asikena, ana ko monar ovisawal kiena ñaviowaena vania. Visae naga kekaran logeen kioñña visena, nanene naga sa naña kioñña visena kila amiu luwoka ape mara wo si ñisi narui. <sup>16</sup> Ana visae naga yepen mavin yagogonen kioñña visena, ana monar ko ovano oure si yaru tañena la ve lua pona ve telu aimi amio ko, vena aiila ko e kioñña visena, sa naña Tusi Wa pisa pisape ‘Visena la punu ga, monar yaru naiilaena visena, yaru ve lua pona ve telu, vena kila visena nene kilia sumñalu.’



<sup>17</sup> Ana visae womla nene yepen mavin ke yagogon rurukoena wa, ana ko monar ovisawal kiena p̄arkawa nene va p̄egas nen li nalelagaena lala, vena la p̄asia akilia aimi avisuli re m̄ena ga naga. A visae naga m̄arera ke ga wa, ve yagogon re m̄ena ga nalelagaena lala, amiu monar avisu naga sa naṗa naga pe wolawa ga tai, pona naga sa ga yaru na warpoloen takis, naṗa yaru lala pe ape erau ruru re nenaga amio la poli.”

*Leniena naṗa yaru la mras ve lua la ga avirantar la ea*

<sup>18</sup> Ana Yesu pisa m̄ena ga, pisape “Lelaga, inu nevisa van amiu, ana suri ya naṗa amiu avisaluṗaria e yomarava nini, ana Ntewa nae ma e peni naga m̄ena ga visaluṗaria amio amiu, a suri ya naṗa amiu atam̄ania e yomarava nini, ana Ntewa nae ma e peni naga m̄ena ga tam̄ania amio amiu.

<sup>19</sup> “A naga sina, nevisa m̄ena ga van amiu, visae amiu yaru la ve lua naṗa la lua avirantarlan suri tai e yomarava nini, ana visae lalua alenwoia, ana kau Ata nae ma e peni p̄isi na naga kila suri nene van lalua. <sup>20</sup> Vanon naṗa visae yaru ve lua pona ve telu aimi lele taaga e kiau kia, ana inu m̄ena nesike likan la.”

*Pakaiwa na p̄elaga na viewoena*

*Luk 17:3-4*

<sup>21</sup> Ana Pita pimi puna Yesu, piun tania, pisape “?Suṗe, visae kiau wolai kila ke pe mesmesu re pan inu silaga poli, inu monar neviewo naga yam ve via? ?Monar va tol yam ve olua pona sanape?”

<sup>22</sup> Ana Yesu pisatam̃ea, pisape “Peraga, p̃isi na ko ve oviewo re ga naga yam ve olua ga, ko monar oviewo naga yam ve lualima yam ve olua, ko oviewo m̃a naga sanene vano tol sina ga kana yam ve olua [70 x 7]. <sup>23</sup> Pelaga naviewoena loyum̃a e nasuṣnen kiena ne Ntewa, monar ve sanene narui. Amiu ayagogo e suniena tai naṣa pisayu p̃elaga naviewoena, naṣa pisa sanini, pisape: Parin suṣe tai, naṣa naga sinenan sape visuveveli lapui la naṣa kiena yaru na yum̃aena lala akila pania. <sup>24</sup> Ana naga kila m̃a sanene pano-o, ana aṣure kiena yaru nayum̃aena tai pimi puna, naṣa yaru nene naga kila lapui na kilavaru na tenario via puna ne kiena yerkawa nene. <sup>25</sup> Pogos naṣa apiun kilavaru tan yaru nene, naga pisape naga taṣatete si ulmaran lapui nene. Ana yerkawa nene pisa pa kiena yeririna lala, pisape ‘Poga, akilalua naga a auliulinlua naga ve kiena ne yerkawa taṣena, vena yum̃ae korena ga vania. Ana auliulin m̃ena ga wona, amio narina lala, a amio make kiela suri lala, a awar kana kilavaru imi vena auli kiena lapui nene komṣasia ea.’

<sup>26</sup> “Ana yaru nene mloru e lana ne p̃arin suṣe nene, tagi m̃arera pania, pisape ‘Ko ope yerkawa, awis, inu sineun nesape neviun tan ko vena ko ola re narin pogos tai van inu sumo wa, vena inu nekilali neul maranli lapui nene van ko.’

<sup>27</sup> Ana yerkawa nene sinena miye yaru nene, naga piwo make lapui nene pania, vena ve ul marana re sina, ana tam̃an yaru naṣani molue ga sa ga ne.

<sup>28</sup> “Ana pogos naṣa yaru nene pano, naga pisu

kiena erau tai, naþa kiena erau nene kiena lapui tai teke e yaru nene. Ana kiena lapui ne ve tokaki ga, ana yaru nene pano þuarar kolmekina, pisa pania, pisape ‘Ko monar oul lua kionã lapui nene vetan inu nanagane ga ne.’

<sup>29</sup> “Ana kiena erau nene pimi mloru e lana, tagi manene pania, pisape ‘Mara, ko ope kiau erau, awis, sineun nesape neviun tan ko vena ko ola re narin pogos tai van inu sumo wa, vena inu nekilali neul maranli lapui nene van ko.’ <sup>30</sup> Ana yaru nene yepena mavin viewoen kiena erau nene, þisi na naga pa kila la amligan naga pa e yuñã nakoena, vena suñã vano-o ul plan kiena lapui nene, þisi na naga kilia molue sina.

<sup>31</sup> “Ana pogos naþa yaru taþena la naþa kiena ne þarin suþe nene apisu þelaga nene, amloge piowa paþisi, ana apa puna ne kiela þarin suþe, apisawal suri la nene pania. <sup>32</sup> Ana þarin suþe nene pio kiena yaru nene vena vim si puna, ana sinena karia, pis mñarera pania, pisape ‘!Aa, ko na ope yaru þilþil ya na sanene! Inu nepiewo ko e kionã pupia lapui nene rui, vanon naþa otagin manene pan inu, ana okila sineu miye ko. <sup>33</sup> ?Vanon ya ne ko taþatete mñena ga sinemã ye kionã erau sa naþa inu sineu miye ko sumo rui?’ <sup>34</sup> Ana þarin suþe nene sinena mimi pa la narui, ana naga pisape monar aligan yaru nene va e yuñã nakoena, ana la monar ala ñã nakoena vania vano-o naga ul plan make kiena lapui nene.”

<sup>35</sup> Ana Yesu pisa, pisape “Visae amiu ve aviewo re womlamiu lala silaga, ve lelaga e sinemiu la

wetelu, ĩisi na kau Ata nae ma e peni, naga sinena kar amiu ve sanene, ĩisi na naga la nakoena ve sa ke ga nene van amiu.”

## 19

*Yesu pisayu sanape naĵa yaru mligan lua wona  
Mak 10:1-12*

<sup>1</sup> Ana Yesu pisa visena la nene ĩisi, ana naga mligan Kalele naga kome wii nae Yortan lepas na vano, ana pa metava e lepas nae Yutea. <sup>2</sup> Ana ĩina lala ataveve ke naga e pogos nene, ana e yo nene naga kila ruru namaiena la moki.

<sup>3</sup> Ana Varasi mĕna ga laĵasia asike e pogos nene, ana apimi puna ne Yesu, apisape akilali ke sina ga naga, la apiun naviunena tai pania, la apiunia, apisape “?Kieta navisaluaena pisa ya ne e lepas nen ĵelaga kiena ne yaru naĵa ligan lua wona? ?Mesmesu ga naĵa yaru kilia kila sanene vanon suri kar punu ga naĵa pe miasia, pona kilia kila vanon ga suri kerkeviu ga laĵasia?”

<sup>4</sup> Ana Yesu pisataĕe la, pisape “?Pona amiu na pe akilia re Visena Wa kiena ne Ntewa naĵa naga pisa, pisape

‘E purĵesia, Ntewa naga sii suri punu ga, ana sii mĕna ga yeririna lua, yermĕne tai, a sira tai?’

<sup>5</sup> Suri nene amiu akilia ĩisi rui, amio mĕna ga visena taĵena nene naĵa pisa, pisape

*‘Sanene, ĩisi na yaru ligan arimana amio anena, ana naga vano vilolar wona na sira, ana lalua aimi ave taaga ga narui.’ Nas 2:24*

<sup>6</sup> Nanene kila sane lalua ve ave lua re sina, ana lalua apimi ape taaga ga narui. Ana ya naĵa

Ntewa naga vilolaria aimi ave taaga, pe pon re si yaru kilapure la poli.”

<sup>7</sup> Ana Varasi la nene amloge visena la nene, ana apiun ke sina ga tan Yesu, asape “?Poga ga, ana vanon ya ne Mosis naga pisawal navisaluaena nene naña tañan sape yaru naga kilia la mñaki naliganluaena tai vena la va wona, vena ligan lua naga vano?”

<sup>8</sup> Ana Yesu pisatañe la, pisape “Ee, ana sumon naña nasiien yomarava nini, naga pe sa re nene poli, ana vanon naña amiu p̄arimiu lala apimi m̄arera pañisi, nane kila Mosis tañania sanene sape siar e repimiu la pimi, amiu akilia aligan plan womiu lala. <sup>9</sup> Ana nanagane, inu nevisa van amiu, visae yaru tai, wona kila kolau, yaru nene kilia ligan lua wona nene. Ana visae sira nene ve kila re kolau ve sanene sumo, ana yaru nene ligan lua naga, ana p̄isi na va were sira tañena, visae ve sanene, ana Ntewa pisu sane yaru nene naga kila kolau narui amio sira tañena nene, naga kila kare sira nene naña wona na sumo.”

<sup>10</sup> Ana nalogena kiena Yesu lala apisa pania, apisape “Visae ve sanene, p̄elaga na talopaena pe suri m̄arera tai ne pañisi ne. Pe pon re si tekila ita tetalopa poli.”

<sup>11-12</sup> Ana Yesu pisa pan la, pisape “Ee, lelaga naña yaru lañasia naña p̄isi na la ve atalopa re pogos tai, sa naña sane lañasia apaeme ana tasnela la piowa pa rui, pona lañasia akila kare tasnela, sa naña asila, ana la tañatete atalopa. A lañasia, pe atalopa re poli vanon naña la

amligan talopaena vena la ayum̃ae e nasuñenena kiena ne Ntewa. Ana Visena Wa, naga pisa pisape popon yerm̃ene amio sira, lalua atalopa, a popon lalua asu ruru m̃aga sanene tol luas nen kiela malena la luoka. A ko naña ko okekaran visena nene, ana opisu naña Ntewa naga kila sanene pan ko rui, popon olarar ruru visena nene m̃arera e kiom̃a malena.”

*Yesu pisa ruru sisi lala*

*Mak 10:13-16; Luk 18:15-17*

<sup>13</sup> Ana lañasia akus narila lala apimi puna Yesu, vena naga ligan limana te la, len wo la. Ana nalogena lala apisuia, ana apisi m̃arera pan yaru la nene, apisalup̃ar la, <sup>14</sup> ana Yesu pisa, pisape “Amiu ve avisalup̃ar re sisi la nene, amiu atam̃an la aimi pun inu, vanon naña sisi la nene na asa ga la naña asike loyum̃a e nasuñenena kiena ne Ntewa.”

<sup>15</sup> Ana naga mligan limana te sisi la nene, ana suraunia, naga mial pano.

*Yaru m̃ee tai naña kiena suri moki*

*Mak 10:17-22; Luk 18:18-23*

<sup>16</sup> Ana e pogos tañena tai, yaru m̃ee tai pimi pisu Yesu, piun tania, pisape “?Navianena, ana in na monar nekila yum̃aena wo ya, naña vena kila inu ñisi na netol malena naña ve uro re?”

<sup>17</sup> Ana Yesu pisa pania, pisape “?Vanon ya ne ko opiun tan inu sanene, osape nevisa yum̃aena wo tai van ko? Ntewa ga naga po, a visae ko ologear kiena navisaluaena lala, ñisi na ko okilia otol malena wo nene.”

<sup>18</sup> Ana yaru nařani piun ke sina ga tan Yesu, pisape “?Ana ko opisa ke navisaluaena ya la nene?”

Ana Yesu pisa pania, pisape “Navisaluaena ne la nanini narui, nařa pisa pisape: ve oweřar re yaru mare, ve okila re kolau, ve ovinau re, <sup>19</sup> ve ovisokan re, ko ova tanon arimomã amio anomã, a ko ositom nalavis puřa lala, ovisuar ruru la, ve sa ke nařa ko opisuar ruru ko ke ga.”

<sup>20</sup> Ana yaru mēe nene pisa pania, pisape “Navisaluaena la nařa ko opisa ke nene, inu nesuřa nemlarar make punu ga rui. ?Suri ya si nařa teke ga wa, nařa inu pe nekila re poli wa?”

<sup>21</sup> Ana Yesu pisa pania, pisape “Visae ko sinomãan osape oimi omesmesu ruru wo va řisi, torokin nařa ko otol malena nařa ve uro re, řisi na ko na monar okila ve sanini: ko ovano, oululin plan make kiořa suri la punu ga, ana owar kana kilavaru nena, ova oviovionia van yaru la nařa pe kiela suri re poli. Visae ko okila sanene, řisi na ko kiořa suri wo lala ve moki vařisi ma e peni. Ko, ova okila, siraunia oimi otaveve inu.”

<sup>22</sup> Ana pogos nařa yaru mēe nene mloge visena nene, kiena sitomena urmi a sinena piowa pařisi, vanon nařa naga kiena suri la moki manene la. Ana naga pure matan Yesu.

*Yaru nařa kiena suri moki, naga m̃arera la nařa va loyuřa e nasuřenena kiena ne Ntewa  
Mak 10:23-31; Luk 18:24-30*

<sup>23</sup> Ana Yesu pisa pa kiena nalogena lala, pisape “Lelaga nevisa van amiu, visae yaru tai nařa

kiena suri moki, naga sinenan pisape va loyuma e nasuŕenena kiena ne Ntewa, suri nene na m̄arera towe ma naŕa. <sup>24</sup> Ee, inu nevisa van amiu, visae kamel tai naga va warpoyo e pulus nen nitil nene, nane naga m̄arera vaŕisi ne, ana visae yaru tai naŕa naga kiena suri la moki ana sinenan sape va loyuma e nasuŕenena kiena ne Ntewa, naga m̄arera la na wa.”

<sup>25</sup> Pogos naŕa nalogena lala amloge visena nene, amilania paŕisi, ana la apisape “?Suwala, ana visae ve sanene, ŕisi na ane kilia tol namalena nene?”

<sup>26</sup> Ana Yesu kirava pisu la, naga pisa pisape “Ee, lelaga naŕa yaru taŕatete kilia kila yaru tol malena nene, ana Ntewa ga kilia kila make suri punu ga.”

<sup>27</sup> Ana Pita pisatamea, pisa pisape “?Ana sanapen imimi? Imimi meligan make kiamimi suri la rui, ana imimi metaveve ko. ?ŕisi na imimi metol ma suri wo laŕas ne, pona peraga?”

<sup>28</sup> Ana Yesu pisa pan la, pisape “Lelaga nevisa van amiu sanini, pogos naŕa Narina ne Yeririna totano e kiena lelena wa natotanoena e yomarava viu nene naŕa ŕisi na imi, amiu naŕa ataveve inu ke nanagane, ana amiu mena ga atotano e pupia lelemiu wa natotanoena ve lualima taaga va lua, vena avisuar lus nae Israel lala lualima taaga pa lua nene, sa naŕa amiu ape kiela ŕarin suŕe lala. <sup>29</sup> Ana yaru naŕa visae ligan mana yuma, pona wenla pona vinena, pona arimana pona anena, pona narina, pona kiena porotano, ana visae naga ligan suri la nene vanon ga inu,



ṽisi na naga warmarana sina ga e yomarava nini kiena suri la naṽa naga mligania, kilia tol sina ve ponotia tai, ana metavana, ṽisi na naga kilia tol mēna ga malena naṽa ve uro re.

<sup>30</sup> “Ana yaru la moki liu naṽa asu metava, ṽisi na ato tano, a yaru la naṽa ato tano, ṽisi na la asu metava.”

## 20

### *Pakaiwa kiena ne yaru na yuṽaena lala*

<sup>1</sup> Ana Yesu sumā pisa māga pano-o, pisape “Suri naṽa nepisa ga na wa, sa ke ṽelaga naṽa Ntewa kila ke pa yaru lala loyūṽa e nasuṽenena kiena. A ṽisi na nevisayu suri nene van amiu e ṽakaiwa tai, naṽa pisa sanene, pisape: Yerkawa tai, naṽa kana pupia lokilmāsmās tai. E kolulagi tai, naṽa pe yemlagi ruru re poli wa, naga pa e pulkumali tai vena were yaru laṽasia ava ayūṽae e kiena lokilmāsmās nene e legiena nene. <sup>2</sup> Naga māal la ṽasia, ana pisaar pan la e kilavaru tai naṽa torokin yuṽaena na legiena wetelu tai, ana mligan plan la apano vena ava ayūṽae e kiena lokilmāsmās nene. <sup>3</sup> Ana e mrae ovari, naga pa sina ga e pulkumali nene, pisu yaru taṽena lala asu korena ga, asūṽa sane pe kiela yuṽaena re poli, <sup>4</sup> ana naga pisa pan la, pisape ‘Popon amiu mēna ga aimi ayūṽae re e kiau lokilmāsmās, ana ṽisi na nowul amiu ke ga.’

<sup>5</sup> “Ana la nene apa amiyūṽae, a siraunia, kolpae mēna ga, a mrae telu mēna ga naṽa yepekilavi, ana yerkawa nene ṽasuṽe si pano,

ḗpere ke sina ga yaru laḗas apimi amiyuḗae kiena sanene. <sup>6</sup> A yam si tai, e yepekilavi mrae lima, naga ḗasuḗe sina ga pa e pulkumali nene, pisu yaru laḗasia naḗa asuḗalu asike e yo nene na wa, ana naga pisa pan la, pisape ‘?Komin ya ne asu koren ke sanene na wa e yo nini, naḗa pe akila re nena yuḗaena tai poli?’

<sup>7</sup> “Ana la apisataḗnea, apisape ‘Peraga, pe yaru tai pimin re sape meva meyuḗae kiena poli.’

“Ana yerkawa nene pisa pan la, pisape ‘Poga, visae sanene, in na neure amiu narui. Amiu, aimi ayuḗae kiau.’

<sup>8</sup> “Ana e ko yepekilavi la rui, amiyuḗae ḗisi, ana yerkawa nene pisa pa kiena navisuaren yuḗaena nene, pisape ‘Poga, ovio yaru na yuḗaena la nene aimi, oul la. ḗisi na ko okila sanini: oul ḗesan la naḗa apimi mare ga na wa, vano-o oḗisi e la naḗa apimḗesani kolulagi.’

<sup>9</sup> Ana pogos naḗa yaru la naḗa asiar ga yuḗaena e mrae lima apimi, yaru nene mla kilavaru pan la torokin ke legiena wetelu na yuḗaena taaga.

<sup>10</sup> A pogos naḗa la naḗa apami amiyuḗae sumo apimin vena awar kiela kilavaru, la amape pona la ala va la metava, taulu la naḗa amiyuḗae plas ga, ana yaru nene mla kilavaru pan la, la punu ga torok ga.

<sup>11</sup> “Ana pogos naḗa la apisu kiela kilavaru sa ke ga nene, la amloge piowa, asuḗa apisimumun yerkawa nene. <sup>12</sup> Ana amligan lala tai pa piun tania, pisa pisape ‘La naḗa apimi mare ga na wa, la amiyuḗae aora taaga ga, ana imimi memiyuḗaen legiena wetelu e pupia yepisusun

nene. Imimi mepisu naña ko omla kilavaru maran taaga pan la, sa ke naña omla pan imimi. ?Suri nene na sanape na sanene?

<sup>13</sup> “Ana yerkawa nene pisatanñe naga, pisape ‘Mara, in na pe nekila kare ko re nene poli. Italua tepranar ñisi rui, tesape ko oyumñae e legiena wetelu ve taaga nene, ana tesape ñisi na nowul ko torokin ga kioñña yumñae nene. <sup>14</sup> Ve sanene, popon ko ola kioñña kilavaru ova ga umñ. Naga kiau sitomena ga tai nene, naña kilavaru naña nemla pan ko, sineun nesape nela mñena ga marana ve taaga va la naña apimi mare ga. <sup>15</sup> ? Ko ositom osape in na tañatete nekila sa naña inu sineunia, e kiau kilavaru? ?Sanape na ko opielue e yaru la naña nekila ke po pan la? Ana ñakaiwa nini ñisi e nene.’ ”

<sup>16</sup> Ana Yesu pisa make kiena visena e pogos nene, pisa pisape “Ana yaru la naña asirau, ñisi na la asumo, a la naña asumo, ñisi na la asirau.”

*Yesu pisawal kiena marena yam telu narui*

*Mak 10:32-34; Luk 18:31-34*

<sup>17</sup> Ana Yesu pa ke metava ma Yerusalem narui, ana pogos naña amial ke e mrapplepa apavini, naga pio kiena nalogena la lualima taaga pa lua apimi puna, ana pisi pan la, pisape <sup>18</sup> “Amiu ayagogo ruruia. Nanagane ita tepa ke ma Yerusalem narui, naña ñisi na ve ve piavi re, ñisi na aligan Narina ne Yeririna e limana ne yerkawa lala kiena ne yaru wa lala, a amio navianena kiena ne navisaluaena mñena lala, ana ñisi na la nene la alipere naga avisave ñisi na

naga monar mare. <sup>19</sup> Ana siraunia aligan naga e limana ne le Rom lala, naña p̃isi na la nene akirakirai viowa vania, a p̃isi na la akoa naga, ana p̃isi na asuaria naga e laki torovia vena mare. Ana pogos naña naga mare pae, ana e kana legiena na telu, p̃isi na Ntewa kilamalia sina naga.”

*Anenane Semes amio Yoane, naga piun suri tai tan Yesu*

*Mak 10:35-40*

<sup>20</sup> Ana wona ne Sepeti, naga p̃ere narila luwoka nene naña Semes amio Yoane, apimi puna ne Yesu. Sira nene kinai e lana Yesu, piunia pisape “Inu sineunia nesape otam̃an suri tai van inu.”

<sup>21</sup> Ana Yesu pisatañe naga, pisape “?Ana ko sinoñan osape oviun ya?”

Sira nene pisatañea, pisape “Inu sineunia nesape otam̃an sanini: pogos naña ko ovisirlua kioñã nasuñenena, p̃isi na naruu la luwoka nene akilia atotano amio ko e kioñã yo wa naña metava lavisin ko, tai e lepas nen lumoñã na p̃amarua, a tai e lepas nen lumoñã na p̃am̃eli.”

<sup>22</sup> Ana Yesu pisatañe la, pisape “Amiu pe akilia re suri naña apiun ke ne poli. ?Sanape, amiu lua nene asitom asape amiu lua atorokin naña ita tomunpae e piala naloge viowaena nene naña inu monar nomun ea?”

Lalua apisa pania, apisape “Ee, imimi lua metoroki.”

<sup>23</sup> Ana Yesu pisa pan la luoka, pisape “Ee, lelaga naña p̃isi na amiu luwoka amun m̃ena ga e m̃au piala naloge viowaena nene, ana suri nene naña

amiu lua apiunia, apisape amiu lua atotano amio inu e lepasneu luwoka, suri nene naga pe kiau re naña nela van amiu poli. Yo la ne sanene, kiena ne la ga naña kau Ata naga kila ruru pe kiela, a naña naga pisaar ñisi rui pisape ñisi na la atotano ea.”

*Narina ne yeririna pimin vena yuñae kiena yaru lala*

*Mak 10:41-45*

<sup>24</sup> Pogos naña nalogena tañena la lualima nene la amloge suri nene, naña wolai lalua nene Semes amio Yoane apiunia, ana la sinela kari lalua. <sup>25</sup> Ana Yesu pio la, vena aimi puna, vena naga visi van la, ana naga pisa pisape “Ita tekilia rui ñelaga kiena ne yaru la naña pe amlelaga re e Ntewa poli. Ita tepisu ña naña suñe lala amio yerkawa lala na yomarava nini, la sinelan asape amareran yaru tañena lala vena asu vatanon la silaga. <sup>26-27</sup> Ana amiu kiau nalogena lala, kiamiu ñelaga monar ve ve sa re nene. Visae amiu yaru tai sinenan sape imi ve kiamiu yerkawa tai pona kiamiu nasumonena tai, kana mrapa nena sanini: yaru nene monar imi ve sa ga yaru na yuñae kiamiuena tai. <sup>28</sup> Narina ne Yeririna naga kila sanene ñisi rui, naña naga pe pimin re naña vena yaru la akila yuñae nañlaen naga poli, ana naga pimin vena naga yuñae vena iñlaen lala, a vena tañan kiena malena vena ul plan yaru la ve moki.”

*Yesu kila ruru kilamarakata lua  
Mak 10:46-52; Luk 18:35-43*

<sup>29</sup> E pogos nene, Yesu amio kiena nalogena lala asike garu Seriko, ana pogos naña amligan e pulkumali nene apano, ana yeririna la moki pañisi naña ataveve la. <sup>30</sup> Ana kilamara kata la lua, naña lalua atomña tano e isinen mrapplepa. Ana pogos naña lalua amloge naña apisape Yesu mial ke e mrapplepa pimi, lalua apio ke asape “!Suñe-o, ko lus kiena ne Tepet, imimi lua mesape ko sineña ye imimi!”

<sup>31</sup> Ana yaru tañena lala apisin sinemimien pan lalua nene, apisa apisape “Ee, amiu lua nene añaaga.”

Ana lalua apio manene la, asape “!Suñe-o, ko lus kiena ne Tepet, imimi lua mesape ko sineña ye imimi.”

<sup>32</sup> Ana Yesu suñalu su mrapa e yo nene, pio lalua, pisa pisape “?Amiu lua sinemiun asape nekila ya ne van amiu?”

<sup>33</sup> Ana lalua apisatamea, asape “Suñe, awis, imimi lua sinemimin mesape kilamaramimi la imi wo, vena mekiliala mekirava.”

<sup>34</sup> Ana Yesu sinen mie la, ana tol kilamarala, ana lalua apisu ruru ke ga suri e pogos nene, a lalua asuñalu ataveve Yesu apano.

## 21

*Yesu pimi tol yo Yerusalem*

*Mak 11:1-11; Luk 19:28-40; Yoane 12:12-19*

<sup>1</sup> Nanagane, Yesu lala apami lavisin Yerusalem narui, ana la añaalivi e narin pulkumali tai sumo, kiena kia Petpas, naña teke e kunus nene naña

la apio asape Kunus Na Purolip. Ana Yesu miila kiena nalogena la lua, pisape <sup>2</sup> “Amiu lua ava e pulkumali na gare, a mesmesu e pogos naþa ava loyuna ea, þisi na amiu lua avisu togki tai, naþa amatear sike na, naga amio narina. Ana amiu lua aluþar plan la, a amiu aure ga la luoka aimi pun inu e nini. <sup>3</sup> Ana visae amiu lua aloge yaru tai visi van amiu, þisi na amiu lua avisa ga vania, avisave ‘Suþe na sinenan suri mali lalua nini vena ava akila kiena yunaena tai wa,’ ana pogos naþa amiu lua avisa sanene, naga kilia taþan lalua aimi veraga.”

<sup>4</sup> Suri nene pimi þarpoyo vena kila visena nene kiena ne navisawalena nanua sumo vim ve lelaga, naþa naga pisa pisape

<sup>5</sup> *“Amiu avion va le Saeon lala, avisave  
‘Amiu apisu ke ne, nanagane kiamiu þarin suþe  
pam ke pun amiu narui.*

*Naga pe yaru tai naþa kiena sitomena to ga tano,  
kila naga kus ga togki,  
togki tai naþa ve tokaki ga, naþa pe ninus ke  
ga wa.’ ”*

*Sek 9:9*

<sup>6</sup> Ana nalogena lalua nene apano, ana lalua akila sa naþa Yesu pisa. <sup>7</sup> Ana pogos naþa lalua aþere togki nene amio narina apimi, ana lala aþatetae maala kulkota lala e wos nen togki lalua nene, ana Yesu naga pa totano meta e navetokak.

<sup>8</sup> Ana yaru la mokliu naþa aþatetae maala kulkota lala suvileviles nen mrapplepa, ana yaru laþasia apa ate mañela lala pitomi aþatetae mena ga, vena togki kiena ne Yesu yali ea. Ve sanene, akila sa naþa la apatanon Yesu sa naþa naga pe pupia þarin suþe tai. <sup>9</sup> Ana la amial ke apano vena ava

loyuñã Yerusalem, ana ãina na yeririna la naña asumon Yesu, amio la naña asiraunia, asuñã apiovisionia sanini, apisa apisape

*“!A ke suwala, po na po! !Teyeluar naga naña pe lus kiena ne Tepet tai nene!*

*!Ntewa na mava, ko ovisa ruru naga nene naña pimi e kioñã kia!*

*!Amiu nae ma e peni metava amiu ñena ga ayeluar naga!”* *Yauena 118:26*

<sup>10</sup> Ana pogos naña Yesu pa loyuñã e Yerusalem, yaru lala sinela pulaula, ana la asuñã akila ke visena la moki, asuñã apiuviunia, asape “?Yaru nene naga ai?”

<sup>11</sup> Ana yeririna la naña apimi amio Yesu, la apisatañela sanini, apisa apisape “Nanene na navisawalena nene naña naga molue e pulku-mali nae Nasaret garu Kalele, naña kiena kia Yesu.”

*Yesu ñene plan la naña asuñã apuliwilin ke suri e Yumã Wa Mãana ne Ntewa*

*Mak 11:15-19; Luk 19:45-48; Yoane 2:13-22*

<sup>12</sup> Ana Yesu pa e Yumã Wa ñana ne Ntewa, a e pogos nene naga pisu sane yaru la moki liu naña la asuñã e kopkop na yumã nene. La nene la asuñã akila ke ga yumãena lala natauluen kilavaru, naga nene e lepas nalaena lala a e kuñãena na Yumã Wa nene, ana la asuñã akila kewia ke ga yaru lala. Ana pogos naña Yesu pisu suri nene, naga pe kekaran re poli. Ana naga pa ñene plan la, naga kawepu narin varvara kiena ne yaru na keueen kururu varu lala, a naga koantetaim lele na totanoena kiena



la naña apuliwilin ke kupa lala. <sup>13</sup> Ana naga pisa pan la, pisape “Ntewa pisa e kiena Visena Wa, pisape ‘Pisi na la avisa m̃au Yum̃a Wa avisave naga yum̃a na leniena,’ ana amiu apilon p̃isi pimi sa ga puluve m̃ana yaru na vinauena la narui.”

<sup>14</sup> Ana pogos naña Yesu sike e Yum̃a Wa nene na wa, kilamara kata lala amio laulu lala apimi puna, ana naga kila ruru la sina. <sup>15</sup> Ana yerkawa lala kiena ne yaru wa lala, amio navianena na navisaluaena lala, apisu yum̃aena wo kiena ne Yesu la nene, a amloge m̃ena ga naña sisi lala asum̃a ga apiovion ke ga wa, asape “!A ke suwala, pona po! Teieluar naga naña naga pe lus kiena ne Tepet nene!” ana yerkawa la nene sinela mimi manene la. <sup>16</sup> La sinela mimi sanene, ana la apisa pa Yesu, apisape “?E sanape, ko omloge m̃a visena naña la asum̃a apisa ke ne?”

Ana Yesu pisatam̃e la, pisape “Ee, nemloge m̃a ne. ?Ana sanape, amiu asitom ke asape visena nene piowa ga? Pona pe apuloli re Visena Wa kiena ne Supe naña pisa, pisape

*‘Ntewa o, ko okilia okila nin sisi kokan lala, amio m̃ena sisi tomtom lala, amieluar ruru ko paṽisi.’* *Yauena 8:2*

<sup>17</sup> Ana Yesu mligan la nene, molue ke sina ga petan Yerusalem, pa e narin pulkumali naña Petani, pa mono ea.

*Purlaki tai naña pe ṽar re mras poli*

*Mak 11:12-14,20-24*

<sup>18</sup> Ana Yesu mon m̃a e nene, ana yemlagi kolulagi naga pisape wasupe sina va Yerusalem, a naga sum̃a mial m̃a pavini, ana naga mloge

sane viso karia. <sup>19</sup> Naga kira pa e isinen mrapplepa, naga m̄al purpiliva tai, naña naga m̄as ga moki, ana pe mras su re e poli. Ana Yesu pisa pa purlaki nene, pisape “Ko ove owar re si mrasnom̄a pogos tai.” Naga pisi sanene, ana veraga ga purpiliva nene mano taña nenaga.

<sup>20</sup> Nalogenā lala apisu naña purlaki nene pimi mano sanene, ana sinela kurkur pañisi. La apiun tai Yesu, apisape “?Ya ne kila purpiliva nene mano ke veraga sanene?”

<sup>21</sup> Ana Yesu pisatam̄e la, pisape “Lelaga nevisa van amiu, visae amiu aviawa m̄arera e inu, naña amiu kiamiu sitomena ve veve lua re, ãisi na amiu m̄ena ga akilia akila sanene, a ãisi na amiu akilia akila m̄ena ga va re laa na wa taulu nene. Sane visae amiu avisa va pupia kunus nene, avisave ‘Osum̄alu otove oula ova e sive,’ ãisi na ve sanene narui. <sup>22</sup> A visae amiu aviawa kawā e Ntewa, naña amiu alelaga kemua lelaga, ãisi na amiu akilia atol suri ya naña amiu amlen vanonia, amiu aviun tan naga.”

*Nasumonen le israel lala sinelan asape avisaluñar Yesu*

*Mak 11:27-33; Luk 20:1-8*

<sup>23</sup> Ana Yesu ãasuñe si pa loyom̄a e Yum̄a Wa Mana ne Ntewa, ana naga pa sum̄a pian ke sina ga yaru lala. Ana yerkawa kiena ne yaru wa lala, amio nasumonena lala kiena ne le Yu lala, apimi puna, apiun tania, apisape “?Ko osum̄a okila ke suri la ne sanene e yo nini e kia kiena ai, a a m̄ena ga naña tam̄an ko sape okila ve sanene?”

24 Ana Yesu pisatam̃e la, pisape “Poga ga, ana inu m̃ena ga nesape neviun naviunena tai van amiu wa. Visae amiu avisatam̃e ruru kiau naviunena nene, p̃isi na nekilia nevisawal van amiu sanape naṗa nekilia nekila ve sanene.

25 Poga ga, kiau naviunena sanini narui, sape: ?Nakeena naṗa Yoane naga kila mare ga nanua e yaru lala, naga suri tai naṗa Ntewa naga pisa pania pisape naga monar kila, pona yaru ga la apisa pania?”

Ana naviunena nene kiena ne Yesu kila na la apisi ga pan la narui, naṗa la asum̃a apisa apisape “?Pisi na ita tevisa sanape na vania? ! Tevisuaruruia! Visae ita tevisa tevisave nakeena nene Ntewa naga pisa pa Yoane, p̃isi na yaru nene viun si tan ita, visave vanon ya ne ita pe temlelaga re e Yoane poli. 26 Ana siraunia ita taṗatete si tevisa tevisave nakeena nene, yaru ga la apisa pa Yoane, vanon naṗa yeririna la nene la amlelaga ke m̃arera p̃isi rui, asape Yoane nene naga pe navisawalena na lelaga tai kiena ne Ntewa, ana pe pon re yeririna la nene sinela kar ita poli.” 27 Ana kiela sitomena la ne sanene narui kila la apisatam̃e Yesu sanini, apisa ga apisape “Imimi memninue ga.”

Ana Yesu pisa pan la, pisape “Visae sanene, p̃isi na inu m̃ena ga, taṗatete nevisa van amiu nevisave ane pisa pan inu pisape nekila yum̃aena la ne sanene.”

*Pakaiwa kiena ne yaru tai amio narina lalua*

28 Ana Yesu pisa pan la, pisape “Amiu asitomli suniena nini. Yaru tai, narina na yerm̃ene lua,

ana yaru nene pa pisu narina naña m̃earu, pisa pania, pisape ‘Naruu, sineun nesape ãane na ko ova oyum̃ae e kata lokilm̃asm̃as.’

<sup>29</sup> “Ana narina nene pisatam̃ea, pisape ‘Peraga, yepemavi.’ Ana pe piavi re poli, yaru viu nene sitom si arimana, ana naga pilon kiena sitomena, ana pa miyum̃ae sa naña arimana pisa pania.

<sup>30</sup> Ana arimana ne lalua nene naga sitom ke sape ãisi na narina nene taãatete va yo, ana pisa si visena nene pan narina nasirau, ana narina nene pisatam̃e ruruia, pisape ‘Poga ga ata, ãisi na neva ke nanagane ga ne,’ ana siraunia, ana naga pe pa re si poli.”

<sup>31</sup> Ana Yesu piun tan la, pisape “?Lalua nene, ane kila sa naña arimala sinenania?”

Ana lala apisatam̃ea, apisape “Mearu.”

Ana Yesu pisa pan la, pisape “Ee, ana lelaga nevisa van amiu, nanagane na sanene narui. Inu nesum̃a nepisu naña yaru viowa la moki sane yaru na warpoloen takis lala, amio sira na mrapplepa lala, la ke naña ape yeririna viowa la nene, ana nanagane la asum̃a akekaran ke naña vena aimi loyum̃a e nasuãenena kiena ne Ntewa, la asum̃a apilon la ke rui. Ana nepisu sane amiu asike la varaun la, asike la perina paãisi wa. <sup>32</sup> Ana pogos naña Yoane Nakeena naga pimi, naga pian amiu e ãelaga na mrapa naña mesmesu, ana yeririna viowa la nene amlelaga e naga. A amiu m̃ena ga, amiu apisu suri la nene, ana amiu na pe apilon amiu re lelaga poli, a pe amlelaga re nenaga.”

*Pakaiwa na yeririna viowa la naña apisuar lokilmāsmās tai*

*Mak 12:1-12; Luk 20:9-19*

<sup>33</sup> Ana Yesu pisi ke pan la na wa, pisa pisape “Amiu ayagagon ruru si p̄akaiwa taṣena nini, naña pisayu yerkawa tai, amio kiena lokilmāsmās tai. Yaru nene kila ruru kiena yo nene naña kila kove mārerera tai telivi piora ea, a kila kana lelana navieplanen was nen māsās, a kila mēna kana lele tai naña pa metava naña yaru kilia wiyu va se ea, vena visuar lokilmāsmās nene.

“Ana e pogos tai, yerkawa nene sinenan sape yalor re va e purvanua taṣena tai, ana naga mligan kana lokilmāsmās nene e limana ne yaru la p̄asia ayumāenia, ana aul vania. <sup>34</sup> Ana yerkawa nene pa sumā perina pano-o, ana naga pisu kilale pisape nanagane pogos na mramāsās marua narui. Ana naga mligan kiena yaru la ava si puna ne la naña asike e kana lokilmāsmās nene vena awar kiena kilavaru na mras nen māsās kompāsia, naña la nene monar aul vania. <sup>35</sup> Ana poglis naña kiena yaru la nene apimi, ana yaru taṣena la nene aṁe la, naña tai la aṁe ga naga, a tai asumār naga mare, a taṣena sina akoveṁar naga mare.

<sup>36</sup> “Ana yerkawa nene mligan si kiena yaru taṣena laṣasia, ana la moki la sane, ana la nañani akila si p̄elaga maran taaga sa ke ga pan la. <sup>37</sup> Ana yerkawa nene sitomyu p̄elaga kiena la nene, ana naga pisape ‘Inu monar neligan ga naruu vano, p̄isi na monar avatanon naga,’ ana naga mligan narina wawa napo nene pano.

<sup>38</sup> Ana pogos naþa apisu naga, asumãa apisavisa pan la, apisape ‘Naga nene na narina ne yerkawa ke narui. Yaru ke nanene narui, naþa visae yerkawa nene kovio, þisi na naga ke narui naga kus porotano nene sane lalimana ne arimana. Popon ita towemãar m̃ena ga naga mare, ana þisi na ita ga tekilia tokus porotano nene ve kieta.’

<sup>39</sup> Ana sanene narui atarar naga, aþure lua naga petan lokilmãasmãas pa vanua, ana añemãar naga mare.”

<sup>40</sup> Ana Yesu piunia, pisape “?Pogos naþa yerkawa nene imi sina, þisi na naga kila sanapen la naþa asumãa apisuar ke kiena lokilmãasmãas nene?”

<sup>41</sup> Lala apisatañea, apisape “Yaru viowa la nene, þisi na yerkawa nene weñar la, monar amare e þelaga tai naþa m̃arera viowa vaþisi. Siraunia, naga ligan kiena lokilmãasmãas e limana ne yaru wo taþena lala, naþa þisi na akilia auli mesmesun vania e kana pog nena.”

<sup>42</sup> Ana Yesu pisa pan la, pisape “Visena tai teke e Visena Wa kiena ne Ntewa, pisape

*‘Kilavaru nene, yaru na yuñãenen yuñã lala, apisa apisape piowa ga, akoven rui.*

*Ana nanagane, kilavaru nene pimi pe kilavaru wo na mrapun yuñã, naþa uarar yuñã m̃arera.*

*Suri nene, naga Ntewa ga kila, a imimi mepisuia na po paþisi.’*

*Yauena 118:22*

“?Visena nene na amiu apuloli m̃a pogos tai rui, pona peraga yo? <sup>43</sup> Inu nevisa van amiu, þisi na Ntewa lalua kiena nasuþenena vetan amiu, ana þisi na la va yaru taþena lala naþa kiela

malena lala kilia war mras wo lala, torokin naña asike loyuma ea.

<sup>44</sup> “Ana visae yaru tai loru e kilavaru nene, ñisi na si kare naga vañisi, tasnena wororowa make ga, pona visae kilavaru nene loru e yaru tai, ñisi na kilamumu yaru nene kila kare naga vañisi.”

<sup>45</sup> Ana pogos naña yerkawa kiena ne yaru wa lala amio Varasi lala amloge ñakaiwa kiena ne Yesu la nene, akilia naña naga sumã pisayu la ke sanene. <sup>46</sup> Kila narui lala sinela kar naga, sinelan asape auarar naga, ana akila ñele ga komin amaraun manene laa ñina na yeririna la, naña amlelaga asape Yesu naga navisawalena kiena ne Ntewa tai.

## 22

### *Pakaiwa na ñaãagena na talopaena*

#### *Luk 14:15-24*

<sup>1</sup> Ana Yesu pis sina ga pan la e ñakaiwa, pisa pisape <sup>2</sup> “Pelaga kiena ne Ntewa naña pio yaru lala apimi loyuma e kiena nasuñenena sanini: Ñarin suñe tai kila ruru pupia kinanena tai e ñaãagena na talopaena kiena ne narina. <sup>3</sup> Naga piun tan yaru la moki rui naña yoko aimi e ñaãagena na talopaena nene, ana pogos naña mligan kiena yaru na yumaena lala vena ava aure la nene aimi, ana la nene yepel mavin si imiena. <sup>4</sup> Ana ñarin suñe nene pisa pan kiena yaru na yumaena tañena lala, pisape ‘Amiu towe awasuñe amiu ke sina ga avano, vena avisa kiau visena nene van la, avisavenua ita tomñe puluk la rui, amio mña ga suri mali tañena lala naña

amlapa ruru po, ana suri punu ga lala e kinanena nene tekila ruru la pa rui. Avisava van la avisave monar aimi lele taaga amio ita e p̄aṣagena nini.’

<sup>5</sup> “Ana la apa apisa pan la sanene, ana la nene asitom korenan ga visena kiena ne p̄arin suṣe nene, lala sinelan asape asuṣa akila ga suri naṣa la sinelania. Tai pa kana lokove, a tai suṣa ga pisuar ṣa kiena yuṣa na wilwilinen suria, <sup>6</sup> a laṣasia apuarar yaru na yuṣaena kiena ne p̄arin suṣe la nene, akila piowa pan la, ana aṣemoṣar la. <sup>7</sup> Ana p̄arin suṣe nene sinena mimi, ana mligan kiena li na mara lala apano, ana aṣe yeririna viowa la nene amarmare, a asikapi kiela pulkumali.

<sup>8</sup> “Ana p̄arin suṣe nene pisa pan kiena yeririna lala, pisape ‘Kinanena nene tekila ruru p̄isi rui, ana la naṣa nepio la p̄isi vena aimi ea, la pe pon re si aimi poli narui, teligan la. <sup>9</sup> Ana inu sineun nesape amiu ataveve narin mrapa taṣena lala, ana yaru ai la naṣa amiu alualia, avio la vena aimi e p̄aṣagena nini.’ <sup>10</sup> Ana kiena yeririna lala apano akila sanene, aṣure yaru la apimi, pe suri korena ga naṣa visae yaru wo lala pona yaru viowa lala, aimi ga sanene vena akokonia ruru yo na p̄aṣagena nene.

<sup>11</sup> “Pogos naṣa la asike loyuṣa e yo nene, ana p̄arin suṣe nene pimi vena talopan la naṣa apimi, ana e pogos nene naga pisu lala yaru tai, naṣa pe miyen re moṣa kulsoṣa wo naṣa torokin p̄aṣagena poli, mien ga kulsoṣa tai naṣa pe taṣena ga. <sup>12</sup> Ana p̄arin suṣe nene piun tan yaru nene, pisape ‘?Mara, ko opimi loyuṣa e yo



nini sanape, naŭa ko pe omiyen re moŭa kulsota wo na  pa agena poli?’ Ana yaru nene pe pisa re si suri tai pan poli. <sup>13</sup> Ana  arin su e nene pisa pan kiena yaru na yu aena lala, pisape ‘Amiu aviar ruru limana luwoka amio lana luwoka, ana amiu akoven naga va vanua, e yo malolo, e yo na a  isi na naga su a taglue, a su a kar luen ga maluena ea.’ <sup>14</sup> Ana Yesu pisa, pisape “Ntewa naga pio yeririna la punu ga, ana ve ve moki re na a naga wereplan la ave kiena.”

*Suri kiena ne Ntewa a suri kiena ne Sisa  
Mak 12:13-17; Luk 20:20-26*

<sup>15</sup> Ana Varasi lala apanon ata ali na a alual naviunena m arera la asia vena ata ali Yesu ea, na a naga visata e  ele ga. <sup>16</sup> Lala apisayu m aga pano-o  isi narui, ana lala mligan kiela nalogena la asia amio m ena ga la as e  egas kiena ne Erot, apimi puna ne Yesu. Ana la nene akila kotalia naga e visena wo lala, la apisa apisape “Navianiena, imimi mekilia na a ko ope yaru mesmesu tai. Kio a visena lala punu ga pe lelaga, a ko opian ke yeririna lala e  elaga na a Ntewa naga sinenania. Ana ko pe opisus re ga yaru la as po poli, ana ko opisus yeririna punu ga marana taaga ga. <sup>17</sup> ?Suri ne nanene narui, imimi mesitom mesape ko ovisali van imimi, na a kieta navisaluaena pisa sanape? ? Pisa pisape, mesmesun ga na a ita le Yu lala toul takis va Sisa, na a pe  arin su e kiena ne le Rom lala, pona pe mesmesu re na sanene poli?”

18 Ana Yesu kilia m̃aga naṗa la sinelan asape akila kare naga, ana naga pisa pisape “Kiamiu visena lala po naṗa po, ana losinemi lala piowa a kona rui. ?Amiu asuṃa ataṗali inu ke sanene vanon ya? 19 Poga ga, amiu ala kilavaru na ulen takis tai imi.”

Ana amla tai pimi, akian pania, 20 ana Yesu piun tan la, pisape “?Ane marana na teke e narin kilavaru nene? ?A ane kiena kia nene?”

La apisa apisape “Marana ne Sisa nene, a kiena kia m̃ena ga.”

21 Ana naga pisa pan la, pisape “Poga ga, suri naṗa kiena ne Sisa, amiu ala va Sisa, a suri naṗa kiena ne Ntewa, amiu ala va Ntewa.”

22 Ana pogos naṗa la amloge visena nene, amilan paṗisi, ana amligan Yesu aṗure apano.

*La naṗa amare, ṗisi na amal sina*

*Mak 12:18-27; Luk 20:27-40*

23 Ana e ke e legiena nene narui, le Satusi laṗas apimi puna ne Yesu, la sinelan asape aviun suri tai tan naga e lepas naṗa lala amlelaga m̃arera ea, naṗa la amlelaga asape yaru la naṗa amare, taṗatete amal sina e legiena maro. Vanon suri ne nanene apiun tan Yesu sanini, apisa apisape 24 “Yesu, ko naṗa ope navianena, imimi sinemimi mesape meviun tan ko, mesape sanape e visena tai naṗa yermarua Mosis pisa nanua sumo. Naga pisa pisape visae yaru tai mare tan wona, naṗa pe narila re poli wa, naga wenla monar talopa sina amio letano nene vena ve wona. E ṗelaga nene, ṗisi na sira nene kilia war narila tai, vena

uarar kia kiena ne wona na yermēne naŕa mare ne, vena kia nene mali m̄aga. <sup>25</sup> Poga ga, ana e um̄a tai pun imimi, welelai la olua. Kiela m̄earu talopa, ana naga pe narina re tai poli wa ana naga mare tan wona, ana wenla nasiraunia p̄ere leinia pe wona. <sup>26</sup> Ana wenla nene naga mare tan m̄ena ga, a welelai na telu kila m̄ena ga sanene, pano-o tol welelai na olua, la punu ga amare tan sira nene. <sup>27</sup> A siraun e wona la punu ga, sira m̄ena ga nene mare. <sup>28</sup> ?Ana ko ovisali suri nene: e legiena maro, pogos naŕa apisa ke apisape p̄isi na yaru la amal sina, p̄isi na sira nene na ve wona ai, vanon naŕa naga talopa amio punu welelai la olua nene p̄isi rui?”

<sup>29</sup> Ana Yesu pisa pisape “Peraga, kiamiu sitom-ena pa pe wowe la, vanon naŕa amiu pe akilia re ya naŕa Visena Wa kiena ne Ntewa pisa poli, a amiu pe akilia re m̄ena ga ya naŕa naga kiena nam̄areraena keviu kilia kila poli. <sup>30</sup> Pogos naŕa yaru lala amal sina, p̄isi na lala ave saga navisi kiena ne Ntewa lala ma e peni narui, ana p̄isi na ve akila re si suri nene natalopaena. <sup>31-32</sup> ? A e lepas na malena si nene, ana Visena Wa tai kiena ne Ntewa sun̄a ga naga kilia iila ita e nene, pona amiu na pe apuloli re poli yo wa? Visena nene pisa sanini, pisape ‘In na nepe Ntewa kiena ne Epraam, Aisak, a Sekop.’ ?Ana visena nene pisa ya? La telu nene la amare e yomarava nini nakonua rui, ana kas moki na moki p̄aro rui, ana Ntewa pisa ga visena nene na wa, naŕa pisape naga pe kiela Ntewa. Sanene na kiena visena naga kana kinasia sape la telu nene la amare

e yomarava, ana la amal kemua puna na wa. Ntewa pe sinenan re sape kiena yeririna lala la ave yaru naña mare la poli, ana naga sinenan sape naga ve Ntewa kiena ne yeririna la naña la amali.”

<sup>33</sup> Ana pogos naña p̄ina na yeririna lala amloge visena kiena ne Yesu nene, la amilan suri lala naña naga sumã pian la ke ea.

*Navisaluaena na keviu lua*  
*Mak 12:28-34; Luk 10:25-28*

<sup>34</sup> Ana pogos naña Varasi lala amloge naña Yesu kila Satusi lala pe akilia re si suri tai naña avisa poli, ana la akila narin viorena tai p̄isi, ana apimi puna Yesu, la m̄ena ga asape akilalia.

<sup>35</sup> Ana la yaru tai, naña la apisu sane naga pe manmarua ruru e Navisaluaena, naga piun naviunena tai pan Yesu, pisape <sup>36</sup> “?Navianena, inu sineun nesape ko ovisawal li, ovisave e visena la punu ga naña sike e kieta Navisaluaena, nape naña keviu, a to metavan la tañena la sane?”

<sup>37</sup> Ana Yesu pisa pania, pisape “Visena Wa pisa sanini, pisape ‘Ntewa na mava naña naga pe kioñã Ntewa, ko monar ositom naga e losinemã wetelu, a e kioñã malena wetelu, a e kioñã sitomena wetelu.’ <sup>38</sup> Nanene naga pe navisaluaena p̄esia, a naña naga keviu pañisi.

<sup>39</sup> A navisaluaena na lua nene naña naga keviu m̄ena ga sa ke ga nasumo nene, naga pisa sanini, pisape ‘Ko monar ositom nalavis pumã lala, okila wo van la, ve sa ke naña ko ositom ko m̄aga.’

<sup>40</sup> Navisaluaena la lua nene, ape purp̄es nen

navisaluaena tařena lala kiena ne Mosis, amio mřena ga visena kiena ne navisawalena lala, nařa asike e kieta Tusi Wa.”

*Navisaarena naga pe Ntewa kiena ne yermarua Tepet*

*Mak 12:35-37; Luk 20:41-44*

<sup>41</sup> Ana e pogos nařa Varasi lala asike veraga amio Yesu sanene, naga mřena ga piun naviunena tai pan la, pisape <sup>42</sup> “?E kiamiu sitomena lala, asape řisi na Navisaarena mřalivi e lus kiena ai?”

Ana la apisatařnea, apisape “Pisi na naga ve lus kiena ne yermarua Tepet nene nařa naga pe řarin suře sumo.”

<sup>43-44</sup> Ana Yesu piun sina ga tan la, pisape “? Ee, nařa amiu apisa na pe lelaga, ana sanape nařa Ninuna Wa sike e Tepet, ana Tepet pisi, pisa pisape

*‘Ntewa na mava pisa pa kiau Suře, pisape*

*“Ko ototano pun inu e lepas na řamarua, otomřate mřa vano-o, řisi na inu neligan kiomřa nasinekar lala aimi ve sa narin takue na vilanvanen lamřa ea.”’* *Yauena 110:1*

“E yo nene tepisu nařa Tepet naga sumřa pio Navisaarena nene pisape Navisaarena naga pe kiena Suře. <sup>45</sup> ?Ana vanon nařa Tepet pisa sanene, a sanapen nařa amiu apisa apisape Navisaarena nene naga molue ga e Tepet, ana naga pe kiena lus ga tai?”

<sup>46</sup> Ana pe yaru re si tai nařa kilia visa si navisatařneena tai va Yesu, a siar mřena ga e legiena nene, pe yaru re si tai nařa kilali si Yesu e naviunena la poli.

## 23

*Yesu pisi m̃arera paṽisi pa nasumonena lala nalotena*

*Mak 12:38-39; Luk 11:43,46, 20:45-46*

<sup>1</sup> Ana e pogos nene, Yesu pisi pa ṽina lala, amio m̃ena kiena nalogena lala, pisape <sup>2</sup> “Lelaga kemua naṽa nanagane, navianena na navisaluaena amio Varasi lala, naṽa la ke narui la akus lelena ne Mosis vena avisawal kinas nen navisaluaena lala kiena ne Ntewa. <sup>3</sup> Ana visae ve sanene, ana amiu na monar alogear la, akila ve sa naṽa la apisa. Ana amiu na ve ataveve re kiela ṽelaga lala, komin naṽa pe akila re suri la naṽa la asuṽa apisa ke pa yaru taṽena la poli. <sup>4</sup> Ana la asuṽa asikol ke si narin navisaluaena la moki naṽa la ga akila, naṽa m̃arera paṽisi, naṽa am̃areran ke pa yeririna lala vena alogear la. Asuṽa akila ke yuṽaena la nene sa naṽa akon ke suri la naṽa urmi paṽisi e yeririna lala, ana lala na pe akekaran re nenaga naṽa vena aiila la na akuspae ga suri la nene.

<sup>5</sup> “Lala na aṽarwar la manene la e kiela yuṽaena lala wa, naṽa lala akila ga vena awere kilamarana yaru taṽena lala. Amiu apisu ke kiela narin pultaga la nene, naṽa akon Visena Wa kiena ne Ntewa sike e la, naṽa apiari e piamenala a e pilepile na limala. La asuṽa sinelan ke asape kiela lala na monar ve kerkeviu vaṽisi, taulu yaru taṽena lala. Amiu apisu m̃ena ga naṽa lala apil m̃ala in kulsota na leniena lala piayavi paṽisi. Ana la apilave manene la e suri la nene,

a la sinelan ga asape yaru la ayeluar la ea. <sup>6</sup> A e pogos na pãpãgena lala a e loyumã na lotena m̃ena ga lala, la sinelan naã silaga asape atoga tano e lelen yerkawa lala, <sup>7</sup> a pogos naã visae la ayaloro e lelen na wilwilena, sinelan asape monar yaru lala avatanon la, a avio ruru la avisa avisave ‘!Oo navianena wo, pokolulagi!’

<sup>8</sup> “Ana amiu na, amiu kiamiu navianena taaga ga rui, a amiu na sa naã na mratava taaga ga, ana visae ve sanene na amiu ve ataãan re si yaru lala avio amiu laãas avisa avisave ‘Navianena.’ <sup>9</sup> Ana ãisi na amiu ve avio re yaru e yomarava nini avisave arimamiu, vanon naã amiu na Arimamiu na taaga ga, naã naga sike ma e peni. <sup>10</sup> A ãisi na amiu ve ataãan re yaru la avio amiu laãasia avisave amiu ave kiela nasumonena, komin naã amiu na, kiamiu nasumonena na taaga ga, naã Navisaarena nene. <sup>11</sup> Kiamiu yerkawa ai naã naga to laa metava, naga monar imi ve sa ga yaru na yuãae kiamiuena. <sup>12</sup> Ana yaru ai naã naga ga pisirlua naga vena vim ve yerkawa, ãisi na Ntewa kila naga suãa tano. Ana yaru naã naga ga kila naga suãa tano, ãisi na Ntewa visirlua naga va metava.”

*Yesu pisawal napiowaena kiena ne nasumonena nalotena lala*

*Mak 12:40; Luk 11:39-42,44,52, 20:47*

<sup>13</sup> Ana Yesu pisa pan la, pisape “!Amiu navianena na navisaluaena lala amiõ Varasi lala, ake!

Amiu akila kare amiu pařisi wa, řisi na viowa van amiu vařisi, komin nařa kiamiu visena lala pona po, ana losinemiu lala piowa a kona rui. Yaru la sinelan asape aimi loyuma e nasuřenena kiena ne Ntewa, ana amiu asuma akotawela ke ga e marala, vena ve aimi re si loyuma narui, a metavanja, amiu mena ga pe apimi re loyuma poli.

<sup>14</sup> “!Amiu navianena na navisaluaena lala amio Varasi lala, ake! Amiu na apiowa ga. Amiu na asuma ařure piavin ke kiamiu leniena la pařisi, ana apisokani ke ga ne, vanon nařa e ke e pogos nene, amiu asuma akila kotalia ke letano la nene, vena avinaun kiela suri lala. Vanon suri ne nanene, řisi na kiamiu nakoarena marera re la sane.

<sup>15</sup> “!Amiu navianena na navisaluaena lala amio Varasi lala, amiu na amiyuma piowa ga! Amiu akekarana nařa ayaloro e waa lala, vena ava e purvanua tařena lala, vena akilali nařa aure yaru lala ataveve amiu. Ana pogos nařa amiu ataulu tai imi narui, ana ve ve piavi re naga la make kiamiu řelaga nařa piowa, va viowa la sane, taulu amiu sina.

<sup>16</sup> “!Ake, amiu na sumonena lala, na ape kilamara řala ga lala! Akila kare amiu pařisi wa, řisi na viowa vařisi van amiu. E pogos nařa yaru lala apisa kia kien suri tai vena kila kiela navisaarena sumalu marera, visae avisa avisave ‘Nepisa lelaga nene, Yuma Wa mana ne Ntewa na meke ne,’ ana siraun, visae akilaro sina navisaarena nene, amiu apisape ‘Nanene na naga poga ga nene, ve ve suri re tai.’ Ana visae avisa avisave ‘Nepisa lelaga, suri la nařa



pe kol, la ne asike e Yumã Wa m̃ana ne Ntewa ne,' amiu apisa apisape visena nene na m̃arera pañisi, tañatete si akilarovia. <sup>17</sup> Aa, amiu na kilamaramiu ãala ga, a ãarimiu pe wowe. ?Ya ne pe suri wa manene la sane: suri la naña pe kol nene, pona Yumã Wa m̃ana Ntewa naña kila kol nene pe suri wa tai?

<sup>18</sup> "A visae yaru tai visa visave 'Nepisa lelaga nene, wonta na m̃eke ne,' amiu apisa apisape visena nene pe suri korena ga. A visae naga visa visae 'Nepisa lelaga nene, kuñapaena nane m̃eke e wonta,' nanagane amiu apisa apisape visena nene naga m̃arera pañisi, yaru tañatete kilarovia. <sup>19</sup> !Sa naña nepisa rui, amiu ape kilamara ãala ga! ?Ya naña pe suri wo manenea: kuñapaena naña m̃eke e wonta, pona wonta naña kila kuñapaena nene pe suri wa tai? <sup>20</sup> Amiu na monar avisu kilale suri la nene, vanon naña naga naña ki wonta vena kila kiena visena va m̃arera, naga sumã ki ke m̃ena ga amio kuñapaena naña sumã e wonta. <sup>21</sup> A yaru naña ki ke Yumã Wa Mana Ntewa, naga ki ke m̃ena ga yerka wa naña m̃ana yumã, <sup>22</sup> a yaru naña ki ke pa ma e peni, naga sumã kipran ke m̃ena ga lele natotanoena wa kiena ne pupia Ñarin Suñe keviu nene, ana visae ve sanene, naga sumã ki mesmesun ke nena Ntewa narui.

<sup>23</sup> "!'Amiu navianena na navisaluaena lala, amio Varasi lala, ake! Amiu akila kare amiu pañisi wa, ãisi na viowa manene van amiu vañisi. In na nekilia m̃aga naña amiu asumã apisu ruru ke silaga, naña visae amiu awar

kamiu kinanena ve lualima, p̃isi na monar ala tai va e Yum̃a Wa m̃ana ne Ntewa, sa naṗa navisaluaena naga suṃa pisa, a amiu asuṃa akila ke sanene e kiamiu suri punu ga, pano tol m̃ena ga narin m̃ak lala a suri m̃ena ga la ne sane mrasil. Ana pupia suri la naṗa navisaluaena naga pisa, ana amiu na pe asitom re nena ga, sa naṗa naga pisa pisape amiu na monar amesmesu ruru wo, a amiu monar asitom yaru taṗena lala, a amiu monar auarar kiamiu navisaarena lala. Visae amiu sinemiun awarar narin suri la ne sanene m̃arera, nanene na poga ga, ana pupia suri la nene naga popon visae amiu akila rui, ana peraga.

24 “!Amiu nasumonena lala, ake, amiu na ape kilamara p̃ala ga! Amiu asuṃa akila ke sa naṗa pogos naṗa amiu amun suria, ana amiu asitom manene la naṗa ve akilalu re naṗa akilalua narin neneno tai naṗa naṗa talilu pito teke e m̃amiu piala, ana amiu pe apisu kilale re naṗa amiu asuṃa asinomlaunlae ke puluk la naṗa asike e poli.

25 “!Amiu navianena na navisaluaena lala amio Varasi lala, ake! Amiu akila kare amiu paṗisi wa, p̃isi na viowa van amiu vaṗisi. Amiu asuṃa ataveve ruru ke narin navisaluaena lala e lepas na kevanen m̃amiu piala amio kamiu pialo lala, ana amiu asitom ke asape kiamiu suri punu ga mekiki ruru narui. Ana kiamiu pialo la nene punu ga pulen ga kinanena na vinauena naṗa amiu aṗar e p̃elaga na sinesunena ga lala. 26 Amiu Varasi lala, amiu ape kilamara p̃ala kemua lelaga. Visae amiu sinemiun asape

kamiu pialo amio m̃amiu piala lala imi ikiki ruru wo silaga, p̃isi na amiu ve akokonia la re si e kinanena la naṣa kiamiu mlamulena viowa sike ea.

<sup>27</sup> “!Amiu navianena na navisaluaena lala amio Varasi lala, ake! Amiu na akila kare amiu paṣisi wa, p̃isi na viowa van amiu vaṣisi. Amiu na sa ga tampona na yaru naṣa mare, naṣa amioa wosia miyuwowo na miyuwowo ruru po paṣisi, ana e losa na pulen ga puriu na yaru mare nene, amio tasnena naṣa menun ke na wa. <sup>28</sup> A sanene, na visae pogos naṣa yaru la apisu ke yepas nemiu vanua, p̃isi na lala asitom ke asape amiu na amesmesu ruru ke ne, ana peraga, e losinemiu lala na apuleni ga visokanena a mlamulena viowa lala.

<sup>29</sup> “!Amiu navianena na navisaluaena lala amio Varasi lala, ake! Sila ga na amiu asuṃa apisi ke ga e kulugomiu. Amiu na asuṃa ga apisuar ruru ke tampona kiena ne navisawalena na sumo lala, ana amiu asuṃa ga apaia ke m̃ena ga kilavaru na nasitom̃alena kiena ne yaru mesmesu lala, ana sanape: ?Amiu na asitom ke asape amiu amesmesu ruru m̃ena ga amio la nene? <sup>30</sup> A amiu asuṃa apisa ke apisape visae amiu amal ke rui e pogos kiena ne repimiu la na nanua sumo nene, vera na amiu ve amio re la nene e pogos naṣa la aṃe moṃar navisawalena lala kiena ne Ntewa. <sup>31</sup> Ana e kiamiu visena na visokanena nene, amiu asuṃa apisa kare amiu ke sina ga, vanon naṣa visena nene, kana kinasia sane pisape amiu ape lus ruru nenaga kiena ne

repimiu lala li nawemoñaren navisawalena lala.  
<sup>32</sup> Poga ga, amiu ayumñaen va mñaga, amiu akilali naña akila make yumñaena nene naña repimiu lala la asiar p̄esan nanua sumo rui.”

*Nakoarena kiena ne li nasumonena nalotena lala*

*Luk 11:47-51*

<sup>33</sup> Ana Yesu pisi mñarera ke pan la na wa, pisa pisape “Amiu na sa nena ga lomñara lala. ?Amiu asitom asape amiu akilia aure matan kiamiu nakoarena e lele naloge viowaena? ! Peraga! <sup>34</sup> Pisi na visae neiila navisawalena lala aimñasu, amio yaru lala naña ape manmarua ruru e visena kiena ne Ntewa, amio navianena na navisaluaena lala, visae aimñasu pun amiu, ana p̄isi na amiu awe momñar lañasia amare e laki torovia, a lañasia amiu awela e kiamiu yumña na leniena lala, a p̄isi na añene plan la mñena ga e kiamiu pulkumali lala. <sup>35</sup> Ana p̄isi na amiu akilalue ga ve sanene van la vano-o, ana p̄isi na amiu ke ga narui naña akus nakoarena vanon marena kiena ne yaru mesmesu la punu ga nene naña repimiu nasumo lala añe momñar la amarmare rui. Nanene siar e Epela, naña naga pe kila re suri tai piowa poli, pimi pimi tol Sakaraea naña narina ne Parakaea, naña repimiu la nene añeñar naga mare lavisin wonta, loyumña e Yumña Wa mñana ne Ntewa. <sup>36</sup> Lelaga nevisa van amiu, nakoarena nene vanon nawemarena kiena ne la nene, p̄isi na imi tol amiu la nene, naña amiu amal ke nanagane.”

*Yesu Sinena Mie Yerusalem*

*Luk 13:34-35*

<sup>37</sup> Ana Yesu tagin Yerusalem, naga pisa pisape “!Yerusalem oo, Yerusalem oo! ?Vanon ya ne ko osumã omẽ momãr ke navisawalena lala amare sanene, a okove momãr ke yaru lala naþa Ntewa mligan la apimãsu pumã? Yam moki liu naþa inu sineun nesape neligan lumãu yervivi kioãa yeririna lala, sa naþa lakaporo þere narina lala apimi atapolou vatano e kupena, ana kioãa yeririna lala pe akekaran in re poli. <sup>38</sup> Ana ko opisu ke ne, Ntewa mligan ko ke narui, ana þisi na ko oimi ove yo yau korena ga narui. <sup>39</sup> Ana nevisa van ko, þisi na kioãa yeririna lala taþatete avisu inu sina, vano vano tol pogos naþa kioãa yeririna lala avisa sina ga sanene, avisave ‘Ntewa Namava, ovisa ruru naga nene naþa pimi ke e kioãa kia.’ ”

## 24

*Yesu pisawal naþa þisi na awe plan Yumã Wa Mana Ntewa*

*Mak 13:1-2; Luk 21:5-6*

<sup>1</sup> Ana Yesu molue e Yumã Wa mãana ne Ntewa, ana pogos naþa naga sumã mial pano, kiena nalogena lala apimi akilologia pupia yumã la naþa asike loyumã e kove na Yumã Wa nene, naþa la apowo paþisi, ana la apisape Yesu kiraþatau si visu la. <sup>2</sup> Ana Yesu pisa pan la, pisape “?Amiu apisu ke yumã la nene? Lelaga inu nevisa van amiu, yumã la nene, þisi na taþatete si kana kilavaru ne tai naþa tomã ga towawa ruru teke e lelana, komin þisi na yar

laṕasia aimi, awe plan make nena yuṁa la nene vano.”

*Pog naloge viowaena monar imi*

*Mak 13:3-13; Luk 21:7-19*

<sup>3</sup> La amial sanene, apimi e Kunus Na Purolip, ana Yesu totano e yo nene. A pogos naṕa pe yaru taṕena lala asu re poli, kiena nalogena lala apimi puna, ana apiun tania, apisape “?Pisi na awe plan Yuṁa Wa nene pogwai, a kile ya na kioṁa nawasuṕeena, naṕa ṕisi na ko owasuṕe ko sina e luas nen pogos nini?”

<sup>4</sup> Ana Yesu pisataṁe la, pisape “Popon amiu avisuar ruru e amiu, vena ve yaru imi ve visa kotalia amiu re, <sup>5</sup> vanon naṕa ṕisi na yaru la ve moki naṕa ala kiau kia, ana ṕisi na aimi avisa avisave ‘In na nepe Navisaarena nene,’ ana visae ve sanene, ṕisi na aure yaru la ve moki naṕa ava avewowe. <sup>6</sup> Ana e ṁena ga e pogos nene, ṕisi na amiu aloge ṁaagena na mara naṕa suṁa lavisi, a lologena na mara la naṕa sike perina, ana amiu ve sinemiu yuyuwawa manene re. Suri la nene monar imi kakate sumo, ana nanene na pe legien maro re poli la wa. <sup>7</sup> A ṕarin suṕe lala, ṕisi na akila mara amio ṕarin suṕe taṕena lala, a purvanua lala ṕisi na asuṁalu akawela amio purvanua taṕena lala. A yo kari ga e yomarava nini, ṕisi na pupia viso, a yokorena yemninu vaṕisi e yo punu ga. <sup>8</sup> Ana suri la nene, pe legiena maro re nene po la wa, ana sa ga sira naṕa ṁeṕena, naṕa sane mloge ṕesan ṁasina mlaea vena war sisi, ana pupia naloge viowaena naga pere na wa.

<sup>9</sup> “A e pogos nene narui, amiu nene naŕa kiau kia sike e amiu, yokorena auarar amiu m̄arera, a akoa kare amiu m̄ena ga, vano vano-o awe mom̄ar amiu amarmare. Ana yaru na purvanua taŕena lala ve sinelan amiu re nenaga, la akawe kiamiu visena lala. <sup>10</sup> Suri la nene, ŕisi na kila yaru la ve moki naŕa ve aviawa re si m̄arera e inu, a ŕisi na la nene naŕa amlelaga ŕesan e inu, ŕisi na ve sinelan re si la naŕa amlelaga ke m̄arera e inu na wa e pogos nini, a ŕisi na la avie plan la ava e limana ne kiela nasinekar la nene. <sup>11</sup> Ana yokorena navisawalena navisokanena la ve moki asuñalu, a ŕisi na la aure yaru la ve moki ava ayal wowe. <sup>12</sup> Yokorena naviowaena imi ve keviu manene va laa sane, kila yaru la ve moki vaŕisi naŕa sinela la imi marmare, la pe asitom re si Ntewa poli. <sup>13</sup> Ana yaru naŕa naga suñalar m̄arera suña ga e inu vano vano-o pogos m̄arera nene ŕisi, ŕisi na Ntewa tamalia naga. <sup>14</sup> A lologena wo na nasuŕenena nene, yokorena alogon va yolai la punu ga e yomarava nini, ŕisi na kile tai naŕa pisawal ke pisape legiena maro pimi ke narui.”

*Pupia pog m̄arera tai garu Yerusalem*

*Mak 13:14-23; Luk 21:20-24*

<sup>15</sup> Ana Yesu pisa m̄ena ga visena taŕena tai, naŕa popon visae yaru naŕa wolovia, kilali naŕa kilia ruru kana kinasia. Visena nene pisa sanini, pisape “Yokorena amiu akilia avisu avisirlua nono tai naŕa viowa na viowa manene laa, naŕa yoko suñalu ana warnena kare manene laa yo

wa na Yumã Wa Mana ne Ntewa. Suri nene Navisawalena Taniel naga pisawal nanua sumo rui, <sup>16</sup> a pogos naña amiu avisu suri nene, amiu naña asike Yutea, amiu popon aure, ava atapolou e kunus lala. <sup>17</sup> E pogos nene, visae yaru tai va ruru teke vanua lavisin m̃ana yumã, naga monar ve va re si loyumã vena war kiena suri lañasia, <sup>18</sup> pona visae yaru sike e kana lokove, naga monar ve vito re si umã vena tar m̃ana kulgota, naga monar kiriri vitañili ga sanene vano. <sup>19</sup> Ana e m̃ena ga e pogos nene, yokorena viowa la va sira la naña la asena, amio m̃ena ga la naña asumã amla ke yu pa kiela sisi tomtom lala. <sup>20</sup> Visae ve sanene, popon amiu alen wo amiu vena kiamiu pog na ureena nene, ñisi na ve imi tol amiu re e pogos naña miava keviu, pona e legiena wa tai, <sup>21</sup> vanon naña pogos m̃arera nene, ñisi na m̃arera la sane taulu m̃ena ga pogos m̃arera tañena lala, naña siar e pogos naña Ntewa sii yomarava nini pimi tol nanagane, a yokorena ve pupia pog m̃arera re si tai ve sanene pogos tai. <sup>22</sup> Ana Ntewa naga sitom̃al rui pisape yokorena tero pogos m̃arera nene imi ve plas ga, vanon kiena yeririna la naña naga mligan plan la vena ave kiena, naña asike e pogos nene. Ana visae naga ve tero re ve plas sanene, yokorena tañatete yaru tai kilia mali sike na.

<sup>23</sup> “Ana e pogos m̃ena ga nene, visae yaru tai visa van amiu, visa visavenua ‘Amiu apisu ke yaru nene, nanene na Navisaarena nene,’ pona visae visa visavenua ‘Nane Navisaarena ne nane



gare,' ana amiu na ve alelaga re e kiena visena la nene, <sup>24</sup> komin naþa navisaarena la mokliu naþa pe ape lelaga re poli, la akilia asuñalu, amio mñena ga navisawalena navisokanena la ve moki, a þisi na la nene akila pupia kile lala, amio suri nailanena mñena ga lala. Yokorena akila sanene, ana þisi na la aure yaru lala avano avewowe, vano-o tol naþa þisi na akilali naþa aure mñena yeririna kiena ne Ntewa naþa naga mligan plan la vena ave kiena, ana la taþatete akilia akila. <sup>25</sup> Ana nanagane, akilia avisuar amiu, komin nepisawal suri la nene pan amiu sumo rui, e pogos naþa pe aþaripo re yo poli wa.

<sup>26</sup> “Ana vanon suri ne nanene, visae yaru la avisa van amiu, avisave ‘Navisaarena nene, nanagane naga sike gare yokorena nene rui,’ ana þisi na amiu na ve avanon re naþa avisulia, pona visae la avisa, avisave ‘Naga ke narui, naga nane sike ga loyurña e yurña nene,’ þisi na amiu ve alelaga re e visena la ne sanene. <sup>27</sup> Ana pogos naþa Narina ne Yeririna wasuþe sina ga vitomi, ana þisi na vitomi merarava ruru nenaga va yeririna la punu ga, sa naþa yekarpla naþa pilavila, a vivaga ruru make ga e yo punu ga ma e sinapane. <sup>28</sup> E pogos nene, þisi na ve sa mñena ga naþa visae suri mare tai mñeke e yo tai, ana pupia pepaurña la naþa akan ke suri mare lala, þisi na aiminia, la monar ave þegas ga asike e yo nene.”

*Pisi na narina ne yeririna imi sina  
Mak 13:24-27; Luk 21:25-28*

29 A Yesu pisa pisape

“Ana siraunia, mesmesun nena e pogos naña naloge viowaena nene visae ĩisi narui, ĩisi na mrae imi ve pupumalo, a kupario ve tego re sina.

A verue la ne ma e sinapane ĩisi na aloloru, a suri m̃arera lala nae ma e sinapane, yokorena Ntewa naga kululun la akululu.” *Ais 13:10, 34:4*

30 “E pogos nene, kile nawasuĕeena kiena ne Narina ne Yeririna yokorena warpoyo ma e sinapane, a yokorena yolai lala nae yomarava nini atagtagi alolokai, a ĩisi na la avisu Narina ne Yeririna molue e lul lala amio pupia nam̃areraena a pupia naurarenakam kiena.

31 Ana siraunia, pupia kumasua yelu, a naga ligan kiena navisi lala ava e yo punu ga e yomarava nini a ma e peni, vena aure kiena yeririna la naña naga mligan plan la ĩisi rui, aimi lele ve taaga puna.”

*Pe yaru re tai naña kilia pog na legiena maro nene poli*

*Mak 13:28-32; Luk 21:29-33*

32 Ana Yesu pisa, pisape “Amiu asitomli purlaki nene, naña asape purpiliva ne. Naga kiena suri navian amiuenta tai teke ea, naña amiu na monar avisururuia. Pogos naña amiu avisu naña naga korowas nena imi memaena, a imi malumu, sitos la siar miyulua sina, ana amiu akilia asape pogos na yepisinu m̃arera pimi ke lavisi narui. 33 Ve sanene, pogos naña amiu avisu kile la nene e

yomarava, sa naþa nepisa pan amiu rui, ana amiu akilia naþa Narina ne Yeririna naga sumã ga e pulutava rui, lavisi ke molue narui. <sup>34</sup> Nevisa suri na lelaga van amiu, yokorena suri la nene þisi na imi kakate sumo, ana siraunia, teras kiena ne yaru la naþa la amal ke e pogos nene, þisi na naga kilia kovio vetan yomarava nini. <sup>35</sup> A yokorena sinapane amio yomarava nini lalua mēna ga akovio veraga, ana kiau visena lala taþatete akovio pogos tai. <sup>36</sup> Ana pe yaru re tai naþa kilia kana legiena pona aora nena naþa þisi na Narina ne Yeririna naga imi ea. Navisi lala nae ma e peni, amio Narina ne Ntewa, la mēna ga amninue ga, ana Ata ga, naga taaga naga kilia mēga.”

*Amiu monar akila ruru amiu asuã ga  
Mak 13:33-37; Luk 17:26-30,34-36*

<sup>37</sup> Ana Yesu pisa pisape “Vano vano tol pogos naþa Narina ne Yeririna imi sina, ana þisi na taþatete yaru la akila ruru la wo, ve sa ke pogos kiena ne Yermarua Noa nanua sumo. <sup>38</sup> Ana e pogos nene narui, sumon naþa pupia womie mlau, ana yaru lala asuã akinana mēga, a asuã amun mēna namunena lala, a akila ke talopaena la sanene, pimi tol pogos naþa Noa pa loyurã e kiena pupia waa naþa naga miyurãenia. <sup>39</sup> Ana yeririna la nene asuã ga sanene, la pe asitom re suri tai poli, ana apisu ga pupia womie nene mlau pimi þere plan la. Ana inu nevisa van amiu, yokorena e pogos naþa Narina ne Yeririna naga wasuþe sina imi, ana þisi na la nene maran ve taaga ke ga ve sa nanua sumo e pogos kiena ne

Noa. <sup>40</sup> Visae yaru la ve lua, lalua asuñña ayuñña ke e lokove, ñisi na navisi lala aimi atarlua tai, ana aligan tai ñeke na, <sup>41</sup> a visae sira ve lua, naña lalua asuñña ayuññaen ke kinanena, ana la atarlua tai, ana aligan tai ñeke na.

<sup>42</sup> “Sanene, ana amiu monar asuñña avisuar ruru amiu, komin naña amiu aminue ga e legiena ya naña kiamiu Suñe imi sina warpo yo.

<sup>43</sup> Amiu na monar avisu kilale suri nene, sa naña visae yerkaŵa tai suñña ga, ana visae naga kilia ñnaga pogos naña yokorena yaru navinauena tai imi e ñmana yuñña vena vinaun kiena suri lala, ñisi na yerkaŵa nene suñña visuar ruru silaga, vena suñnate ruru yaru navinauena nene imi.

<sup>44</sup> Ana ve sanene, na amiu monar asuñña avisuar ruru amiu, vanon naña Narina ne Yeririna ñisi na naga imi kate, e pogos tai naña amiu pe asitom re asape ñisi na naga imi e poli.”

*Pakaiwa na yaru na yuññaena naña kiena yerkaŵa ñasuñe sina pimi*

*Luk 12:41-48*

<sup>45</sup> Ana Yesu pisa pisape “?Visae yaru na yuññaena tai, naña naga pe manmarua ea, naga ñuarar ruru yuññaena, naga yuñña sanape? Naga yuñña sanene, naña visae kiena yerkaŵa naga ligan yo vena va perina, ana yerkaŵa nene ligan naga vena naga visuar ruru e yaru na yuññaena tañena lala, ana yoko yaru nene naga uarar ruru yuññaena la nene. <sup>46</sup> Ana pogos naña yerkaŵa nene wasuñe sina, ana kilia lual naña yaru na kiena yuññaena nene suñña ga uarar ruru

ke yuũaena lala na wa. Ana yokorena yaru na yuũaena nene loge wo vařisi, <sup>47</sup> komin nařa yokorena yerkawa nene ligan kiena suri punu ga e limana ne kiena yaru nene. Ee, lelaga, yoko Ntewa naga kila mřena ga ve sa ke nene.

<sup>48</sup> “Ana visae yaru na yuũaena nene viowa ga, a pogos nařa yerkawa nene ligan yo va suũa perina ve piavi, ana yaru na yuũaena nene kilia visa, visave ‘?E suwala, yerkawa nene pa su piavi la wa, pona ve wasuře re si yo narui, pona mřa sanape?’ <sup>49</sup> Ana řisi na naga suũaalu kila viowa va yaru na yuũaena tařena lala, a yokorena naga va suũa mun mřa wii, ve wowe amio yaru na munen wii lala, ana asuũa akan kare ke ga kilavaru kiena ne yerkawa nene na. <sup>50</sup> Ana yokorena yerkawa nene naga wasuře imi e legiena tai nařa yaru na yuũaena nene ilan ga, a e pogos tai nařa yaru nene naga pe sitońal re sape řisi na naga imi ea. <sup>51</sup> Ana yerkawa nene řisi na naga la nakoena ve keviu va yaru nene, nařa yokorena kila naga va sike amio yaru na visokanena tařena lala e yo nařa yaru la asuũa atagi, a akar ga maluela ea.”

## 25

### *Pakaiwa na sira mřee lualima*

<sup>1</sup> Ana Yesu pisa, pisape “E pogos nařa Narina ne Yeririna wasuře sina ga, yokorena nasuřenena kiena ne Ntewa naga ve sa nařa řakaiwa nini pisa. řakaiwa nini, naga pisayu řařagena na talopaena tai, nařa taveve kiela

ṗelaga, la ne e lepas naṗa puna ne yermēne la aṗure naga pa e yumā m̄ana ne sira m̄ee vena aure sira nene amio naga imi amio la. Ana vinena ne yermēne nene la lualima la asike ga umā, vena la akila ruru suri la punu ga. Ana lavisi yemalo, ana vinena lala la aṗar kiela kapi vivaga lala, la amiyalilu mrapan la, vena la punu ga awasuṗela si aimi. <sup>2-4</sup> Ana vinena la nene, lala lima la ape manmarua, asitom ruru suri po, naṗa aṗar m̄a piawi na sirveve laṗasia vena akokonia sina ga kiela nakapi vivaga lala, ana la lima na ape tamos ga, la pe asitom ruru re si sanene poli, ana la aṗar m̄aga kiela nakapi vivaga lala, ana la pe aṗar re si sirveve laṗas poli naṗa vena visae taṗa, ana akilia akokonia sina ga. <sup>5</sup> Ana lala asumāte m̄a yaru natalopaena nene pano-o, ana naga susun paṗisi, kila sanene sira m̄ee la lualima nene, atekavito pano-o paṗisi, ana amomalio.

<sup>6</sup> “Ana kolemallo ko yepelilika, ana yaru tai pio, pisape ‘!Yaru na talopaena, pimi ke lavisi warpoyo narui. Amiu aimi avitawe naga!’ <sup>7</sup> Ana sira m̄ee la lualima nene atavilo, akila ruru kiela nakapi vivaga lala vena vivaga ruru sina. La akila plan m̄au na kilika na kapi lala, a apisuveve kiela sirveve lala. <sup>8</sup> Ana la naṗa la pe asitom ruru re suri poli, apisu kilale kiela nakapi vivaga lala lavisi marmare, sirveve ṗisi, ana apiun tan lala ṗasia, apisape ‘Awis suwala, amiu akilia ala re narin sirveve van imimi wa, a visae peraga yokorena kiamimi nakapi la amarmare yo.’

<sup>9</sup> “Ana la naṗa asitom ruru suri po, apisa apisape ‘!Peraga yo! Sirveve nini pe torokin

punu ita re poli. Popon amiu ava li si e yuñã nawilwilena vena aul si kiamiu lañasia.’

<sup>10</sup> “Ana la apanon si asape aul kiela sirveve, a pogos naña apa ke ga wa, yaru natalopaena nañani pimi poru. Naga pa loyuñã e mña yuñã, a sira mñee la lima nene naña la asuñatea, lala amio naga apa veraga e kinanena na talopaena. Ana pogos naña yeririna la apa asike loyuñã rui, ana la akotava ruru e mratava.

<sup>11</sup> “Ana siraunia, sira mñee tañena la nañani añasuñe la ke sina ga, ana asuñalu asuñã mratava, apio apisape ‘!Meneu, mñeneu, awis ovietava meimñasu loyuñã!’

<sup>12</sup> “Ana yaru naña pisa ga pan la, pisape ‘!Lelaga nevisa van amiu, nemninue amiu ga!’ ”

<sup>13</sup> Ana Yesu pisa pae ñakaiwa nene ñisi, ana pisa pisape “Poga ga, ana amiu na monar avisuar ruru wo, vanon naña amiu pe akilia re legiena na suri nene poli amio mrae nena.”

*Pakaiwa na yaru telu naña la apisuar kilavaru tai*

*Luk 18:11-27*

<sup>14</sup> Ana Yesu pisa, pisape “Ana pogos naña Narina ne Yeririna wasuñe sina ga, ñisi na ve sa mña ga naña ñakaiwa nini pisa, pisape: Yerkawa tai, kila ruru ke pisape ñisi na va e yo tai naña koperina na koperina, e purvanua tañena tai. Ana yerkawa nene pio kiena yaru na yuñãena lala vena aimi puna, ana naga pisi pan la, mligan kiena suri lala e limala, vena avisuar ruruia ayuñãe amio. <sup>15</sup> Ana naga pisuveve kiela

na kiliaena lala p̃isi, ana mligan taga na kilavaru lima te liman tai, a mligan taga na kilavaru lua te limana yaru taṣena, a mligan taga na kilavaru taaga e limana ne taṣena, ana siraunia naga mligan la, ana pa sike koperina na piavi towe la ga. <sup>16</sup> Ana yaru naṣa mla taga na kilavaru lima, mial ke veraga pano, kila yum̃aena la moki e kilavaru nene, pano-o tol ke sina ga taga na kilavaru taṣena lima. <sup>17</sup> Ana e ke e p̃elaga nene, yaru m̃ena ga naṣa mla taga na kilavaru lua, naga m̃ena ga taulu ke sina ga taga na kilavaru taṣena lua. <sup>18</sup> Ana yaru naṣa mla taga na kilavaru taga ga, naga pa kili p̃iliṣili e porotano, vena sinwan kilavaru kiena ne kiena yerkawa nene.

<sup>19</sup> “Ana pogos moki p̃aro pa rui, ana yerkawa kiena ne yaru la nene naga p̃asuṣe ke sina ga pimi, ana naga sinenan pisape visuveveli kilavaru la naṣa naga p̃ar pa kiena yaru la telu nene. <sup>20</sup> Ana yaru naṣa naga tol taga na kilavaru lima sumo, ana naga pimi sum̃alu se marana ne kiena yerkawa nene, naga p̃ar ke sina ga taga na kilavaru nene lima. Ana naga pisa pisape ‘Mara, nanua sumo ko oṣar taga na kilavaru lima pan inu, ana na nini. Ana netaulu sina ga taga na kilavaru lima nini su metavanja nanua sumo, naṣa netauluia na pe kiom̃a.’

<sup>21</sup> “Ana yerkawa nene pisa pania, pisape ‘Po paṣisi, potena. Ko na okila yum̃aena po paṣisi wa. Ko opuarar ruru narin yum̃aena nene naṣa nemligan e lumom̃a, ana p̃isi na neligan ko vena ko ovisuar kiau yum̃aena kerkeviu la p̃asia. Poga



ga, oimi omio inu e kiau p̄ap̄agena na kekarena nini.’

<sup>22</sup> “Ana yaru naṗa naga p̄ar taga na kilavaru lua, ana naga m̄ena ga pimi suṃalu se marana ne yerkaŋa nene. Ana naga pisa pania, pisape ‘Mara, nanua sumo ko otar taga na kilavaru lua nini pan inu. Ana taga na kilavaru lua ne na nini, amio sina ga taga na kilavaru lua naṗa netauluia na pe kioṃa.’

<sup>23</sup> “Ana yerkaŋa nene pisa pania, pisape ‘!Po paṗisi! Potena, ko na okila yuṃaena po paṗisi wa. Ko opuarar ruru narin yuṃaena nene naṗa nemligan e lumoṃa, ana p̄isi na neligan ko vena ko ovisuar ruru kiau yuṃaena kerkeviu la p̄asia. Poga ga, oimi omio inu e kiau p̄ap̄agena na kekarena nini.’

<sup>24</sup> “Ana yaru naṗa tol taga na kilavaru taaga ga, naga pimi suṃalu se marana ne yerkaŋa nene, pisawo ga, pisa pisape ‘Mara, nesitom nesape ko ope yaru ṃarera tai. Ko okilia ola kinanena e lokove naṗa ko pe omiyuṃaen re poli, a ko okilia ola m̄ena ga mralaki e purmraki naṗa pe ko re omapila poli. <sup>25</sup> Vanon suri ne na nene, nemaraun ko ea, ana nepa nesinwan ga kioṃa kilavaru e porotano. Ana nanini, ovisu kioṃa kilavaru nane su ruru ga suṃa ne.’

<sup>26</sup> “Ana yerkaŋa nene pisataṃea, pisape ‘!Aa, ko na yaru viowa tai nene naṗa ne, ko ope yowena paṗisi wa! Ko opisa kare inu p̄isi rui, osape in na nepe tewena tai, ana visae ko opisu naṗa in na nepe yaru ṃarera tai sanene, vanon ya ne ko omligan ga kilavaru su korena ga suṃa sanene? <sup>27</sup> Visae ko ova oligan ga e yuṃa na

kilavaru vera na woga ga, vena pogos naŕa neimi si sanini, nekilia nelalua sina amio ninusa naŕa kapuru ke e yepasia.’ <sup>28</sup> Ana yerkawa nene ŕisi pa kiena yaru lala, pisape ‘Aulai, avano alalua kilavaru nene vetan limana, ana ala va van yaru naŕa ŕarar ke taga na kilavaru lualima rui. <sup>29</sup> Nevisa sanini van amiu, visae yaru naŕa kiena suri moki rui, ŕisi na naga war va la sane vena kiena ve moki vaŕisi, ana yaru naŕa pe kiena suri re poli, ŕisi na naga kilia kilalu narin suri naŕa naga mla ke na. <sup>30</sup> Ana amiu akoven melioi nene va vanua e yo malolo, e yo naŕa yaru lala asumã ga atagi ke ea, a akar ke maluela ea!’ ”

### *Legiena na liŕereena*

<sup>31</sup> Siraunia, ana Yesu pisa pisape “Pogos naŕa Narina ne Yeririna vitomi amio navisi lala e kiena naurarena, ŕisi na naga imi ve ŕarin Suŕe narui, a ŕisi na naga vitomi va e kiena lele wa na totanoen ea. <sup>32</sup> Ana navisi lala, ŕisi na awere yolai punu ga na yomarava nini aimi asumãlu ase marana. Ana e pogos nene narui, ŕisi na naga liŕere yaru lala ava e ŕegas ve lua, ve sa naŕa yaru tai navisuaren suri mali lala, naga liŕere kiena sipsip lala e nane lala. <sup>33</sup> Ana ŕisi na ŕarin suŕe nene ligan kiena sipsip lala ava ase kiena lepas na ŕamarua, a nane lala ava ase laŕas na ŕameli. <sup>34</sup> Ana ŕisi na naga visa van la ne asike e lepas na ŕamarua, visave ‘Amiu yeririna ne la na nene naŕa Ata naga visa ruru amiu. Amiu aimi narui, a akus

lelemiu loyuma e kiena nasuþenena, naþa naga miyumaen ruru sumate amiu ke rui nanua sumo, e pogos naþa naga sii yomarava nini ea. <sup>35</sup> Amiu aimi, vanon pogos naþa visae viso kar inu, amiu amla kinanena pan inu, a pogos naþa moto kar inu, amiu amla wii pan inu. A pogos naþa nepe wolawa ga, amiu apure inu nepa e mamiu uma, <sup>36</sup> a pogos naþa yepeu korena ga, amiu amla kulgota pan inu. A pogos naþa nemai, amiu apimi akaten inu, a pogos naþa nesike e yuma na loge viowaena, amiu apimi asun amio inu.'

<sup>37-39</sup> "Ana yaru mesmesu lala naþa asike e lepas na þamarua þisi na aviun tania avisave 'Ana Suþe, sanape? Ko osuma apisa ke osape imimi memiila ko e kiona pogos marera la ne sanene, ana imimi pe mesitom re nena mesape mekila sanene pan ko poli-i þisa. Imimi mekila suri la nene pan ko na pogwai?'

<sup>40</sup> "Ana yoko Parin Suþe nene visataþe la, visave 'Lelaga nevisa van amiu, pogos naþa amiu akila ke sanene pan yaru na mau mratava tai, ana sa ga naþa akila ke ga pan inu narui, pe suri korena ga naþa naga pe yaru na sanape.

<sup>41</sup> "Ana siraunia, þisi na naga pisi mena ga pa la naþa e lepas na þaþeli, yokorena visa van la, visave 'Amiu aure vetan inu, Ntewa piain nakoena viowa tai pan amiu þisi rui. Amiu ava e kapi nene naþa pivaga ma silaga, taþatete mare pog tai, naþa sumate ke Yermare Lego amio kiena navisi lala vena la ava ea. <sup>42</sup> Vanon pogos naþa viso kar inu, ana pe amla re kinanena pan inu poli, a pogos naþa moto kar inu, ana pe

amla re wii pan inu poli. <sup>43</sup> A pogos naña nepe wolawa, ana pe aþure inu re nepa mãmiau umãa poli, a pogos naña yepeu korena, ana pe amla re kulsota pan inu poli, a pogos naña neminana, pona nesike e yumãa naloge viowaena, ana pe apimi akaten inu re poli.’

<sup>44</sup> “Ana þisi na la avisatamẽ þarin suþe nene, avisave ‘?Ana Suþe, sanape? ?Imimi moñal ko na pogwai naña ko viso kar ko, pona moto kar ko, pona ko ope wolawa, pona ko yepemãa korena ga, pona omai, pona osike e yumãa naloge viowaena? ?Ana pogwai naña ko sanene, ana imimi pe mepimi memiila ko re poli?’

<sup>45</sup> “Ana naga þisi na visatamẽ la, visave ‘Lelaga, nevisa van amiu, nevisave pogos naña amiu na pe asitomãli re naña akila ve sanene va kiau yaru tai naña naga pe yaru na sanape, nanene na sa ga naña amiu pe asitomãli re naña akila pan inu poli.’ ”

<sup>46</sup> Ana Yesu kila make kiena visena nene, naga pisa pisape “La nene yokorena la avanon vena atol nakoaena nene naña ve uro re. Ana yaru mesmesu la nene yokorena la avanon atol malena nene naña sumãa vano vano ve uro re.”

## 26

*Apisape aweñar Yesu mare*

*Mak 14:1-2; Luk 22:1-2; Yoane 11:45-53*

<sup>1</sup> Ana pogos naña Yesu pian kiena yeririna lala e visena la nene þisi, ana naga pisa pan la, pisape <sup>2</sup> “Amiu akilia mãa legiena na vewo rui, ana Paþagena Nasitomãalena Natamaliaena siar

narui. E pogos na p̄ap̄agena nene narui, p̄isi na aligan Narina ne Yeririna va e limana ne la naṗa yoko asuari naga e laki torovia vena mare.”

<sup>3</sup> Ana e pogos nene, yerkawa lala kiena ne yaru wa lala, amio nasumonena kiena ne le Israel lala, asum̄a e viorena e yuṗa m̄ana ne p̄arin yaru wa, naṗa naga kiena kia Kaeṗas. <sup>4</sup> La apisayu ke naṗa p̄isi na auaravinaun ga Yesu, a ala nakoarena namarena ga vania. <sup>5</sup> Ana la apisa apisape “Suri nene, ita taṗatete tekila e pogos na p̄ap̄agena, vanon naṗa p̄isi na yaru la sinela kar ita vaṗisi, ana yokorena la aṗaaga vaṗisi ne wa, komin naṗa la mokliu naṗa la akekarān yaru ne nanene p̄isa.”

*Maria taron ponotaninu e p̄arina ne Yesu  
Mak 14:3-9; Yoane 12:1-8*

<sup>6</sup> Ana siraunia, Yesu sike garu e pulkumali nene Petani, ana naga pa sike e yuṗa m̄ana ne yaru naṗa apio kiena kia asape Saemon Leperosi, komin naṗa naga p̄ar leperosi sumo. <sup>7</sup> Ana pogos tai naṗa Yesu kinana ke e yuṗa nene, ana sira tai pimi puna, ana sira nena kus piawi naṗa amiyuṗaenia e kilavaru tai naṗa po paṗisi, a ponotaninu pule ga m̄eke ea, naṗa kana kilavaru keviu manene la paṗisi. Ana sira nene taron make ponotaninu nene e p̄arina ne Yesu.

<sup>8</sup> Ana pogos naṗa nalogena kiena ne Yesu lala apisu suri nene, ana sinela mimi paṗisi, ana la apisape “?Vanon ya ne naga kila kare ponotaninu nene sanene? <sup>9</sup> Visae naga wilwilin lua ga, vera

na naga tol kilavaru keviu tai, naga kilia lavia vena iilaen yaru la naþa limala korena ga.”

<sup>10</sup> Ana Yesu kilia m̃a naþa la apisi ke sanene, ana naga pisi pan la, pisape “Ei, ve akila kare re sira nene sanene. Naga kila yuñæna wo tanea e inu ne. <sup>11</sup> Yaru la ne pe kiela suri re poli, þisi na la na asum̃a ga likan amiu silaga, vena akilia aiila la, ana inu na, taþatete nesike nemio amiu silaga. <sup>12</sup> Suri naþa sira nene kila, naþa taron ponotaninu e tasneu, naga kila sane kila ruru ke tasneu vena asin inu. <sup>13</sup> Lelaga nevisa van amiu, e yo punu ga e yomarava nini naþa þisi na avisawal kiau nalologena wo ea, ana þisi na lala asunyu m̃ena ga suri naþa sira nene kila, vena asitom̃ali luen ga kiena nasitomiena keviu nene, naþa sinena mie inu kemua lelaga.”

*Sutas pisaar pisape yoko vielua Yesu*

*Mak 14:10-11; Luk 22:3-6*

<sup>14</sup> Ana nalogena la lualima taaga pa lua nene, lala tai, naþa kiena kia Sutas nae Kariot, naga pa puna ne yerkawa kiena ne yaru wa lala, <sup>15</sup> ana naga pisa, pisape “?Visae nevielua Yesu vim̃asu e limamiu, þisi na amiu ala ya ne van inu?” Ana la nene apul pania e kilavaru naþa selpa tol lualima yam telu, <sup>16</sup> ana siar e pogos nene, Sutas sum̃a kalewele mrapa naþa vielua Yesu van la ea.

*Nalogena lala akila ruru kinanena na þaþagena*

*Mak 14:12-16; Luk 22:7-13*

<sup>17</sup> Ana pimi tol legiena þesia na þaþagena nene, naþa la apisa m̃ena ga apisape naga pe Paþagena

Na Kanen Kiligaþe, ana nalologena lala apimi puna Yesu, apiunia apisape “?Ko sinoñan osape imimi meva mekila ruru suri lala e yo nape, vena ita tekila Kinanena Na Sitomañena Natamaliaena ea?”

<sup>18</sup> Ana Yesu pisatañea, pisape “Ava garu Yerusalem, ava avisu yaru naþani, avisa van sanini, avisave ‘Kiamimi navianena pisape naga kiena pogos pimi ke lavis narui. Naga sinenan pisape naga, amio imimi kiena nalogena lala, þisi na meimi mekila kanena naþani e moña uña.’ ”

<sup>19</sup> Ana nalogena lala apa akila sa naþa naga pisa, ana la akila ruru suri lala na þaþagena nene.

*Yesu pisawal naþa yoko Sutas vielua naga*

*Mak 14:17-21; Luk 22:14,21-23; Yoane 13:21-30*

<sup>20</sup> Ana siraunia, Yesu lala apimi e uña nene, ana kolemalo, la atotano, la asuña akan ke kinanena nene narui, <sup>21</sup> a Yesu pisa pisape “Lelaga nevisa van amiu, þisi na amiu yaru tai, naga vielua inu.”

<sup>22</sup> Ana kiena nalogena lala amloge naþa naga pisa sanene, ana la sinela piowa paþisi, ana lala peve taaga apiun tania, apisape “!Suþe! ?Pe inu re poli, ne?”

<sup>23</sup> Ana Yesu pisatañe la, pisape “Tai naþa imimi lua melapae kamimi kinanena e pialo taaga, naga ke narui. <sup>24</sup> Yokorena Narina ne Yeririna monar mare ve sa naþa Nasiriena Wa la pisayuia, ana yaru naþa pielua naga, þisi na viowa la van naga, visae naga ve vaeme re vera wo va þisi.”

<sup>25</sup> Ana Sutas, naþa siraunia naga pielua Yesu, naga piunia pisape “?Navianena, ana ai? ?Inu?”

Ana Yesu pisatamea, pisape “Ana, sane opisa ne yo.”

*Kinanena maro*

*Mak 14:22-26; Luk 22:15-20; 1 Koren 11:23-25*

<sup>26</sup> Ana pogos naþa la asuþña akinana ke ga wa, Yesu mla kilaparavi tai, pisa potena pa Ntewa vanonia, ana naga kawe wowaia, kian pa kiena nalologena lala, pisa pisape “Amiu alavia, akania. Nanene na pe tasneu.” <sup>27</sup> A siraunia, mla piala na kuruta namunena, ana pisa potena pa Ntewa vanonia, ana kian pa pan la, naga pisa pisape “Amiu punu ga amunpae ga e piala nini, <sup>28</sup> vanon naþa nanene na tau nene, naþa vena kila naviranarena kiena ne Ntewa suþñalu mñarera, a vena lau vanon naviewoena na mlamulena viowa kiena ne yaru lala ve moki.

<sup>29</sup> Nevisaar van amiu, yokorena ve nomun re si kuruta namunena nene narui, vano vano-o yoko nemun kuruta na munena viu nene nemio amiu, e pogos naþa tesike e nasuþnenena kiena ne Ata.”

<sup>30</sup> Ana siraunia la amiyau maro e yauena tai na Yauena lala þisi, a siraunia la amolue, apa maro e Kunus Na Purolip.

*Yesu pisawal naþa þisi na Pita viro naga*

*Mak 14:27-31; Luk 22:31-34; Yoane 13:36-38*

<sup>31</sup> Ana Yesu pisa pan la, pisape “E yemalo ke nini narui, kiamiu nalelagaena e inu þisi na loloru, vanon suri la naþa imi mñalmñalivin inu. Þisi na ve sa ke ga naþa Ntewa pisa e Nasiriena Wa lala, naþa pisa, pisape



*‘Pisi na nowem̃ar yaru na visuarena sipsip mare,  
ana p̃isi na kiena sipsip lala ayaltetai ava e yo  
punu ga.’* *Sek 13:7*

<sup>32</sup> “Ana pogos naña nemali sina ga vetan marena, yokorena nesumo neva garu Kalele, ana yokorena amiu m̃ena ga monar asirau aimi.”

<sup>33</sup> Ana Pita pisawal pania, pisape “Yesu, pona nalelagaena kiena ne la nene punu ga loloru, ana la aure vetan ko yo, ana in na tařatete kemua neligan ko pog tai.”

<sup>34</sup> Ana Yesu pisa pania, pisape “Lelaga nevisa van ko, p̃isi na yemalo ke ga nene, pogos naña term̃ene ve kokoreko re yam tai wa, ana ko oviro inu yam ve telu narui, ko ovisave omninue nu ga.”

<sup>35</sup> Ana Pita pisawal meraravan pa Yesu e marala, pisape “Visae la sinelan avisave awem̃ar nu nemio ko, nanene na poga ga ne, ana inu, yokorena tařatete kemua neviro ko, nevisave in na pe nepe kioṃa re poli.” A e pogos nene, nalologena tařena m̃ena ga lala apisa m̃ena ga sa ke ga.

*Yesu pa mlen e Ketsemani*

*Mak 14:32-42; Luk 22:39-46*

<sup>36</sup> Ana siraunia, Yesu amio kiena nalogena lala apa e yo tai, kiena kia Ketsemani. Ana naga pisa pan la, pisape “Amiu atoṃa e nene sumo wa, ana in na neva laa perina sane, vena nelen re yam ve plas ga.” <sup>37</sup> Ana naga p̃ere Pita amio narina ne Sepeti la luwoka, Semes amio Yoane, la teloka nene amio naga apa la perina ve tokak

ga, a e pogos nene Yesu naga sinena pimi urmi manene la, mloge piowa pañisi. <sup>38</sup> Ana naga pisa pa la telu nene, pisa pisape “Nanagane nemloge sane ninuu pilaroro la narui, ana kila inu lavisi nemare vanonia. Awis, amiu akilali asumña atavilo amio inu e yo nini sumo wa.”

<sup>39</sup> Ana Yesu mial ga pa la sane, ana mloru kinai mono, monar marana, vena len. Ana naga pio, pisape “!Ata o! Visae okilia okila suri nene, awis ko olalua piala naloge viowaena nene vetan inu, vena ñisi na ve nomun re ea. Ana ko ve okila re nasinenanena kiau, ana okila ga kioña.”

<sup>40</sup> Ana naga ñasuñe sina, pitomi puna ne kiena nalogena la telu nene, ana naga pisu naña la asumña amomalio rui. Ana la atavilo sina, ana Yesu pisa pa Pita, pisape “?Sanape na amiu tañatete atavilo amio inu e aora ve taaga ga nene? <sup>41</sup> Amiu monar avisuar ruru wo, a amiu monar alen silaga, vena nakilaliena lala ve akila amiu re aloru e mlamulena viowa. Ee, kiamiu sitomena ñarera ruru po, ana tasnemi malumu manene la.”

<sup>42</sup> Ana yam lua, naga pa sina e nañani, mlen pisape “!Ata o! Visae otañatete olalua ñau piala naloge viowaena nene, ana monar nomun ea, komin naña monar ve sa ga naña ko sinoñania.”

<sup>43</sup> Ana naga ñasuñe sina pimi, pisu naña la telu nene asumña amomalio ke sina ga, komin naña marala kawa, atekavito pañisi, atavilo ñele ga.

<sup>44</sup> Ana naga mligan la telu nene asumña ga, ana ñasuñe ke sina ga pa e nañani, mlen e visena taaga ña nena ga, naña naga kila yam telu ne. <sup>45</sup> Ana naga ñasuñe si pimi pun la telu

nene, pisape “?Ei, amiu asumãa apa ruru amiu, a amomali ke ga wa? !Amiu avisuaria! Lavisi ke pogos naãa Narina ne Yeririna va e limana ne li viowa la narui. <sup>46</sup> Ita, asumãalu, tevano. Amiu apisu ke ne, yaru na vielua inuena nane sumãa pimi mã ga lavisi namãa.”

*La apuarar Yesu m̃arera*

*Mak 14:43-50; Luk 22:47-53; Yoane 18:3-12*

<sup>47</sup> Ana pogos naãa Yesu pisa ke visena nene wa, Sutas nene, naãa nalogena la lualima taaga pa lua nene lala tai, naga pimi, naga amio yaru na mara la moki naãa aãar kiela playu na mara lala amio kiela plaki lala. La ke nene narui, naãa yerka wa lala kiena ne yaru wa lala, amio nasumonena kiena ne le Yu lala, la amligan la apimi.

<sup>48</sup> Ana sumon naãa la apa aãalivi sanene, yaru na vieluaena naãa Sutas nene, naga pisaar kile tai pan la, naãa naga pisa pisape “Yaru naãa visae neva nevitawe ãesania, nane yaru ne nanene naãa ãisi na amiu auarar ruru naga,”

<sup>49</sup> ana pogos naãa la aãalivi, Sutas mial mesmesun ga Yesu, ana naga pitawea, pisa pania, pisape “!Pokolemalo, Navianena! Sumãare sike amio ko.”

<sup>50</sup> Ana Yesu pisa pania, pisape “Mara, yuãaena naãa ko opiminia, ko okila ga.” Ana la apimi narui, apuarar Yesu m̃arera. <sup>51</sup> La apuarar

naga sanene narui, ana Pita ãerelua kiena playu, terania, tetereria yaru kiena ne Parin yaru wa tai, ana telua kiligana lepas tai. <sup>52</sup> Ana Yesu pisa pania, pisape “Ko oligan ruru si kionãa playu e kana taga. Yaru naãa ãar ke playu na kilaen

mara, naga ĩisi na mare e playu na kilaen mara.  
<sup>53</sup> ?Amiu asitom asape in na taĥatete nevio Ata, vena naga iila inu? Visae nevio naga, yam ve taaga naga ĩisi na ligan ĩegas nen kiena navisi lala ve moki naĥa vena aimi avisuar inu. <sup>54</sup> Ana visae nekila sanene, ĩisi na visena nasumo lala naĥa asike e Nasiriena Wa lala, yokorena la taĥatete aimi ave lelaga, sa naĥa apisaar ĩisi rui.”

<sup>55</sup> Ana Yesu pisi pan yaru la nene, pisape “? Vanon ya ne amiu aĥara kiamiu playu amio kiamiu plaki lala? ?A vanon ya ne amiu asape aimi atararvinaun inu e pupumalo sanene? ? Pona amiu asitom ke asape in na nepe yaru mĥarera na vinauena tai pona na weĥaren yaru? ?Ana silaga e legiena punu ga, naĥa in na nesuĥa nepian ke yaru lala loyuĥa e Yuĥa Wa Mana ne Ntewa, ana vanon ya ne pe apimi atarar inu re e pogos la nene poli? <sup>56</sup> Ana suri la nene la poga ga ne, vanon suri la ne amiu akila ke ne, sa ke ga naĥa navisawalena nasumo lala apisawal nanua rui e kiela Nasiriena Wa lala, ana kiela visena la nene pimi ke sane pe lelaga make narui.”

Ana e pogos nene, nalogena lala amligan Yesu, la aĥure matania.

*Aĥere yesu pa e kumali keviu kiena ne yerkawa kiena ne le yu lala*

*Mak 14:53-65; Luk 22:54-55,63-71; Yoane 18:13-14,19-24*

<sup>57</sup> Ana la naþa atarar Yesu, aþure pimi vena akila naga suñalu se marana ne Kaeþas, naþa naga pe Parin yaru wa. Ana navianena navisaluaena lala amio nasumonena kiena ne le Yu lala, apimi mēna ga lele taaga e kiena kumali nene rui. <sup>58</sup> Ana Pita mēna ga suñā taveve ke Yesu e pogos nene, ana pe pa re lavisin naga poli, ana pogos naþa la apimi loyuma e kove na kumali nene, Pita pano totano amio li nayumaena kiena ne Kaeþas lala, vena naga logeli sanape naþa þisi na la akila va Yesu.

<sup>59</sup> Ana yerkawa lala kiena ne yaru wa lala, amio yerkawa taþena lala naþa la asike loyuma e viorena nene, akilali naþa akale yaru laþasia vena la avisokan ga e Yesu, naþa la avisa suri laþasia naþa la avisu sane akilia aweñar Yesu mare vanonia. <sup>60</sup> Ana la apisi narui, ana yaru la moki naþa asumalu, la apisokani pano pano-o paþisi, ana viorena nene pe ma re suri tai e kiela visena la poli vena torokin la akila ve sanene va Yesu. Kiela visena la peve taþena ga sanene pano-o þisi, ana yaru la lua asumalu, <sup>61</sup> ana la lua apiranari visena taaga, apisape “Yaru nene, pisa pisape naga kilia we plan Yuma Wa Mana ne Ntewa, ana visirlua sina e legiena ve telu ga.”

<sup>62</sup> Ana Parin yaru wa nene suñalu, pisi pa Yesu, pisa pisape “?Sanape, yokorena ko ovisatame la, pona peraga? ?Sanapen visena la nene naþa la asma apisawal ke ne?”

<sup>63</sup> Ana Yesu topuru ga toma ga. Ana Parin yaru wa nene pisa sina ga pania, pisape “Nevisa van ko, ko na monar ovisa kia kiena ne Ntewa Mali,

ovisave lelaga naña ko Navisaarena, naña ko ope narina ne Ntewa, pona pe ko re naga poli. !Ko na monar ovisawal ruru van imimi nanagane narui!”

<sup>64</sup> Ana Yesu pisatamea, pisape “Suri ne nanene narui, nane ko osuãa opisa ke narui. Ana nevisa van amiu, nesape siraunia ve ve piavi re, ãisi na amiu avisu Narina ne Yeririna naña totano e lepas marua kiena ne Ntewa namareraena, a ãisi na amiu avisu naña warpoyo e lul lala, vitomi tano e yomarava nini.”

<sup>65</sup> Ana Parin yaru wa nene sinena mimi pañisi, pitolwowa mñana kulsaket, pisa pisape “!Nane-e, toroki! Yaru naña suãa ãarnena kare ke kia wa kiena ne Ntewa, nanene rui. ?Amiu amloge mña ne? ?Vanon ya ne ita tesuãa takale ke si yaru vena visawal si suri lañas e naga? <sup>66</sup> ?Ana viorena nini sitom sanape? ?Pisi na teliãere naga sanape?”

Ana la apisatamea, apisape “Popon awemñar nena naga mare.”

<sup>67</sup> Ana la nene la apilasiria marana, a asu naga, a lañasia la amlipa kare naga pañisi, <sup>68</sup> ana apisa kare naga, apisape “?Ei, Navisaarena, ko ovisawalia, ane mliãa ko ga na wa?”

*Pita piro Yesu*

*Mak 14:66-72; Luk 22:56-62; Yoane 18:15-18,25-27*

<sup>69</sup> Ana e pogos nene, naña Pita toãa tano loyuma e kove nene, sira mñee tai na visuaren yuma pimi puna, pisa pisape “!Ei, ko mñena ga otaveve Yesu nae Kalele nene!”

<sup>70</sup> Ana e marala la punu ga, Pita piro suri nene, pisa pisape “Peraga, nemninue suri na ko opisa ke ne.” <sup>71</sup> Ana naga mial petania, pito tano e pupia pulutava na kove na kumali nene.

Ana e yo nene, sira m̃ee taḗena m̃al naga, ana pisa pa yaru la naḗa asike ga lavisinia, pisape “Yaru nene, naga m̃ena ga amio yaru nae Nasaret naḗa Yesu.”

<sup>72</sup> Ana Pita piro ke sina ga suri nene, pisa visena tai naḗa pe visena m̃arera, pisape “!Peraga ḗa, in na nemninue nena yaru nene!”

<sup>73</sup> Ana yam plas ga, yaru la naḗa asike ga lavisin pulutava nene apimi puna ne Pita narui, ana apisa pania, apisape “Lelaga, ko na ko lala yaru tai, vanon naḗa memloge kilale naḗa ko osum̃a oḗan ke visena lala sa ga le Kalele ga lala.”

<sup>74</sup> Ana Pita pisi m̃arera la sane, naga pisaar ga visena m̃arera lala, pisape “!Lelaga ḗa, sinapane! Nepisa pa rui, inu na pe nekilia re nena yaru nene poli.”

Ana e ke e pogos nene naḗa Pita pisa visena nene, term̃ene tai kokoreko, <sup>75</sup> ana kila Pita sitom̃al si visena kiena ne Yesu, naḗa naga pisa pania, pisape “Lelaga nevisa van ko, ḗisi na yemalo ke ga nene, pogos naḗa term̃ene ve kokoreko re yam tai wa, ana ko oviro inu yam ve telu narui, ko ovisave omninue inu ga.” Ana Pita mloge piowa naḗa piowa, ana naga pa vanua, naga tagi naḗa tagi.

## 27

*Lala aþure Yesu pa puna ne Parin Suþe kiena ne le Rom lala naþa pisuar ke Israel*

*Mak 15:1; Luk 23:1-2; Yoane 18:28-32*

<sup>1</sup> Ana e kolulagi nene, pogos naþa mrae siar pa metava, yerkawa kiena ne yaru wa lala amio nasumonena kiena ne le Israel lala, la atotano ke sina ga vena aviranar ruru li mrapa tai, vena kilaen Yesu mare. <sup>2</sup> Pogos naþa la apisayu þisi, ana la apiar limana ne Yesu, la aþure naga pa puna ne Paelat, naþa naga pe þarin suþe nae Rom naþa naga pisuar ke Israel e pogos nene, ana la amligan Yesu e limana ne Paelat nene, vena naga liþere naga.

*Sutas mēm̄ar ke sina ga naga*

*Yum̄aena 1:18-19*

<sup>3</sup> Ana Sutas, naþa naga pielua Yesu þisi, naga pisu kilale naþa la amlipere Yesu þisi rui asape naga monar mare, ana e pogos nene naga mloge si piowagan suri naþa naga kila. Ana naga pilon si kiena sitomena narui, ana naga þar si selpa lualima yam telu nene, pa yerkawa la naþa apul naga sumo. <sup>4</sup> Ana naga pisa pan la, pisape “In na nekila mlamulena viowa nene, naþa inu nepielua yaru tai naþa pe kila re nena suri tai, ana kiau visena na kila na yoko aweṃar naga mare.”

Ana yerkawa la nene apisa ga pania, apisape “Ei, ve oimi otag re si van imimi. Imimi meþisin ko pa rui.”



<sup>5</sup> Ana Sutas silin tetain kilavaru nene su tano e loyumã wa m̃ana Ntewa, ana naga pa vanua, pa telan kolmekina e kilika, naga mare.

<sup>6</sup> Ana yerkawa kiena ne yaru wa lala, la apano aņar kilavaru nene, ana la apisape “Kilavaru nene, kuruta kana yaru mlau vanon rui, a e kieta navisaluaena, ita taņatete teligan kilavaru na sanene va teke karo na Yumã Wa Mana Ntewa.”

<sup>7</sup> Ana lala apisayuia, ana amla kilavaru nene, apa apul kinakinas nen porotano tai naņã nanua sumo, la apisape kiena kia “Porotano na piaki,” ana la amligan narin porotano nene pe lotap kiena ne wolawa lala. <sup>8</sup> Vanon suri ne nanene, pimi tol nanagane, yaru lala apisa ke narin porotano nene, asape “Porotano na Kuruta.”

<sup>9</sup> A suri ne nanene kila visena tai kiena ne Navisawalena Sereñaea pimi pe lelaga, naņã sumo naga kiena visena pisape

*“La ala kilavaru naņã selpa ve lualima yam telu nene,*

*na torokin maran kilavaru naņã le Israel lala apisa apisape mesmesun aul lua yaru,*

<sup>10</sup> *ana la amla apano apul porotano kiena ne yaru na kilaen piaki nene, sa ga naņã Ntewa pisa pan inu sape nekila.”* *Sek 11:12-13*

*Yesu suñalu e marana ne Paelat*

*Mak 15:2-5; Luk 23:3-5; Yoane 18:33-38*

<sup>11</sup> Ana la aņpure Yesu pimi suñalu se marana ne Parin Suņe Paelat, ana naga piun tan Yesu, pisape “?Ko ope Parin Suņe kiena ne le Israel lala, pona peraga?”

Ana Yesu pisatañea, pisape “Naga ke narui, sane ko opisa ke ne.”

<sup>12</sup> Ana pogos naþa yerka wa kiena ne þarin yaru wa lala amio nasumonena lala apisavisawal suri moki e Yesu, ana Yesu pisataþe re si suri tai poli. <sup>13</sup> Naga topuru ga toþña sanene, ana kila Þaelat piun sina ga tania, pisape “?Sanape, ko pe ositom re naþa la apisa suri viowa la moki e ko poli?”

<sup>14</sup> Ana e lepas na suri la nene naþa la asuþña apisa ke ne, ana Yesu pe pisataþe re si suri tai pan la poli, ana Þarin Suþe nene milan paþisi.

*Þaelat naga taþan pisape Yesu Monar mare  
Mak 15:6-15; Luk 23:13-25; Yoane 18:39–19:16*

<sup>15</sup> Ana e pogos nene, la asike e pog na Þaþagena na Sitoþñalena Natamaliaena na wa, ana e kayui punu ga e þaþagena nene, Þarin Suþe nae Rom nene naga silaga kila suri tai pa le Israel lala. Naga kila naþa visae la þasia asike e yuþña naloge viowaena, la akilia avisa kia kiena ne yaru ve taaga naþa la sinelania, ana yokorena Þaelat naga ligan lua naga molue. <sup>16</sup> Ana e pogos nene, yaru na kilaen politik tai naga moþña e yuþña naloge viowaena, naþa yaru la akilia ruru naga, kiena kia Yesu Þaraþas. <sup>17</sup> Pisi na, pogos naþa þina lala apimi ape moki lele taaga e marana ne Þaelat, ana naga piun tan la, pisape “?Amiu sinemiun asape neligan lua ane molue sina iþnasu pun amiu? ?Sinemiun Yesu Þaraþas, pona Yesu naþa apio ke asape Navisaarena?” <sup>18</sup> Þaelat piun sanene, vanon naþa naga kilia þisi rui naþa yerka wa ga lala kiena ne le Yu lala, la aþure Yesu pimi puna, sane yuþñaena na vielueen ga,

vanon naña apisu naña kiela yeririna tañena lala akekaran Yesu pañisi.

<sup>19</sup> Ana e mēna ga e pogos naña naga totano ke e lelen naliñereena vena akila navisena nene, ana wona mligan visena pimi pania, pisape “Ko ve okila re suri tai va yaru nene. Naga pe kila re suri tai poli, ana na kolemallo nomomalio, nepisu naga, ana nanagane nemloge ke piowa vanon pañisi.”

<sup>20</sup> Sanene narui, Paelat sinenan pisape ligan lua Yesu naga vano, ana yerkawa lala kiena ne yaru wa lala amio nasumonena kiena ne le Yu lala, la akila kare sitomena kiena ne yeririna lala, la añareran la pañisi vena la monar avisa va Paelat vena naga ligan lua Parañas nene vano, a naga monar kila Yesu va mare.

<sup>21</sup> Ana Parin suñe nene piun sina ga tan la, pisape “?Amiu sinemiun asape netamian yaru la lua nene, ana ane molue ga sane?”

Ana la apisatamea, apisape “Imimi sinemimin Parañas.”

<sup>22</sup> Ana Paelat piun tan la, pisape “Poga ga, ana visae ve sanene, ñisi na nekila ve sanapen Yesu nene naña apio ke naga asape Navisaarena?”

Ana la punu ga apionia, la apisape “!Asuar naga e laki torovia!”

<sup>23</sup> Ana Paelat piun tan la, pisa pisape “?Vanon ya? ?Naga kila suri ya naña piowa?”

Ana la apion manene la pa metava sane, la apisa apisape “!Asuaria, asuar naga e laki torovia!”

<sup>24</sup> Ana Paelat pisu naña naga tañatete si taulu la, vanon naña pupia mñaagena pañisi naña pa ke

metava rui, ana naga kus pialo na wii tai, ana e maran yeririna la nene, naga kevan limana ea, ana naga pisape “Kuruta na yaru nene naga pe su re e inu poli. Kiena marena, naga kiamiu yuũaena ga nene.”

<sup>25</sup> Ana pogos naũa yaru la amloge visena nene, la akiikii ke sina ga, apisape “Poga ga ne, suri ke naũa imimi sinemimin ke nanene narui e, naũa kiena marena pe kiamimi yuũaena, a naũa kana kuruta suũa e imimi memio narimimi lala.”

<sup>26</sup> Ana Paelat mligan lua Paraũaas molue si ũasuũa pa pula, sa naũa la sinelania, ana naga mligan Yesu e limana ne kiena li na mara lala vena akoa naga, a vena aure naga va asuaria e laki torovia.

*Li na mara lala akirakirai viowa pa Yesu  
Mak 15:16-20; Yoane 19:2-3*

<sup>27</sup> Ana yaru na kilaena mara lala kiena ne Paelat, la atar Yesu aũaurelua pa vanua e yometava na kiena kumali nene, ana la apio pa kiela ũaegas nen li na mara taũaena lala vena la aimi avisu Yesu. <sup>28</sup> Ana la amiyenlua mũaana kulsota, ana amiyen kulkota tai e naga naũa marana pe melia vivaga sa naũa ũaarin suũa la amiyen, <sup>29</sup> ana la aũaar nenos nen kilsirili, ana aũaar ruruia, amligan e ũaarina, sa naũa karo na ũaarin suũa tai, a amligan mũaena lakiavio tai e limana na ũaamarua vena lararia. Ana la asuũa akinai tano pania, la asuũa akirakirai viowa pania, la apisa apisape “!Imimi meva tanon ko, ko naũa ope ũaarin Suũa kiena ne le Yu lala, imimi memieluar ko!” <sup>30</sup> Ana la asuũa apilasiria naga,

a amla lakiavio nañani, asuñña aññe ãarina Yesu ea. <sup>31</sup> Ana pogos naña la akirakirai piowa pania ãisi, aãarlua kulkota nene e naga, ana amien si mñana kulsota la e naga, ana atar naga, apano vena asuar naga e laki torovia.

*Asuar yesu e laki torovia*

*Mak 15:21-32; Luk 23:26-43; Yoane 19:17-27*

<sup>32</sup> Ana pogos naña li na mara lala la asumon Yesu apa ke narui, amal yaru tai nae Saerin, kiena kia Saemon, ana la aññareran pania asape naga towe kus laki torovia kiena ne Yesu vano.

<sup>33</sup> Ana la apa atol kunus tai, kiena kia Kolkota, naña kana kinasia na asape yo naña sane puriu na piaãarin yaru. <sup>34</sup> Pogos naña apimi aporu e wos nen kunus nene, ana la sinelan asape ala kuruta namunena va Yesu vena munia, ana kuruta namunena nene was nen suri tai naña melkalka sike ea, vena kila tasnena ne Yesu kapulu ga, ve lae manene re, ana pogos naña Yesu munli suri nene, naga yepen mavin si munena.

<sup>35</sup> Ana la atar Yesu, asuari naga e laki torovia. Pisi na, la akila sa naña amlil mñapila, vena alual li naña ane war mñana kulsota tai, a ane war tai, <sup>36</sup> ana la atotano atomñaga e yo nene vena akirakira mñaga va avisu naga. <sup>37</sup> Ana la asiri navisawalena tai, asuari teke metavan ãarina, naña pisawal suri naña la aññeñar naga mare vanonia, naña pisa pisape “Yesu nene, Parin suñe kiena ne le Yu lala.” <sup>38</sup> Ana e pogos nene, yaru navinauena lalua, asuari mñena ga la luoka e laki

torovia sa ke Yesu, la amligan tai e lepasnena na ãamarua, taãena e lepasnena na ãamãeli.

<sup>39</sup> Ana yaru la naãa asuãa amialoro ke apa e yo nene, asuãa asisilin ãarila, apisalele kare Yesu ãisa, la apisa apisape <sup>40</sup> “!Ke, suwala! Ko nene, nanua sumo ko opisa opisape ko okilia owe plan Yumã Wa Mana ne Ntewa, ana ovisirlua ke sina ga e legiena ve telu ga, ana sanape narui? ! Poga, ko ga otamalia ko lia! !Visae ko ope narin Ntewa kemua lelaga, ko otapululu e laki torovia namã, otomi tano!”

<sup>41</sup> E ãelaga mã nena ga nene, yerkawa lala kiena ne ãarin yaru wa lala, amio navianena na navisaluaena, a li na sumonena kiena ne le Yu lala, la asuãa apitalia kare naga paãisi, <sup>42</sup> la asuãa apisa ke, apisape “!Pona naga tamalia mã yaru taãena la moki yo rui, ana naga mninue kare si narui, taãatete si tamalia naga! ?Ana naga pe kieta ãarin suãe ita le Yu lala, pona peraga? Popon naga vitomi tano e laki torovia nanagane, vena ita telelaga e naga. <sup>43</sup> A yaru nene pisape naga piawa e Ntewa, ana pisape naga Narina ne Ntewa. !Poga ga, tevisulia, visave Ntewa kekaran naga, yoko naga tamalia naga nanagane narui!”

<sup>44</sup> Ana yaru navinauena la lua nene, naãa asuar la e laki torovia amio Yesu, la mãna ga luoka asikol sina visena viowa kiena ne la nene pania.

*Yesu mare*

*Mak 15:33-41; Luk 23:44-49; Yoane 19:28-30*

<sup>45</sup> Ana kolipae ga, yemalolo pimi kalo make yo punu ga e yo nene, pano tol mrae telu yepekilavi, <sup>46</sup> a lavis ga e pog nene, Yesu mlokai keviu e kiena visena ruru napo, pisa pisape “?Eli, Eli, laña sařatani?” nařa kana kinasia sape “?Kiau Ntewa, kiau Ntewa, sanape nařa ko omligan inu nemēke sanene?”

<sup>47</sup> Ana yeririna lařasia nařa asuñalu asuña e yo nene, nařa la asuña apisuvisu ke suri la nene, ana amlogepalia nařa Yesu mlokai sane, ana la apisa apisape “Ke, yaru nene suña pio ke yermarua Elaisa, vena imi iila naga-o.” <sup>48</sup> Ana veraga ga, lala yaru tai kiriri pimi, mla lumlum tai, taron kuruta namunena nařa melkalka pa ea, miyurar te laki tai, ana kian va Yesu munia. <sup>49</sup> Ana yaru tařena lala apisa apisape “!Osuwa! Tevisulia wa, pona yokorena yermarua Elaisa vitomi tamalia naga, pona ve vitomi re.”

<sup>50</sup> Ana Yesu mlokai manene sina, ana řere maron kiena yalua, tañan ninuna pano, mare řan.

<sup>51</sup> Ana pogos ke ga nene, pupia kulmrae nařa e Yumña Wa Mana ne Ntewa, nařa mono ke yo wa nařa pe yo wa pařisi, naga purřa pito ga lika, siar metava pito tol tano. A yemninu, a pupia kilavaru lala pororowa la, <sup>52</sup> a e lotap, tampona na yaru mesmesu la moki na nanua sumo apikevike, ana kana yaru ne lala amamal sina. <sup>53</sup> Ana la amolmolue e kiela tampona lala, ana siraun pogos nařa Yesu mēna ga mali sina ga e marena, la nene amial apa garu pulkumali wa Yerusalem, ana yaru la moki nařa apisula.

<sup>54</sup> Ana li na mara lala, amio kiela yerkawa, naña la asumña apisusuari ke Yesu, pogos naña la amloge yemninu, a apisu suri la naña kakate, la amilan pañisi, la sinela kurkur pano-o amiyuyuwwa, ana la apisa apisape “!Aulai, yaru nene naga pe Narina ne Ntewa kemua lelaga naña ne!”

<sup>55</sup> Ana sira la moki pañisi e yo nene, la asumña asuñalu asike la perina sane, la asumña apisuvisu ke Yesu. La nene, naga la naña amolue garu Kalele nanua sumo, la asumña ataveve ña Yesu pano-o, a asumña amiila naga. <sup>56</sup> Ana likan sira la nene, ana Maria tai naña sira nae Maktala, a Maria ñena naña anenane Semes amio Yosop, a sira ñena naña wona ne Sepeti.

### *Yosop sin Yesu*

*Mak 15:42-47; Luk 23:50-56; Yoane 19:38-42*

<sup>57</sup> Ana yaru tai nae Aramatia suña ga, naña naga pe yaru na suri moki, kiena kia Yosop, a naga pe nalogena kiena ne Yesu tai. Ana pogos naña lavisi mrae vito tano, <sup>58</sup> naga pa suñalu se marana ne Paelat, piun tania pisape kus tasnena ne Yesu. Ana Paelat pisa pa kiena li na mara lala, vena la akus tas nen Yesu imi vania. <sup>59</sup> Ana Yosop kus tasnena ne Yesu, mliluwoia e kulmrae tai naña miyuwowo ruru po, <sup>60</sup> ana naga pa mligan ñeke e puluve viu naña naga ñana, naña la ate mare ga ñisi ga na wa. Ana la amelilivin pupia kilavaru na mono en puluve nene, pimi mono pulusa, ana Yosop la añasuñe si apano. <sup>61</sup> Ana Maria lalua nene, naña lala tai nae Maktala, amio



taþena nene, lalua apimi asike e yo nene, la atoña tano ato mesmesun ga pulmaran puluve nene naþa tasnena ne Yesu ñeke ea.

*Li namara lala akirakiravan ña puluve*

<sup>62</sup> Ana suri la nene la apimi kakate e legiena na kilaen suri la punu ga su ruruia sumate Legiena Wa. Ana e legiena taþena, naþa sane Legiena Wa nene narui, yerka wa kiena ne yaru wa lala amio Varasi lala la apa asumalu ase marana ne Paelat, <sup>63</sup> ana la apisa apisape “Mesape mevisa ga van ko, Paelat, naþa imimi mesitoñal ke visena kiena ne yaru na visokanena nene na wa, naþa pogos naþa naga mali ke ga wa, naga sunña pisaar pisape ‘Siraun legiena ve telu, þisi na nemali ke sina ga.’ <sup>64</sup> Ana visae ve sanene, imimi sinemimin mesape meviun tan ko sanini, mesape ko oligan kioña li na mara laþasia ava avisuar e puluve nene, vano vano tol kana legiena telu nene warovia. Visae peraga sa þisi kiena nalogena la ava akusvinaun tasnena, ana þisi na la avisokan, avisawal va yaru lala, avisave ‘Naga mali sina e marena rui.’ A visae la akila ve sanene, þisi na kiena navisokanena maro nene yoko imi viowa la sane, taulu naþa nasumo.”

<sup>65</sup> Ana Paelat pisa pan la, pisape “Poga ga, aure kiau li na mara laþasia avano. Amiu akilia ava akila ruru make suri punu ga sa naþa amiu ava akirakiravan ruru yo nene.”

<sup>66</sup> Ana la apano, amligan pilu tai e kilavaru naþa mono ke puluve nene, naþa visae yaru

---

**27:63** Mat 16:21, 17:23, 20:19; Mak 8:31, 9:31, 10:33,34; Luk 9:22, 18:31-33

tai melilivin kilavaru nene, ĩisi na pilu nene worovia, ana ĩisi na akilia avisu kilalea. Ana la amligan mēna li na mara lala asuṃa akirakirava e puluve nene.

## 28

*Puluve korena ga mēke na*

*Mak 16:1-10; Luk 24:1-12; Yoane 20:1-10*

<sup>1</sup> Ana pogos naĵa Legiena Wa ĩarovia, ana e legiena na siraunia, naĵa legiena ĩesia na wik, pogos naĵa mrae ĩarpoyo, ana Maria nae Maktala amio Maria taĩena nene, lalua apanon asape avisuli puluve nene. <sup>2</sup> Lalua apano atol yo nene, ana pupia yemninu veraga, vanon naĵa navisi kiena ne Ntewa tai mligan ma e peni, pitomi tano melilivin lua kilavaru nene, ana pa teke metava e wosia. <sup>3</sup> Ana marana pilavila paĩisi, a mēna kulsota merarava ruru po, naĵa miyuwowo na miyuwowo ruru po, <sup>4</sup> ana pogos naĵa li na mara lala la apisuia, la amarau pano pano-o amarmarlula asike ea.

<sup>5</sup> Ana navisi nene pisi pan sira la lua nene, pisa pisape “Marauen toko. Nekilia mēna naĵa amiu lua apimin ke Yesu, naĵa asuar naga e laki torovia, <sup>6</sup> ana naga pe mon re si e nini poli, naga mali sina, suṃalu rui, sa naĵa naga pisaar sumo. Amiu lua aimi avisuia e naĵa tasnena momalio mēnea. <sup>7</sup> Ana amiu lua ava vila ga, avisawal va kiena nalogena lala naĵa naga mali si e marena rui. Ana nanagane, yokorena naga sumo vito garo Kalele, ana amiu mēna ga yoko atove, avisu

naga e yo nene. Nane kiau visena pan amlua nene.”

<sup>8</sup> Ana lalua akoskosin naña lalua amolue e puluve, lalua apano. Lalua apano na, sa naña lalua amarau ke ga wa ana lalua amloge sane akekara mēna ga pañisi. Ana lalua akiriri apano vena avisawal lologena nene va kiena nalogena lala, <sup>9</sup> ana lalua apa mña sane, ana lalua apitawe Yesu. Lalua amilan kare naga pañisi, ana naga pisi pan lalua, pisa pisape “Pokolulagi.” Ana lalua apa akinai tano e naga, lalua atarar lana, lalua amlotun naga. <sup>10</sup> Ana Yesu pisa ga pan la luoka, pisape “Marauen toko. Amiü ga luoka ava avisa va wolai lala vena ato garo tano Kalele, ana e yo nene, la akilia avisu inu.”

*Li na mara lala la apa apisawal suri la nene*

<sup>11</sup> Pogos naña sira lalua nene añasuñela apa ke puna ne nalogena lala, e ke e pogos ga nene, ana li na mara lala ñasia añasuñela apa Yerusalem, la apa apisawal suri la nene naña kakate, van yerikawa kiena ne yaru wa lala. <sup>12</sup> Ana la nene, la apio nasumonena tañena lala apimi, ana la apa lele taaga amio la, ana la apisayu suri la nene pano-o ñisi, ana la apiranaria asape la monar awar kilavaru keviu tai va li na mara la nene, <sup>13</sup> ana la apisi mñarera pan la, apisape “Avano avisavisawal va yeririna lala, avisave ‘!Peraga, kiena nalogena ga la nene! Apimi kolemallo, e pogos naña imimi mesumña momomalio ke ga wa, ana la apinaun tasnena akus apano.’ ” <sup>14</sup> Ana la apisa mēna ga pan la, apisape “A visae visena na suri nene va tol Paelat, ñisi na imimi ga mevano

mekila ruru memio naga, ãisi na amiu ve aloge re visena tai vanonia.”

<sup>15</sup> Ana li na mara la nene akekaran kilavaru nene, amlavia, ana la apano apisovisokani e yo punu ga sa naãa yerkawa la nene apisa pan la, a suri nene kila le Israel lala la apisavisa ke visena nene pimi tol nanagane.

*Yesu pimi puna ne kiena nalogena lala*

*Mak 16:14-18; Luk 24:36-49; Yoane 20:19-23*

<sup>16</sup> Ana nalogena la lualima taaga pa taaga nene apito garo tano Kalele, e tavie naãa Yesu pisaar pan la, <sup>17</sup> ana pogos naãa la apisu naga, amlotun naga, ana la ãasia la asitom ãele ga asape Yesu re nene poli. <sup>18</sup> Ana Yesu pimi lavisin la, pisa pan la, pisape “Ntewa mligan suri punu ga nae ma e peni a nae ãena ga e yomarava nini, e luãau, vena nevesuãen la. <sup>19</sup> Sanene, nemligan plan amiu ke narui, vena amiu monar ava e yolai punu ga na yomarava nini, amiu monar aurela aimi ave kiau nalogena lala, naãa amiu akela e kia kiena ne Ata, Narina, a Ninuna Wa, <sup>20</sup> a naãa avian la ãena ga vena alogear visena la naãa nepisa pan amiu ãisi rui. Ana amiu monar asitoãali luen ga, naãa nesuãa nemio amiu silaga, vano vano-o tol luas nen pog nini.”

**Lologena Wo Kienane Yesu Kristo Kome  
Kewo  
The New Testament in the Lewo Language of Epi  
Island, Vanuatu  
Le Nouveau Testament en Lewo langue de l'île d'Épi  
au Vanuatu — Niutestamen long Lewo lanwis, blong  
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 11 Nov 2022 from source files dated 22 Nov 2019

ee028e1c-7e53-571d-8041-681daaf580e8